

Ekwo Jiobu

Akọ ẹhu Jiobu

¹ O nweru onye alì Uzu lanù; teke o shi nọdu bẹ ẹpha iya bụ Jiobu. Nwoke ọbu bụ nwoke, ụta adụdu lẹ ndzụ iya bya aburu onye p̄uberekoto. O bụ onye atsuhuje Chileke ebvu haa eme ẹjo-ememe. ² Iphe, o nwutaru bụ unwoke ẹsaa waa unwanyi ẹto. ³ O nwekwarupho ẹku. Aturu iya dū unu iri l'ẹsaa l'ukporo iri. Inya-kamelu iya dū unu ẹsaa l'ukporo iri. Eswi, a turu njigba ẹbo ẹbo dū unu njigbabe eswi ugbo labo l'ukporo ise. Ne nkapfugara iya dū unu l'ukporo ise. Ndu bụ nemadzụ, ejeru Jiobu ozi kwatakpo dū igwerigwe mebyikpo. O buepho l'oo ya bụ onye shi kakota shii l'iphe, bukpo nemadzụ, a nwuru anwunwu l'uzo ẹnyanwu-awawa l'ophu.

⁴ Unwu iya ndu ophu bụ nwoke nọdu aboje obo-iphe l'ibe phe. Onye ọwa-a -bo ọgiya; ogiya ọzo onye ọzo abo; ẹphe -nọdu abo obo-iphe ọbu; ẹphe ezia unwune phe ndu ophu bụ unwanyi pho ẹphe n'eto; ẹphe abya lẹ nri ono. ⁵ O nọdu abujeru; a -bochaa iphe ono teke ẹphe abo iya; Jiobu ekua phe bya edoo phe nsọ. Nchita-abo hu iya l'ọ bya egweeru Chileke ngweja-akpo-oku l'iswi ẹhu phe l'ẹhu l'ẹhu. Kẹle ọoriye sù: “?A maru ?unwu iya te eme adaru nù iphe-ẹji? ?A maru ?ẹphe te egude adanù obu phe kọ Chileke ọnu?” O buru nno bụ gẹ Jiobu shi emeje iya tekenteke.

Nsetanu ahụ Jiobu ama

⁶ Obenu ujiku lanu; unwu Chileke bya g'ephe goshi onwophẹ l'iphu Chipfu. Nsetanu tsokwaru phẹ phọ bya. ⁷ Chipfu sụ Nsetanu: “?Bụ awe bẹ i shi bya?”

Nsetanu sụ Chipfu: “Mu ejenupho ejeje alwa alwalwa l'eliphe. Mu tsonurupho oma mgboko aghaphe botorii.”

⁸ Chipfu sụ Nsetanu: “?Enya tsuru ngu l'eka onye-ozu mu, bu Jiobu no? Mbụ l'ọ tọ duedu nemadzu, du g'ọo ya le mgboko l'ophu. O bu nwoke, pfuberekoto bya aburu onye uta adudu le ndzu iya; buru onye atsuhuje Chileke ebvu; haa eme ejo-ememe.”

⁹ Tọbudu iya bu; Nsetanu bya eyeeru Chileke onu sụ iya: “?Iipfu tọo? ?Jiobu nonyaerupho tsuhaha gube Chileke ebvu? ¹⁰ ?Tọbudu ngu kpọru okpokuu kpophẹe yele ndibe iya mgburugburu; mekpoo iphemiphe, o nweru? Iphemiphe, oome l'eka bẹ i meru; o buru upete; k'ophu bu l'eku iya tukoru ekameka. ¹¹ Machinaa eka nta-a denyi l'iphemiphe, o nweru enweru g'ihuma l'ọo-pfuru l'ataphu ngu kọo ngu onu.”

¹² Tọbudu iya bu; Chipfu sunu Nsetanu: “O du ree; iphemiphe, o nweru duwaa ngu l'eka; ọo epho ge mkpushi-eka ngu te erwu iya l'ehu.”

Nsetanu kwoepho gburumu; o bueru iya pho eshi l'iphu Chipfu l'eka ono tughua.

¹³ Tọbudu iya bu; o be ujiku lanu; unwu Jiobu ndu ke nwoke me ndu ke nwanyi dzukobe l'ulo okpara nna phẹ ke nwoke abo iphe; eri nri; angu mee. ¹⁴ Onye-ozu buerupho phereketeke l'iphu Jiobu bya asu iya: “Oke-eswi, eegudeje eje ozi egu bẹ e gudegbaa eje ozi egu; nkafu-igara dokwarupho l'aguga eka ono ata nri. ¹⁵ Ndu Sheba fuaru phẹ; bya atuko phẹ rwuta; bya egbushia ndu ejeru ngu ozi. O buru mbedua kpoloko bu onye gbalaru nu su ge mu bya epfuaru ngu g'oda.”

¹⁶ Onye k'ono kpụkwaduru-a opfu l'ọnu epfu; onye ọzo kwobata bya asụ: “Ọku, shi l'ẹka Chileke bẹ shiẹpho l'igwe daa bya atụko aturu ngu l'opfu kee; kechaa kee ndu-ozu ngu kefu; ọ bụru mbẹdua kpoloko bụ onye gbalaru nụ sụ gẹ mu bya epfuaru ngu g'ọda.”

¹⁷ Onye k'ono kpụkwaduru-a opfu l'ọnu epfu; onye ọzo kwobata bya asụ: “Ndu ọ-lwụa-ọlaa, shi lẹ Babilonu buru ọgbo ẹto tịa lẹ mkpa lẹ mkpa bya awụpyabe inyakamelu ngu g'ọ ha rwuta; bya egude ogu-echi gbugbushia ndu ejeru ngu ozi. Ọ bụru mbẹdua kpoloko bụ onye gbalaru nụ sụ gẹ mu bya epfuaru ngu g'ọda.”

¹⁸ Onye k'ono kpụkwaduru-a opfu l'ọnu epfu; onye ọzo kwobata bya asụ: “Ụnwu ngu unwoke mẹ ụnwu ngu ụnwanyi dọkwaru abọ iphe; eri nri angu mēe l'ibe nwune phẹ nwoke k'ọgerenya. ¹⁹ A bya ele ẹnya; oke pherephere shiẹpho l'echiẹgu ziru taphutaphu rwua bya enwungaa ụlo ono l'opfu; ụlo zee zepyabẹ ụnwu ngu ono g'ẹphe ha; ẹphe nwushihu; ọ bụru mbẹdua kpoloko bụ onye gbalaru nụ sụ gẹ mu bya epfuaru ngu g'ọda.”

²⁰ Tọbudu iya bụ; Jiobu bya agbalihu bya eworu uwe yẹbedua, bụ Jiobu zijaa; bya eworu ishi kpushia; bya eworu onwiya tịa gbii l'alị baaru Chileke ẹja; ²¹ sụ:

“Oo ọto bẹ mu gba teke mu
shi l'ẹpho ne mu daa l'alị.

Ọ bụkwarupho ọto bẹ mu
a-gbaru laa.

Ọo Chipfu nuru; ọ bụru
Chipfu wotaru iphe,
ọ nuru.

G'e tukwaa Chipfu ẹpha.”

²² Iphemiphe-a mekọtaru Jiobu; ọpflu o mekwaru Chileke iphe-ẹji; ọpflu ọ sụkwaru lẹ Chileke meru iphe, erwubeduru iya nụ.

2

Nsetanu ahụ Jiobu ama k'ugbo ẹbo

¹ Noo ya; o bekwa mbọku ọzo; ụnwu Chileke byakwa g'ẹphe goshi onwophẹ l'iphu Chipfu. Nsetanu tsokwaru phẹ phọ bya egoshi onwiya. ² Chipfu sụ Nsetanu: “?Bụ awe bẹ i shi bya?”

Nsetanu sụ Chipfu: “Mu ejenụpho ejeje; alwa alwalwaa l'eliphe. Mu tsonurupho ọma mgboko aghaphe bọtorii.”

³ Tọbudu iya bụ; Chipfu sụ Nsetanu: “?Enya tsuru ngu l'ẹka onye-ozu mu, bụ Jiobu nọ? Mbụ l'ọ tọ duedu nemadzụ, dū g'ọo ya lẹ mgboko l'opfu. Ọ bụ nwoke, obu guru iphóró; bya aburu onye ụta adudu lẹ ndzụ iya; bụru onye atsuhuje Chileke ebvu haa eme ẹjo-ememe. I kpatachakpọoru; mu mekpaa ya ẹhu; mebyishia ya l'ẹbe ọ dū iphe, o meru. O gudeshiẹle-a onwiya g'o gudeshi onwiya.”

⁴ Nsetanu sụ Chileke: “Hanaa g'a rwunaa ya ẹka l'akpuru-ẹnya-oji! ?Tị madu lẹ nemadzụ a-mikota ẹnya l'iphemiphe, o nweru enweru g'ọ bụru lẹ ya anọdu ndzụ? ⁵ Mbụ lẹ-a; machinaa ẹka rwua ya l'okpu yẹle anụ-ẹhu g'ii-huma l'ọo-pfuru l'atatipfu ngu l'ẹka ono kọo ngu ọnu.”

⁶ Chipfu sụnu Nsetanu: “Ngwanụ; ọ nọ ngu l'ẹka. Ọle ọ bụ; dobekwa iya ndzụ!”

⁷ Tọbudu iya bụ; Nsetanu shiẹpho l'iphu Chileke l'ẹka ono; ọ bụru iya atugbu bya eje ewoerupho ẹjo ẹkpa-ebyi chía Jiobu l'ẹhu. O shiẹpho l'okpa zakotae ya phọ barịi l'ẹhu jasụ l'ishi. ⁸ Jiobu gbeshiẹpho je agwọo l'ikpọzu. Ọ bụru agbagba mbeji bẹ oogudeje gude akọ onwiya ọko.

⁹ Ọ bụru iya bụ l'ọ nọnyaepfo; nyee ya sụ iya: “?I gudeshikpọepfo onwongu g'i gude iya? ?Tị kọdu Chileke ọnu nwuhu?”

¹⁰ O sù iya: “Opfu ngu gbẹ adakwa g'ì bụ onye lanụ l'ime ụnwanyi, amadụ iphe. ?Bụepho iphe-oma bẹ anyi a-nọdu anata l'ẹka Chileke? ?Anyi taa kabẹkpoedu nata ẹjo iya?”

Iphemiphe ono mekọtakpoo Jiobu; ọpflu ọ saduru ọnu pfuswee Chileke.

Ndu ònyà Jiobu

¹¹ O be teke ndu ẹphe lẹ Jiobu eshi ònyà; ụmadzu ẹto; nùmaru ẹjo-iphe, anwụgbaaru iya nù; ẹphe shigbaa l'ẹkameka, ẹphe shi byatashia ya agbaru mkpu; k'ọpflu ẹphe a-dù iya obu. Ndu byaru nù bụ Elifazu, onye Temanu; waa Bilidadu, bụ onye Shuwa; wafụkwapho Zofa, bụ onye Nama. Ẹphe n'ẹto ono tųgbaberu ọnu eswe ujiku lanụ bya g'ẹphe gbaaru Jiobu mkpu dọya ya obu. ¹² Ẹphe byarwuta bya agbẹ ụzenya hụma iya; ọpflu ẹphe ahụbeeduru iya ama. Ẹphe tųko kwata tų ụzu-ẹkwa kẹ wọo; bya eyegbaa ẹka l'uwe phẹ lajashia; bya ekpotagbaa urwuku ekpugbaa onwophẹ l'ishi. ¹³ Ẹphe gwọdoshihu l'alì l'ẹka ono; ẹphe l'iya gwọkoru nno nọo abalì ẹsaa; eswe l'enyashi. O kpọo phẹ opfu; ọpflu ọ dudu onye ọpflu duru ike saa ọnu pfuru opfu yeru Jiobu. Noo kẹle ẹphe hụmaru l'iphe-ẹhuka, ooje kwata shihu ike mebyi eshihu.

3

Opfu, shi Jiobu l'ọnu

¹ Tọbodu iya bụ; e mechaepho; Jiobu saa ọnu wata epfu opfu; bya awata ephu eswe, a nwuru iya iphu. ² O pfushiahaa sù:

³ “G'eswe, a nwuru mu
 bụkwaru ọla-l'iswi!
 G'enyashi, a tsuru ime mu

bụkwarupho ẹnyashi,
laru l'iswi!

⁴ Gẹ mbọku ono gbahụkwa
ọchii!

Gẹ Chileke ọp̄hu bu l'eli ta
agụbehekwa iya iphe;
ọp̄hu ọ duka iphe,
du g'ìphóró, adukwadu
mbọku ono!

⁵ G'ọchii yee tsukiribaa
tsunyikwaa eswe ono
ẹnya!

G'urwukpu sọpyabekwa iya!
G'eswe mbọku ono
gbahụkotakwa tsurikitiki!

⁶ Mbụ-a; g'ẹjo dadishi tuka
ẹnyashi mbọku ono
gburumu swisia!

G'a ta gụhekwaru iya ye
l'eswe, nwuru l'apha!

Ọp̄hu a gụkwaru iya ye
l'eswe lanu l'onwa!

⁷ Mu suru-a; g'ẹnyashi
mbọku ono bụkwaru
mbọku, gba ẹka nwa!

G'ọ tọ duka olu emereme,
aa-nụma iya l'ime!

⁸ Gẹ ndu atuje mbọku ọnu
tukwaa mbọku ono ọnu;
mbụ ndu kwakọberu
akwakọbe emete
ẹjo-oke-agiyi.

⁹ Gẹ kpokpode nchi-abọhu

iya gbahukwa oçhii.
 G'o lekwa a ɛnya l'iphóró
 abya adudu;
 e -mechaa l'ò büru kẹ
 mmanu; ophu o
 humakwa gẹregere utsu
 ɛnya ahuma ophu.

¹⁰ Noo kẹle o to mechiduru
 ɛpho ne mu
 g'a ta nwu mu mboku ono;
 k'ophu aphu owa ata
 atsoduru mu.

¹¹ Mbü-a; ?bunaa gunu meru
 g'o gude ophu o budu teke
 aanwu mu;
 mbü l'oo teke ono,
 mu shi l'epho afuta ono
 be mu gege atu-buhu
 unme nwuhu?

¹² ?Bunaa gunu meru g'o gude
 utapfu hee mu hefuta?
 Mbü; ?denuanu g'o gude era du
 k'ophu mu nguru iya
 angungu ophu?

¹³ Kẹle nta-a be mu gege
 azekpooro nwadoo.
 Mu gege anoro ge mu ze le
 mgbenya.

Oo ya bu me mu anoduro
 pyakoo onwomu
 nwa nggujungguji;
¹⁴ mu le ndu eze me ndu
 mgbazi unwu-eliphe;

ndu kwashiru unuphu
 doberu onwophe
 l'eliphe-a;
 ọle nta-a bẹ ọ bukotawa
 ochobu.

15 Mu lẹ ndu-ishi, bu ndu shi
 nweru mkpọla-ododo;
 ndu shi doo
 mkpọla-ọchaa dojia ọlo
 phe godogodo.

16 Ọzokwanu lẹ-a; ?bunaa gunu
 kparu iphe,
 mu adudu gẹ nwa,
 a byaru anwu;
 ọ nwuhuwaa ne iya l'ẹpho;
 e woru iya je elia; mbu
 gẹ nwaswa, asakpodarunu
 ẹnya asasa ophu.

17 Ẹka ono bẹ ndu ẹjo-iphe
 a-babuhu hanyihanyi.
 Ndu ike bvuru a-nodu iya
 tutaahaa unme.

18 Alì-maa ono bẹ ndu mkporo
 yichaa lẹ ndu nọ iya atuta
 unme.

Ẹphe ta anuhedu olu ndu
 anoduje achi phe g'ohu.

19 Ndu ha nwanshii nọ l'ẹka
 ono;
 ndu ha shii nodu iya.

Ọphu ndu shi buru ohu anodedu
 l'ẹka nnajiuphu phe.

20 ?Denu g'o gude ìphóró nodu
 adujeru ndu ejegbu onwophe

l'iphe-ẹhuka.

A nọdu ahajẹkwadu ndu aphu
tsoru g'ẹphe dzukwaduru
ndu;

²¹ mbu ndu anwuhu agu ẹgu;
ọphu o kwedu phe egbugbu;
ndu anọduje achọ iya gẹ
ndu achọ ẹku,
ere ire, e domiru edomi.

²² Ndu eteje ẹswa ntumatu;
mbu kwata mee ẹmereme
m'ẹphe bahu l'ime ilu.

²³ ?Denuanu g'o gude iphoro
nọdu adujekwarupho onye
e domiru uto iya edomi;
teme Chileke gude
okpokuu kpọ-pee ya
mgburugburu; ọ kwaa
l'ime iya?

²⁴ Noo kele ọ buwaa atsu ude
bu nri,
epyoje mu onu.

Mgbede, mu ata duẹpho
g'eka mini aso gborogboro.

²⁵ Iphe, mu atsushi ebvu ike
buepho iphe,
mechaaru byaru mu nu.

Ọ buru iphe ono, mu anmaru
pyaapyaapya mechaaru
mee l'ẹhu mu.

²⁶ Ehu ta adujeduru mu guu;
ọphu mu atutajeduru unme;
ọphu ẹhu ebvujeduru mu

ebvuru.
 Ọo ẹpho iphe-ẹhuka bẹ mu
 l'iya anọduje eme.”

4

Ọnu, Elifazu yeru
¹ Tọbudu iya bụ; Elifazu onye
 Temanu bya eyee Ọnu sụ:
² Nemadzu -sukwanu gẹ ya
 yee nwỌnu nwilile;
 ?tọo kpatsudu ngu nụ iwe?
 Ọlobu ?bụ g'iphe aduje baa
 nemadzu edobe Ọnu doo?
³ Leanarọya; gube onye ziwaru
 ikpoto nemadzu iphe.
 Ndu dahụwaru adzulakpa bẹ
 i meru;
 ẹphe gbakerehu.
⁴ Onye ada adada bẹ i pfuru
 opfu yeru;
 opfu ngu kwolia ya.
 Mbụ l'ikpere ngwọkinaki bẹ
 i meru;
 ọ pfuru kẹkerekere.
⁵ Nta-a bẹ iphe-ẹhuka
 byapfutaru gubedua
 l'ishi onwongu.
 Aphụ ji ngu obu ẹgube
 Ọwa-a;
 mbụ l'Ọ turu ngu gbaa
 l'ẹhu; meji tọfu ngu.
⁶ Eshinu i bụ onye atsu Chileke
 ebvu; dakobenụ iya!
 L'i chiru ẹnya yeru abubu,

ị bụ onye ụta adudu ị
ndzụ iya.

⁷ Rịnaa ya ariri; ?bụ onye bẹ
ị makpọoru,
bụ onye iswi dū mma,
lajeru l'iyi?

?Bụ awe bẹ ị hụmajeru l'onye
pfiuberekoto
chihuru ị mgboko?

⁸ O chikwaa iphe, mu ahumaje
bụ ị ndu woru ejo-ememe
akọ g'onye akọ opfu;
bya eworu iphe-ehuka anma
iya bukwapfo
iphe ono bẹ ephe akpataje
iya.

⁹ Chileke -zikwadaa unme fuu;
ephe ephukashihu.

Teke ehu egbu iya swolihuru;
ephe aburu ọla-l'iswi.

¹⁰ Oduma asujekwa ekiri;
baa hanyihanyi; byaa enari;
obenu l'oduma,
dafuru ibogolo
bẹ eekwoshijele-a eze.

¹¹ Oduma, ahumaduru iphe,
oo-ri alaje l'iswi;
unwu oduma agbaa
nanu nanu.

¹² "Mbụ-a; o nwekwaru iphe,
e pfujeru mu ị mpya.

O bụru-a nwiphiphe bẹ mu
nụmabutaru iya.

- 13 Mu nɔdu arwɔ ɛjo nrwɔ
l'ɛnyashi;
lɛ teke ono, ndiphe
adajɛwa ɔdamgbenya
ono.
- 14 Ndzu gɔahaa mu;
ɛhu nmaahaa mu
pyaapyaapya;
k'ɔphu ɔkpu,
nɔ mu l'ɛhu nmakɔtaru
yilayila.
- 15 A nɔnyaepho; nwamaa bya
eshiɛ mu phɔ
l'atatiɔghata.
Ɛdzu swiɛ mu phɔ l'ɛhu;
ishi nyia mu kɛ kpalaa.
- 16 Maa ono bya apfɔerupho
kɛkerekere;
ɔphu mu adukwanu ike
akɔ g'ɔ gbaru.
O buɛpho l'o nweru iphe,
pfuru mu l'iphu.
Ɛkameka dakɔtaepho
nyɔnyoronyo.
A nɔnyaa; mu nɔma olu-opfu
onye sɔru mu:
- 17 ?O nweru g'ɔo-dɔnaa
nemadzɔ mmanɔ
abya aka Chileke
apfɔbekoto?
?O nwenɔru-a g'ɔo-dɔ
nemadzɔ abya aka
onye meru iya nɔ adɔbebe
ree?

- 18 Eshinu Chileke te egudedu
 ire ndu ejeru iya ozi ẹka;
 tẹme ọ nọdu abajẹru
 ụnwu-ojozi-imigwe iya
 mba l'iphe, ẹphe mesweru;
 19 ?bụchia nemadzu bẹ ọo-ha;
 mbụ nemadzu ono,
 bu l'ulo ẹpuchi,
 a turu ọkpa iya l'alị;
 ndu azọ-gbu phẹ
 ka nphe eme l'azọ-gbu
 mbeberibel!
- 20 A -bya eshi l'utsu nọo jasụ gẹ
 nchi jihu bẹ e gwewaru
 phẹ uji.
 Ẹphe alaa l'iyi jeye ẹ
 tuutuutuu ẹ mịimiimii;
 ọ tọ dudu onye ẹnya erwu
 l'ẹka ono.
- 21 Ọ -bụru l'a gbabufuru eri,
 gude ndzụ phẹ;
 ?ẹphe ta anwuhudu l'ẹbe
 enwe egomunggo?"

5

- 1 Kunaa oku nta-a maru mẹ
 ?o nweru onye a-za ngu
 ẹnu.
 ?Denu ụnwu imigwe ono
 ọphu ịi-gharu iphu
 g'ọ gbaaru ngu mkpu?
- 2 Ọvuma egbujekwa onye-eswe;
 tẹme ijiẹnnya nọdu aphuje
 onye amazidu iphe

t̄erii.

³ Mu h̄umajeakwaru ẹka
onye-eswe agba ọgbarabvu;
ọphu ọ d̄udu g'ọ nọ-beru;
atuphuwa iya l'ọnu.

⁴ Ụnwu iya kwatakp̄o awa
awawa;
mb̄u l'eegweje ph̄e
arakabya l'ẹka ekpe
ikpe.

O to nwedu onye agbaru ph̄e
ọdzori.

⁵ Ọ b̄uru ndu ẹgu aḡu erifuje
iphe, ọ kpatar̄u l'ẹgu
iya;
mb̄u l'ẹphe ewotaj̄e chaa
wota ọphu
nọ l'ẹka o pheduru ẹswa.

Ndu ẹhu achi ọku n̄odu
alw̄uje iya alw̄ulwu.

⁶ K̄ele mkpawere te eshijedu
l'urwuku futa;
ọphu iphe-ẹhuka efutaj̄edu
l'al̄i.

⁷ Ọle ọ b̄u; nemadz̄u b̄e a
nw̄ukwaru ye
l'ije iphe-ẹhuka ẹgube-a,
ẹkoroku b̄u: ọ -gbaa l'o
phelihu-a.

⁸ Mb̄u l'ome ọo mu;
m̄e mu edooru iya Chileke;
mb̄u m̄e mu ewōerupho g'ọ
daru mu shi
ishi lan̄u dok̄otar̄u iya.

- ⁹ Lẹ Chileke emeje iphe,
 dūgbaa biribiri,
 būgbaa akpavu l'ishi;
 mbū l'oomeje iphe,
 dū ebvu igwerigwe kpọ.
- ¹⁰ Eliphe bẹ oodzejeru mini.
 O nọdu asọjeru mini sọba
 l'ẹgu.
- ¹¹ Ookulije ndu lwaru alị imeli
 imeli;
 tẹme ọ nọdu ekulije ndu
 agụ aphụ
 dobe l'ẹka adudu iphe,
 byaru eme phẹ nụ.
- ¹² Ndu ẹregede bẹ oomeje;
 o too jehuduru phẹ g'ẹphe
 tūberu;
 k'ọphu bụ l'ẹka phẹ ta
 adudu iphe,
 ẹphe emefuje ọnyà.
- ¹³ Ndu maru iphe bẹ oogudeje
 ẹregede,
 ẹphe agba nmata.
 Tẹmanu mmamiphe ndu
 ntuphu-ire
 bẹ oomeje l'ọ daa ịdaphu.
- ¹⁴ Nchi ejipfuje phẹ l'echilabọ
 eswe.
 Ẹphe eje dadishi l'echi
 gbadagbada eswe
 g'onye eje l'echi abalị.
- ¹⁵ Ndu adudu g'ọ dū phẹ
 bẹ ọodzotaje l'ẹjo ọnu phẹ.

Ọ nọdu adzọtaje phẹ l'ẹka
 ndu dụ ike;
¹⁶ k'ọphu bụ ọ ndu ụkpa bẹ
 ele ẹnya g'adzọo phẹ.

O mee iphe, apfuduru-oto
 mee ọnu sọtukumu.

¹⁷ Ehu-utso bẹ a ọoru nụ onye
 Chileke abajeru mba;
 k'ọphu bụ:
 Ọkalibe-kangokotaru-nụ
 -nọdu alọ ngu ẹka ọ nchi;
 ta anmakwa iya
 phulaphula;
¹⁸ ọle ọlojeru ọnyá tų
 nemadzụ l'ẹhu;
 l'ọ bya epfube iya iphe
 l'ọnyá ọbu.

Ọ nọdu emekaje nemadzụ
 iphe;
 e -mechaa l'o mee ya l'ọ
 kpọhu.

¹⁹ Iphe-ẹhuka a-byaru ngu akpọ
 ishii;
 l'ọ dzọchaa ngu;
 mẹkpoo akpọ ẹsaa;
 ọle o too kwedu g'ọ duru
 iphe, oo-me ngu.

²⁰ Ọ teke akpa-nri; bụ iya
 a-gbarụ ngu mkpu
 g'ị tị kpagbu onwongu
 ọ nri.

Teke aalwụ ọgu l'o mee g'e te
 egbu ngu mma.

²¹ E -pfuaru ngu ẹjo opfu;
o too kwedu g'o rwua ngu
l'ẹhu;
ọphu ịitsudu ebvu mẹ
ọla-l'iswi rwua.

²² Ọo ọchi bẹ ịi-nọduje achi
ọla-l'iswi yẹe ọkpa-nri;
ọphu ị tsudu anụ-ẹgbudu
k'eliphe-a ebvu;
²³ kẹle gụ lẹ mkpuma, nọ
l'ẹgu a-gbachaa ndzụ.

Unu l'anụ, bu l'ẹgbudu
a-dụchaa lẹ ree.

²⁴ Ibe ngu bẹ ịi-makporu l'ọ tọ
dudu iphe,
e-me iya nụ.

L'ị bya agua iphe, bukpo
iphe,
i nweru enweru ọgu;
huma l'ọ tọ dudu ọphu
etuphahụ etuphahụ.

²⁵ L'ị maru l'unwu ngu a-dụ
igwerigwe.

Awa ngu a-kpofushi g'ẹswa,
furu l'alị.

²⁶ L'ị kakporo nka kaghee ya
akaghe
tẹme l'ị bahuje l'ilu.

L'ị dụ g'ereshi, e gburu l'ògè
iya.

²⁷ Anyi nyokporwaru iphe-a
enyonyo huma
l'ọ bu ire-lanụ.

Mbụ-a; nụmakwa iya woru

iya ye lẹ ndzụ ngu!

6

Ọnu, Jiobu yeru

¹ Tọbudu iya bụ; Jiobu yee
Ọnu sụ:

² Ọ dū mu g'a sụ g'e wota
mgburwashị ẹhu mu
tùà atùtù g'a hụma
g'ọonyi-be ẹrwa.

Mbụ g'a tuko iphe-ẹhuka mu
chiru ye l'iphe,
aatùje ẹrwa iphe.

³ Ọ tọ dudu g'e meru g'ọ tọ ka
ẹja, nọ l'eze-ẹnyimu
anyị ẹrwa.

Ọ bụru iya kparụ iphe,
opfu mu adanuka
kpaakpaa.

⁴ Kẹle apfụ,
Ọkalibe-kangokotaru-nụ
gbakashiru mu gugbaaru
mu eguru l'ẹhu.

Ụphu, ọophu mu nọdu alọ
mu ẹka lẹ meji;
mbụ lẹ Chileke eyeẹ mu
phọ ebvu mkpẹe-lanụ.

⁵ Nkapfụ-igara-ọswa ?Ọoraje
órà mẹ ọ -nọdu ata
ẹswa?

Tọo eswi ?oogbuje órà mẹ nri,
oori dukwadu?

⁶ ?Eerije nri, enwedu ụtso l'ẹbe

- e ye iya únú?
 Tọo ?ọ duru uto, dụ l'ẹka
 ono, achajẹ ucha
 l'ẹkwa-ọku,
 e shiru eshishi ono?
- ⁷ Mu te ekwejedu iya edenyi
 ẹka;
 kẹle ẹgube nri ono abyajẹ
 mu ẹgbo l'ọnu.
- ⁸ O gogo dukwaru mu ree;
 ọme ee-meru mu iphe,
 mu epfu g'e meeru mu;
 mbụ ẹ Chileke gege
 akabenu nụ mu iphe,
 mu ele ẹnya iya;
- ⁹ mbụ ẹ Chileke gege
 atukpoepho obu iya
 onyo gwee mu uji;
 g'ọ tẹhakpoepho ẹka tẹa
 mu l'ẹhu kẹ paa;
 mee gẹ mu chihu ẹ mgboko.
- ¹⁰ Ọo ya bụ mẹ ọ bukwanuru
 iphe,
 gege anọdu adu mu obu;
 mee g'ẹhu tsokpoo mu
 nụ l'iphe-a,
 l'atakposhi mu
 g'ọtakposhi mu-a;
 noo kẹle mu ta ahajẹduru
 eme olu onye ono,
 dụ nsọ ono.
- ¹¹ ?Bụ ike gunu bẹ mu
 nwekwaduru

k'anọdu elekwadu ẹnya
iphe?

?Mu maru iphe, kpọ-chiru
ndzụ mu ishi ọphu mu
e-pfukwadu k'ata nshi?

¹² Ọkpehu nkemu ?ọ bụ
ọkpehu
agbara-mkpuma?

Tọo anụ-ẹhu nkemu ?ọ bụ
akpọ-igwe?

¹³ ?Mu nwekwaduru ụvo,
mu e-gude yeru onwomu
ẹka
nta-a, a natawaru mu ike,
mu shi nweru-a?

¹⁴ Onye meji atọfu atọfu
gbakpọru g'ọnyà iya
phẹ
anọdu aphuru iya
obu-imemini;
m'o betakpọ ọphu ọ
tsuhedu
Ọkalibe-kangokotaru-nụ
ebvu.

¹⁵ Obenu l'unwune nkemu bẹ e
te gudedu ẹka.

Ẹphe dụ g'oke nggele, mini
tahuru l'ọnanwu;
ọle o -be l'udzumini;
ọ byaa utso tuko ẹkameka
sweta;

¹⁶ mẹ mini, dọru iya nụ,
shi hụkoo ahụko
dazeshihuẹpho;

- ọ bụru iphe, swetaru iya
 nu bu aka-mini-sunoo.
 17 Ọle ọnanwu -chaephọ l'ọ
 tuko bụru sọtukumu.
 Mbụ okpomoku
 -kpoahaephọ;
 ọ tọ duedu ọphu
 a-dụkwadu l'ogba iya.
 18 Ndu ije aparu ụzo phẹ haa
 lashia l'okorobo-egu
 je anodu l'eka ono bụru
 ọla-l'iswi.
 19 Ndu ije ọphu shi ị Tema
 chọru mini ono
 achọcho.
 Ndu ije ọphu shi ị Sheba
 lee ẹnya iya;
 ọ bụru k'iphoro.
 20 Iphere gudewaru phẹ;
 kele eka ephe shi kpọru
 obu yeru be ephe
 rwuru;
 ọphu ọ dudu g'ephe riru.
 21 Unubedua l'onwunu bya
 egoshikwaphọ
 l'o tọ dudu urwu, unu aba.
 Unu humaru iphe, eye ebvu;
 unu tsuaha ebvu.
 22 ?Mu sụjekpooru g'e meeru
 mu iphe-oma?
 Tọo ?o nweru onye mu sụjeru
 g'o gude iphe,
 o nweru je anuru mu
 ụphalazu?

- 23 G'unu bya adzọta mu l'ẹka
 ndu ọhogu mu;
 ọzoo g'unu bya agbafuta
 mu l'ẹka ndu ewebushi
 akurepho.
- 24 Zinaa mu iphe;
 gẹ mu e-dobe ọnu doo!
 Goshinu mu ẹka mu jeberu;
 ọzo kpọ-swehu!
- 25 Lewarọ g'ire-lanụ emebeje
 ẹhuka l'ẹhu!
 Obenu ẹ-a; iphe-a,
 unu epfu-a;
 ?o goshikpọru gụnu?
- 26 ?Bụ mba bẹ unu byaru mu
 abarụ?
 Mbụ-a; ?unu eme g'unu sụ
 l'opfu onye ono,
 ejegbu onwiya l'iphe-ẹhuka
 ono bụ opfu,
 larụ ẹ pherephere?
- 27 Ono dụ-a g'onye aturu
 nwogbee,
 enwedu nna ido;
 bya aburu ere onye unu
 l'iya eshi ọnyà erere.
- 28 Ọle g'ọ dụ nta-a bukwa ẹ-a;
 aswarụ, unu a-swarụ mu
 bukwa g'unu
 lekpoda mu nụ ọphu bụ
 ẹnya;
 kele-a; ?mu a-kabẹhunnu
 nọdu unu l'iphu
 dzụa ụka?

²⁹ Jikonu; unu tūnaa mgbeleke
 nwanshii;
 hanaa eme iphe,
 apfūduru-oto!

Unu ri-phunu ọriri azu;
 kele apfubekoto mu
 dūkwapho g'ọ du.

³⁰ Ọ nweru iphe, apfūduru-oto,
 mu pfuru nta-a?

Tọo ?mu ta akabẹedu maru
 teke mu pfuru ẹjo opfu?

7

¹ Nemadzu ?tọ budu iphe,
 ọ byadoru eliphe,
 bu ese akanya;
 mbu le ndzu, ọ no dūepho
 ge ndzu
 onye e butaru g'o jee ozi.

² Ọ du g'ohu, eje ozi, bu iphe,
 ọonoduje ele ẹnya iya bu
 ge nchi e-me jihu;
 dūkwapho g'onye e butaru
 ozi, bu iphe,
 ọonoduje ele ẹnya iya bu
 ugwo, aa-pfu iya.

³ Ọo ẹgube ono be e meru
 ọnwa l'ọnwa ọdu
 abukotajeru mu ke mmanu.

Iphe, bukpo ẹnyasi ọdu
 abukotajeru mu
 mgburwashị-ẹhu.

⁴ Mu -ze ẹ azẹ; mu echiru

l'oriri sụ:
 ?Mu e-kukpọo mgbenya
 ọwa-a jasụ teke ole?

Enyashi nọdu anọduje akpụ
 onwiya gọlogolo.

Mu nọdu echijeepho
 gburugburu jasụ nchi
 abọhu.

⁵ Inyi tuko mu ẹhu sweta;
 ẹkà nọdu atụ mu rikarika
 l'ẹhu;
 mbụ l'ẹhu mu l'opfu
 kejashihucharu
 ekejashihu;
 ọnyá, nọ iya nụ nọdu atụ
 rikarika.

⁶ Eswe ndzụ mu nọdu agba
 warawara gẹ ngga,
 e gude ekwe ẹkwa;
 mbụ ẹ ndzụ mu eje
 mgbabirishi l'ẹbe adụ iphe,
 mu levuru ẹnya iya.

⁷ Jiko Chileke; nyatakwa ẹ
 ndzụ mu ta adudu
 iphe ọzo,
 ọ bụ gbahaa udzu-ọnu.

Ẹhu ta atsọbaedu mu uto ẹ
 ndzụ mu ọwa-a ọzo.

⁸ Onye hụmaru mu nta-a
 e-mechaa;
 ọ tọo hụmabaedu mu ọzo;
 mbụ l'ii-mechaa chọo mu
 achọcho;
 ọle ị tịi hụmabaedu mu.

- 9 Ọo g'igwe erwuje erwurwu
 gbaka-a;
 Ọ tọo lwabaedu azu-a
 bu g'onye e kpochiru l'ilu
 ta alwajedu azu ọzo;
 10 mbu l'onye ono ta
 alwajebaedu azu l'ulo
 iya ọzo;
 Ọphu unuphu ibe iya
 ahumajeedu iya
 enya ọzo.
- 11 “Noo g'o gude Ọphu mu
 edobedu ọnu doo.
 Mu a-nodu ata kpookpookpo
 ge mu ata-a.
 Mu epfunu iya pho ge mu
 epfu iya-a.
 Mu a-tukonupho g'ooghube
 obu mu gu-gbua l'aphu.
- 12 ?Mu bu eze-enyimu;
 tọo ?mu bu ejo-oke-agiyi;
 k'ophu unu yeru ndu nche;
 a nodu eche mu nche?
- 13 Mu gbẹ arị l'iphe-azee,
 mu zẹ azee e-me g'ehu du
 mu guu;
 mbu l'etemu-anamu mu
 e-me ge nggumaphu
 lwa mu ali.
- 14 Obenu l'i gudede-a ejo nrwo
 eme ge ndzu gu mu;
 bya egude ọphulenyia eye
 mu ebvu;
 15 k'ophu bu l'aswi-gbu

onwonye byaru aka
mu ree.

Anwuhu ka mu ree eme l'udu
ndzu owa-a, mu dzu
nta-a.

¹⁶ Mu ta agubeeduru ndzu mu
iphe;
mbu l'o to dukpoedu mu
g'a su
le mu no ndzu anono ophu jasu
le tuutuutuu le mimiimii.

Pakporu mu pho haa;
le ndzu,
mu no nta-a buwaa
iphe-mmanu!

¹⁷ ?Nemadzu bu gunu ke g'i
meje iya g'o ha shii?

?Ke g'ikpojeru obu yeru iya?

¹⁸ ?Ke g'i lerweje iya enya
elerwe
l'utsu mboku-mboku;
ahu iya ama tekenteke?

¹⁹ ?Tii-kabekpoda wofu mu
enya;
ozoo g'i hakpo mu nu ge
mu no
nwekinyi mu nwanshi
nwanshi?

²⁰ O -buru le mu meru Chileke
iphe-eji;
?mu meru gubedua gunu?
mbu gube onye eche
nemadzu nche.

?Denu g'o gude o buru l'ehu

mu be ɛnya ngu du?
 ?Mu anyiwa ngu ɛrwa to?
 21 ?Dɛnukpoo g'o gude ophu i
 kabɛkpodaa guaru
 mu nvu l'ɛka mu
 meswekpɔoru;
 mbu pawarunu haa
 l'ɛjo-iphe obu, mu eme obu;
 kele o to dukwa
 g'oo-nɔ-beru l'e kpochia
 mu ɛja.
 L'i choo mu nta choo imo;
 i ti hɔmaedu mu.”

8

Onu ke Bilidadu
 1 Toɔbudu iya bu; Bilidadu,
 bu onye Shuwa bya eyeeru
 iya onu su iya:
 2 ?li-pfukpoo udu opfu ono
 pfuberu teke ole?
 Opfu ngu dukwa ge
 pherephere,
 ezi taphutaphu.
 3 ?Chileke ekpeje ikpe
 l'eregede to?
 Okalibe-kangokotaru-nu
 ?ogbanweje iphe,
 pfuru nhamunha?
 4 O kwa iphe-ɛji, unwu ngu
 meru iya
 be o buru phe nggo iya.
 5 Obenu teke o bu l'i gbapfuru

Chileke; mbụ wata arwọ
 Ọkalibe-kangokotaru-nụ
 arwọrwo;

⁶ ọ -bụru l'ị dubebe ree bya
 abụru onye ire-lanụ
 be ọ tọ dudu m'obeta ọ
 bụru nta-a ọphu
 ọo-rikota onwiya gbaaru
 ngu mkpu;
 woru ngu dophu azụ
 l'eka shi rwube ngu nụ.

⁷ Teke ị wataru iya be ọo-du
 nwa mkpeme kpee;
 obenu o -rwua l'iphu be
 ịi-wata aba yoyoyo.

⁸ Jinaa ndu shihawaa nụ;
 g'ephe kọoru ngu iphe,
 shi anwujeru ndiche phe;
⁹ kele anyịbedua bu-a
 unyaphu be a nwuru anyi;
 ọphu ọ dudu iphe,
 anyi mawaru;
 teme ndzu anyi l'eliphe-a
 dūepho ke nwa tsokere.

¹⁰ Ndu ono e-zì ngu-a iphe
 pfua opfu ye ngu lẹ nchị;
 mbụ l'ephe e-gude
 mmamiphe phe saaru
 ngu opfu.

¹¹ Èjì; ?oovuje ogologo eka
 epuchi adudu.

Mbụ-a; eswa, du l'uda
 ?obaje yoyoyo me mini

- adudu l'uda?
 12 Oobujeru;
 o -nodu ezekwadu-a;
 e tee gbudu iya egbugbu;
 ephe akposhihu nku;
 mbu ka eswa akpohu nku
 egwegwa.
- 13 Noo g'oda-pfuje iphe,
 bukpo ndu zoharu Chileke.
 O buru egube ono bu g'ele
 enya iphe
 ndu amadu Chileke alaje
 l'iyi.
- 14 Iphe, o dakoberu aduje
 phuge phuge.
 Iphe, o kpuru obu yeru buru
 udude.
- 15 Teke o dakoberu ugbu
 elwu-elwu iya ono
 l'o rikashihi;
 l'o bya agbaka ya aka;
 o to dudu ophu eme nu.
- 16 O du g'iphe, a kuru l'anwu
 agba iya mini.
 O rwushia irwu ophuú wushi
 ke jashi l'ime mgbabu
 ono;
 17 bya agbaa ogharabvu
 je agbaka l'agbara-mkpuma;
 buru aka ocho bu aka
 du epfu-epfu.
- 18 Obenu teke e pefuru iya
 l'eka ono, o kpuru ono;
 aka ono ajika iya su le ya

teke ahumaswekwaa
ya.

19 G'e lekeberu ɛnya epfu;
ndzu iya anwulwashihu;
iphe, a kuru akuku ozo
eshi l'ali l'eka ono
wata efushi.

20 Mbū lẹ-a; Chileke ta
ajikajekwa onye
adudu iphe, o meru;
ɔphu ɔ bujekwanuru
agbarike onye ɛjo-iphe.

21 Oo-mecha mee;
ɔnu aburu ngu ɔchi ɔchi.

Ogbogboromɔnu ngu aburu
iphe, e-ji iya nu bu
okoo ngu.

22 Ndu ɔhogu ngu be ee-ye
iphere g'uwe;
l'a phokashia ulo-ekwa,
ndu ɛjo-iphe
kweberu buru.

9

ɔnu, Jiobu eye

1 Tɔbudu iya bu;
Jiobu bya eyee ɔnu su:

2 Tororo bu ishi opfu bu lẹ mu
maru l'oo eviya.

Obenu lẹ-a; ?denu ge
gwopya-gwopya iphe-a,
bu nemadzu-a e-me
pfube-eka-oto l'iphu Chileke?

- ³ Onye ọ dū gẹ yẹ Chileke tūa
ya bẹ ọo-jikwa
unu-kuru-unu aji;
ọ tọo zadu g'ọ ka mma
l'ọo nanu.
- ⁴ Ọ maru iphe maghee ya
amaghe;
bya adu okpehu du-ghee
ya adu-ghe.
- ?Bu onye kwefujeru iya ike;
e mecha;
ọ duru iya le ree?
- ⁵ Úbvú bẹ oonwuribẹjeru;
úbvú ta amakpodanu l'e
nwuribẹru iya;
ọ nọdu egudeje ehu-eghu
ghaa ya igharaphu.
- ⁶ Mgboko l'ophu bẹ
Ọonmaghuje anmaghu
mee itso, e gude kpọbe iya
g'o tee kpaakpaakpaa.
- ⁷ Ẹnyanwu bẹ oopfujeru opfu
yeru; l'o chibuhu;
ìphóró, dū le kpokpode bu
iya byanyibotaruru iya.
- ⁸ Ọ buru yẹbedua kpoloko
susu akpaminigwe
g'ọ susu ono;
bya aburu iya bu onye ahaje
okpa l'eli akparamini,
atū l'echi eze-ẹnyimu.
- ⁹ Ọo ya meshiru oke kpokpode
kpokpode,

dugbaa nu;
 mbu kpokpode, bu biye;
 yee orayonu;
 waa peleyadesu;
 mewaro eze kpokpode
 kpokpode,
 noGBaa l'uzo ndohali.

10 Oomeje iphe, du biribiri,
 adudu etu, iya du nu;
 teme iphe-ohumalenya
 nkiya buru aguta aguta.

11 Oobujeru; a -nonyaa
 l'o bya aghata mu;
 mu ta ahumadu iya;
 teke ooje l'iphu l'iphu mu
 ta amadu.

12 O -nata nemadzu iphe;
 ?bu onye a-su iya g'o
 to meshi?

?Bu onye suru g'oo-ji iya su:
 ?Bu gunu be iime egube
 ono?

13 Ehu -nodu egbu Chileke egbu
 be o too selajekwa aka
 azu;
 mbu le ndu ojogu Rehabu
 daru kpurumu
 le mgboru okpa iya.

14 ?Denu ge mu e-jeje ge mu
 l'iya je eme opfu?

?Mu doberu onu l'awe ke ge
 mu l'iya bya
 awata atu ego opfu?

15 O -betakponu ophu o dudu

iphe, mu meru;
 mu te ejekwa iya asarụ
 opfu.

Iphe, mu a-nòdukwapho
 eme bụkwa gẹ mu
 rwonupho yẹbe onye-ikpe
 mu ono g'ọ phụaru mu
 obu-imemini.

¹⁶ Mu -kukpọo ya nụ oku;
 ọ -za mu ọnu bẹ mu ta
 arikpokwanu l'oo-yeru
 mu ọnu.

¹⁷ Ọ oke pherephere bẹ
 oo-gude bya bya egwee
 mu arakabya; bya emee ọnyá,
 tukuru mu ọhu-a ka shii
 l'ẹbe adụ iphe, mu
 meru.

¹⁸ Ọ too kwedu g'unme rwua
 mu ọhu-ẹpho.

Ọ chia mkpawere bẹ oo-gude
 tsụa ndzụ mu ntsụgiji.

¹⁹ Ọ -bụru l'iphe,
 eepfu bụ k'ọkpehu;
 ọ bụ onye ike dụ shii.

Teke ọ bụ k'ikpe;
 ?bụ onye sụru iya eku
 ikpe?

²⁰ Ọ -betakponu ọphu ọ dudu
 iphe,
 mu meru bẹ opfu,
 shi mu l'ọnu anmale
 mu-a ikpe.

Iswi -dụkpoo mu nụ mma;

l'Ọ sụle-a l'ikpe nmaru
mu.

21 A makwaru-a l'Ọ tọ dudu
iphe, mu meru;
ọle mu ta ayọdu ọshi
onwomu.

Ndzu mu dūwaa mu ashị.

22 Mbụ l'Ọ tukuru bụru iphe
lanu;
Ọ bụru iphe ono meru g'ọ
gude mu sụ:

“Oomebyishije ndu adudu
iphe, ephe meru;
yee ndu bu ndu ejo-iphe.”

23 Eze-iphe-ehuka -dapfuta ndu
adudu iphe,
ephe meru;
meahaa g'Ọ pyi-gbua phe;
k'ophu meji tofuharu phe
atofu;
bule-a ọchi be ọonoduje
achi phe.

24 Mgboko dabaru l'eka ndu
ejo-iphe.

O gude eka pyi-chishia
ndu-ikpe iya enya.

Ọ -budu iya eme iya ?buhunu
onye be eme iya nu?

25 “Eswe ndzu mu kakwa onye
maru ọso eme egwa.

Oophegbaepho
phaaphaaphaa
epheghashi;
ophu ọ dudu g'ọ ka mma

- l'ọo nwa ẹhu-utso,
 ha nwanshii, dū iya nū.
- 26 Oochikọtaje būruru chighaa
 g'ugbo,
 e meru l'owa-uda;
 zia phaa zighaa g'ugo,
 ephe ejepfu iphe, oo-ri.
- 27 Mu -sū gẹ mu zọhaa k'agū
 aphū
 bū iphe, mu e-me bū gẹ mu
 gbanwee iphu
 wata anwūja ọnu-ọchi.
- 28 Obenu l'iphe-ẹhuka,
 mu eje bẹ mu
 atsukwadu-a ebvu;
 kẹle mu maru l'ị tị byadu
 ekwe l'ọ tọ dudu iphe,
 mu meru.
- 29 Eshinu a nmawaru mu ikpe;
 ?mu a-yọbahunaa ọshi
 k'ole?
- 30 Ọ tọ dukwa m'obeta mu saa
 onwomu dū g'eberugo;
 bya egude ncha kwọo ẹka
 mu; ọ nọdu ama mma
 31 bẹ ịi-patalẹkwa mu-a chie
 wuu l'ime iduma,
 echi būruru bütubu;
 k'ọphu bū l'uwe, mu yeru
 l'ẹhu bẹ mu a-dụchaa
 ashị.
- 32 Chileke ta bukwa nemadzu
 gẹ mu bụ-a;
 mẹ mu eyekwaaru iya-a ọnu;

mẹ mu l'iya eje edogbabe
iya l'ụlo-ikpe.

- ³³ Ophu o dukwanu onye
egbogbo g'o gbokahu
anyi,
bu onye e-seta anyi l'eka
doshiaru anyi opfu;
³⁴ mbu onye a-nafu Chileke
echachi ono,
owa mu l'ehu g'owa mu
iya-a;
k'ophu ebvu, ooye mu
a-kabe lwa mu ali l'ehu.
- ³⁵ Noo teke mu e-pfu g'onu ha
mu;
mu ta atsuhedu iya ebvu.
Obenu g'o du nta-a be mu ta
adukwa ike epfugbu
g'onu ha mu.

10

- ¹ Anodu ndzu dukwaa mu
enyiru.
Oo ya bu le-a;
ge mu bya evushia
mgburwashị-ehu mu kube;
mbu le mu e-pfugbu epho
g'ooghube mu l'obu.
- ² Mu a-su Chileke: Ta
anmashinu mu ikpe!
Gushichiaru mu iphe,
bu iphe,
isu l'oo ya bu iphe,
mu meru!

- ³ T^oo ?b^ukpoep^ho ip^he,
 d^u ngu ree
 b^u g'i mee mu m^kpawere;
 g'i gbup^hua ip^he,
 i gude e^ka ngu mee;
 o^le idzu, ndu e^jo-ip^he
 chⁱru b^e b^ule-a oⁿu-o^chi
 b^e iⁿwuj^ajeru iya?
⁴ ?B^u eⁿya nemad^zu mman^u
 b^e i nweru?
 Mb^u ?b^u g^e nemad^zu eleje
 ip^he eⁿya b^u g^e
 g^ub^edua eleje?
⁵ ?B^u g^e nemad^zu an^o-bejeru
 b^u g^e iⁱ-n^o-beru?
 Mb^u ?b^u apha ole,
 nemad^zu an^oje b^e
 iⁱ-n^okwapho?
⁶ mb^ukw^anu meru g'o gude i
 n^odu av^okpoep^ho
 ach^o e^ka o deru mu;
 akpa ishi ip^he,
 mu meru ngu e^ji.
⁷ Ole i makwar^u l'ikpe ta
 anmad^uru mu;
 t^eme o^phu o d^udu onye
 a-naf^uta mu l'e^ka ngu.
⁸ Oo ngu gude e^ka ngu mee
 mu g^e mu d^u-a.
 ?Iⁱ-bya aghak^obe nta-a bya
 emebyishie^hukwa mu
 ph^o?
⁹ Nyatakwa l'i kp^uru mu

g'eegudeje ụrwa kpua
iphe.

?Ii-bya bya egwee mu uji
ozo t̄oo?

¹⁰ ?T̄obudu g'aawụje ẹra-eswi-a
bụ g'ị w̄uru mu ye;
bya emee mu; mu daa adada
g'ọhu-manụ?

¹¹ Ị bya eworu akp̄-ẹhu
ȳẹ an̄-ẹhu yee mu
g'onye yeru uwe;
bya egude ọkp̄u ȳẹ
ụmi-ọkp̄u dzepfua
mu nan̄.

¹² Ọo ngu meru; mu n̄du ndz̄u;
t̄eme ị n̄du egoshi l'i yeru
mu obu.

Ọ b̄uru g'i gude ehe mu meru
g'o gude ị n̄du eche ndz̄u
mu nche.

¹³ Ọle i wol̄eru-a iphe-a domia
l'ime ọkpoma ngu;
mb̄u l̄e mu maru-a
l'ọo iphe,
ị t̄uru at̄t̄u dobe l'ime
obu ngu;

¹⁴ l̄e mu -mee iphe-ẹji b̄e
ị-n̄dukpoep̄ho ege mu ngge;
ọphu ịḡujeduru mu nv̄u
m̄e mu meswee.

¹⁵ Ikpe -nmaa mu;
b̄e ọ b̄ukwapho aph̄u
ts̄oru mu!

Iswi -d̄ukpoo mu n̄u mma;

mu ta apalidu ishi apali;
 kẹle iphere dushi mu ike;
 tẹme iphe-ẹhuka,
 mu eje ripyabẹwa mu.

16 Mu -woru ishi ngakobe;
 l'i chĩaaha nta mu g'ẹka
 oduma achị nta iphe,
 oo-ri;
 l'i woru ọkpehu ngu ono,
 dū biribiri ono tukoshi mu.

17 Tekenteke bẹ ìichikobeje
 ndu a-nọdu agba mu ekebe;
 tẹme ì nọdu anọduje avuru
 mu ọvuma.

Ndu ojọgu ngu nọdu atū
 kpereree abya mu etso ọgu.

18 Mbū-a; ?būnaa gūnu meru
 g'o gude i kufuta mu l'ophu
 l'ophu l'ẹpho ne mu?

Ọ dū mu g'a sū lẹ nemadzū
 -byaru ahūma mu ẹnya;
 mu nwūhuwaa.

19 O gege aka mu ree;
 ọme mu ta adūjekpodarunu
 adūdu ophu;
 ọzoo ọme a nwuru mu paa
 mu eli eli jeye l'ilu.

20 Nwujiku olemole, mu nweru;
 ?tọo bvụada?

Wofunu iphu l'ẹka mu nọ;
 k'ọphu ẹhu a-tsọkpo mu
 nwa ililekpọo;

21 tẹme mu alashiwaro ẹka
 bụ: a -laa; a lwagū azū;

ẹka agba ọchii bya adu
 tsukiribaa;
 22 ẹka ẹnyashi nkiya bu
 abali-ishi;
 ẹka bu iphe, du iya nu
 bu tsukiribaa;
 iphemiphe, du iya nu
 ghalashi hu aghalashi hu;
 ẹka nwiphe, du g'iphoro,
 du iya nu du g'eka ọchii
 agba l'ibiya-a."

11

Zofa ebo iya Jiobu

- 1 Tọbudu iya bu; Zofa,
 bu onye Nama bya eyee ọnu su:
 2 Ikpoto opfu ọwa-a a-lakota
 ke mmanu
 g'e te eye iya ọnu to?
 ?Aa-haru onye ọwa-a,
 epfu opfu igwerigwe-a
 enge to?
 3 Tukupu-tukupu-tukupu ono,
 iipfu ono;
 ?ọo-kpo nemadzu opfu
 to?
 ?To o bu i -mecha ndiphe
 sukusuku ono,
 iime phe onoya;
 o to dudu onye agboru ngu
 uja to?
 4 Kele i suru l'iphe, iipfu geru
 asa;

bya asukwapho l'ì d̄ube
ree l'ẹnya Chileke.

⁵ Ọle ọ b̄u; ọ d̄u mu g'a s̄u
lẹ Chileke e-ye ọnu
l'onwiya;
mb̄u saa ọnu pfuru opfu
n̄u ngu;

⁶ mb̄u kpuhaa iphe,
pharu lẹ mmamiphe woru
gheberu ngu ọnu;
kẹle ọkpobe mmamiphe
ad̄uje mkpopfu mkpopfu.

Ọphu ìi-makp̄adaru;
Jiobu; b̄u l'iphe, Chileke eme
ngu ta ahakp̄okwanu
g'ẹjo-iphe, i megbab̄eru.

⁷ ?Ìi-d̄u ike ch̄okp̄oep̄ho
ch̄ofuta iphe, d̄u omilomi,
n̄o l'ime Chileke?

?Ìi-d̄u ike v̄okp̄oep̄ho
v̄ofuta ẹka
Ọkalibe-kangok̄otaru-n̄u
jeberu?

⁸ Ọ kakwa akpaminigwe
ephekerephe.

?Ìi-mekwan̄u iya ime-agma
nta-a?

Ọ dukwapho omilomi ka
alì-maa omilomi;
?b̄u ḡunu b̄e ìi-d̄u ike maru?

⁹ Ogologo b̄e ọ ka mgboko-a
l'ophu ogologo.

T̄eme ọsa iya ka eze-ẹnyimu

phosa phosa.

¹⁰ O -bya nta-a;
bya akpūta ngu tū-chia;
bya ekua ngu ikpe;
?bū onye sūru iya akpōshi?

¹¹ Ophu e-do ngu ẹnya ree
bū l'ọ makōtaru ndu
ẹregede.

Tōo teke o hūmaru ẹjo-iphe;
?ọ dū ngu g'ọ tōo tūbejedu
iya nvọ?

¹² Tọ būchidaa iphe,
ọ bū bū lẹ tẹme onye-eswe
enweru egomunggo
bū mẹ nkafū-igara-ọswa
nwūa nwata-okoro.

¹³ “Ọle ọ bū; i -wowaru ọkpoma
ngu doziaru Chileke
bya amachiaru iya ẹka labọ;
¹⁴ bya atūko iphe-ẹji, dū ngu
l'ẹka hakōta ememe;
ọphu i kwedu g'ọ dūru
ẹjo-iphe, a-dū l'ibe ngu;
¹⁵ noo teke ịi-pali iphu
ephekerephe;
iphere ta adūedu ngu.

L'ị pfūru kẹ kwaragadagangu;
ndzū ta agūedu ngu.

¹⁶ Noo teke ịi-tūko iphe-ẹhuka
ngu zōha-gbua.

L'ọ dū ngu g'ẹgube-a, utso
agbajẹchaa l'o kpofua.

¹⁷ Ndzū ngu abya egbuchafū

bya aka echi eswe agu
 ìphóró.

Ọchii abya agusahuru ngu
 dūepho g'ẹka nchi abọhu
 abọhu.

¹⁸ L'ì kpọo g'abara; kẹle ọ
 dūru iphe, iile ẹnya iya.

L'i leaha ẹnya mgburugburu;
 atutakporo nwunme, ìituta;
 ọ tọ dudu iphe,
 byaru eme ngu nū.

¹⁹ L'ì zẹe azẹe; ọ tọ dudu onye
 byaru eye ngu ebvu.

L'a dū igwerigwe byaahaa
 g'i yeru phẹ ẹka.

²⁰ Obenu l'ẹnya e-mechakwaa
 pyashihu ndu ẹjo-iphe.

Ẹphe a-chọ ọzo agbala;
 ọ tọo dūduru phẹ.

Iphe, ẹphe a-nọdu ele ẹnya
 iya aburu atū-buhu unme.”

12

Ọnu, Jiobu eyeru Zofa

¹ Tọbudu iya bụ; Jiobu bya
 eyeeru iya ọnu sụ:

² A taa tudu iya atutu;
 ọo unu bụ o-pfuchaa-ọ-bvu.

Ọ buru unu lẹ mmamiphe
 a-swị laa.

³ Ọle egomunggo dukwa mu-a
 g'ọ dū unubẹdua.

Ọ tọ dukwa ẹka ẹnya lwawaru

- mu l'eka unu nọ.
 ?Bụ onye ta makọtadu
 iphemiphe ono g'ọ ha?
- ⁴ Nta-a bẹ mu bụwaa iphe,
 ezi ndu mu l'ephe eshi
 ọnyà ọnu-ọchi;
 l'eka mu shikwa ekuje
 Chileke oku;
 l'ọ nụma olu mu.
- Mu bya abụwaru nụ onye
 aachi pfuripfuri
 lẹ mụbe onye pfuberekoto
 bya aburu onye iswi
 dū mma.
- ⁵ Ndu ẹhu dū guu emeje ndu
 iphe-ẹhuka byapfutaru
 sukusuku; sụ l'ọo ẹpho
 onye ẹpurukutu chikọtaru
 abya atụ l'alị bẹ ọobyapfutajẹ.
- ⁶ Ọle ndu abalidebvụ bukwa
 ntusarehu;
 ọphu ọ dukwa onye asuje
 ndu ono sụu,
 bụ ndu anọduje akpatsu
 Chileke iwe;
 mbụ ndu Chileke phẹ bụ
 l'ọbochi-eka phẹ bẹ ọ nọ.
- ⁷ Obenu lẹ-a; unu je ajia anụ;
 ẹphe a-kọru-a unu iphe,
 mu abya epfupfu-a.
- Ọdumeka unu ajia ya ẹnu,
 ephe l'eli; ẹphe a-kọru
 iya unu.
- ⁸ Teke ọ dudu unu abọoru ọja

- yeru alì g'o zia unu iphe.
 Ọzoo unu angabẹ nchì g'ẹma,
 nọ lẹ mini zia unu iphe.
- 9 ?Bụ onye ole lẹ ndu ono,
 mu gushiru ono ta amadu
 l'ọo Chipfu gude ẹka iya mee
 iphe-a, meru nu-a?
- 10 Ọo Chileke bẹ ndzụ
 iphemiphe,
 e meru dobe nokota l'ẹka.
 Ọ bụru l'ẹka iya bẹ unme,
 onyemonye atụ nọ.
- 11 Nchì ?te egejedu iphe,
 ọ numaru egege tọo;
 mbụ ẹgube ono,
 ire edejeada l'iphe, ọnu
 e-ri ono?
- 12 ?Mmamiphe ta abudu l'ẹka
 aahumaje iya
 bụ l'ẹhu ndu kahwaru nu?
 ?Tobudu onye karu nka
 ogologo bẹ iphe edoje
 ẹnya ree?
- 13 Ọo Chileke nwe mmamiphe;
 bya enweru ike.
 ̀dzù yẹ nkwa ẹnya
 bukwarupho nkiya.
- 14 Iphe, ọ lashiru alashi bẹ ọ tọ
 dukwa onye sụru iya
 ekpukwa; ọphu ọ dukwa onye
 sụru atufu onye ọ turu mkpọro.
- 15 Ọo ya bụ; ọ -sephu mini azu;
 alì akpọo jegengu.

Teke ọ gbaharu mini ẹka
l'ọ tuko ẹkameka sọaha
gborogboro l'ali.

16 Ọo ya bẹ ọkphe yee
ọkpobe mmamiphe
du l'ẹka.

Onye a ghoru ụgho;
yee onye ghoru iya ya nu
tuko du yebedua,
bu Chipfu l'ẹka.

17 Ndu akpo-zijeru ndu ọzo ọzo
bẹ ọogbabeje ọkpa ọto
duta phẹ dufu;
tẹme ọ nọdu emeje
ndu-ikpe g'ẹphe buru ndu
egomunggo swehuru.

18 Ndu eze bẹ ọonafuje ọkwa
eze phẹ;
mee phẹ; ẹphe aburu ohu.

19 Ndu bu uke bẹ ọogbabeje
ọkpa ọto duta phẹ dufu;
tẹme ọ nọdu akwatsuje
onye shihawaa ụzenya buru
onye noshiru ike.

20 Ndu e gude ire phẹ ẹka bẹ
oomeje g'ẹphe ta mahẹ
iphe, ẹphe e-pfu.

Tẹme ọ nọdu anafuje ndu bu
ọgerenya iphe,
gege edo phẹ ẹnya ree.

21 Ndu a maru ẹpha phẹ bẹ
ọonmaje phulaphula.
Tẹme ọ nọdu anashije ndu

ọkpehu ụ́ ịke,
 ẹ́phe nweru.

²² Ọ́o ya egoshije iphe,
 ụ́ omilomi, nọ́ l'ọ́chii.

Tẹ́me ọ́ nọ́du ewofutaje iphe,
 gbaru tsụ́kiribaa tọ́gbo
 l'ìphóró.

²³ Ọ́o ya emeje ọ́ha g'ọ́ ha shii;
 tẹ́me ọ́ bụ́kwaru iya phọ́
 emebyishije phẹ́.

Ọ́o ya emeje ọ́ha g'ẹ́phe zụ́a
 azụ́zu ha ọ́sa;
 tẹ́me ọ́ nọ́du ehujekwa phẹ́
 phọ́ adagba nchị́ l'alị́.

²⁴ Ọ́o ya emeje gẹ́ ndu bụ́
 ndu-ishi ụ́nwu-eliphe
 mehu phukunaa.

Ọ́ nọ́du enwujeru phẹ́ ye
 g'ẹ́phe je etsoru
 okorobo-ẹ́gu ghaphee
 l'ẹ́ka gbororo adụ́du.

²⁵ Ẹ́phe -gbẹ́shi;
 ẹ́phe eje etsoru aghaphe
 l'ọ́chii l'ẹ́ka ìphóró
 adụ́kpodaa adụ́du ophu.

L'o mee phẹ́; ẹ́phe akpọ́
 kulakula g'onye mẹ́e atsụ́.

13

¹ Mbẹ́dua gudeakwa ẹ́nya mu
 hụ́makota iphemiphe ono.
 Mu gudewaa nchị́ mu nụ́ma
 iya; o doo mu ẹ́nya.

- ² Iphe, unu maru be mu
makwaru-a.
Enya ta alwakwaru mu l'eka
unu no.
- ³ O le o du mu g'a su le mu
e-pfuru opfu nu
Okalibe-kangokotaru-nu.
Ge mu le Chileke l'onwiya
tu ya.
- ⁴ Obenu l'unubedua gude
ntuphu-ire eme mu
nrwa pomupomu.
Unu bukota mkpokoro ndu
eme obvu g'unu hakota!
- ⁵ O du mu g'a su l'unu
a-tukokpoepho dobe
onu doo; mbu l'ono
gege abukpoerupho unu
mmamiphe.
- ⁶ Unu ngabewaro nchi numa
oke onu mu!
Unu ngabe nchi l'opfu,
shi mu l'onu!
- ⁷ ?Bu unu -nodu epfu egube
ejo-opfu ono, unu epfu ono;
unu asu l'oo Chileke be
unu epfu iya etuku too?
Mbu-a; ?buchakwaa ya pho
be unu epfutura opfu
eregede eregede ono,
unu epfugbaa ono?
- ⁸ ?Unu a-nodu abo nemadzū
ebo etuku iya too?
?Unu eme g'unu yeeru

Chileke oke ọnu iya?

⁹ ?Ọo-dụ-a ree mẹ o -jeshia
unu enyocha?

?Unu a-dụa ike nmaa ya
phulaphula gẹ nemadzụ
anmajẹ nwibe iya-a?

¹⁰ Chileke bafụtajekwaru unu
mba mẹ unu gude mpya
lẹ mpya abọ nemadzụ ẹbo.

¹¹ ?Akpabiri iya ta akabẹduru
eye unu ebvu?

?Ndzụ-agụgu iya ta akabẹdu
gudepyabẹ unu?

¹² Kpaakpaa ono, unu asagbaa
ono bukota ẹtu ẹtu,
wụlahuru lẹ ntụ.

Edodo, unu edo g'unu dofu
iya onwunu l'ẹhu bụru
edo, kwarụ l'ẹpuchi.

¹³ Mbụ-a; unu
nọdukpoekwapho doo
gẹ mu pfua phee onwomu.

Iphe, e-mekpọo mu nụ g'o
mee!

¹⁴ Mu e-tsebe ndzụ mu l'ọnu ẹta;
bya atụa ndzụ mu ntụmatu.

¹⁵ Ọ tọ dukwa m'obeta ọ phua
mu aphụphu;
mu adakobelẹkwa iya-a gẹ
mu dakoberu iya.

Mu a-pfụekwaru iya phọ
l'iphu adzọ onwomu.

¹⁶ Mbụ l'ọ kwa iphe ono

a-buru iphe,
 a-dzota mu nu;
 kele o to dudu onye ta
 atsudu Chileke ebvu
 a-du ike akpafu iya l'iphu.

17 Unu ngabekpoekwapho nchi
 ree numa iphe-a,
 mu epfu-a!

G'iphe-a, mu epfu-a bamikwa
 unu abami le nchi!

18 Le nta-a, mu edowa opfu mu
 ishi ria be mu makwaru-a
 l'aa-gbaru mu odzori.

19 ?O duru onye a-bya apfuru
 pfua iphe, oo-su le mu meru?

O -dwwa nno;
 mu a-takube onu nwuhu.

20 Su-a; gube Chileke;
 menaarū mu iphe labo-a,
 mu abya ngu arworwo-a;
 ge mu ahaa edomi onwomu
 edomi l'iphu ngu!

21 Wofukpoe mu pho eka l'ehu
 ewofu ophu.

L'i haa mu eyephe ebvu ono,
 iiye mu ono.

22 Noo teke bu: i -kua mu oku;
 mu aza ngu enu.

Teke odumeka;
 haa ge mu pfuje epfupfu
 g'i yejeru mu onu.

23 ?Bu emeswe ole ye iphe-eji
 ole be mu mekpooru?

Goshięshikwa mu ęka o deru
mu yęe iphe-ęji, mu meru.

24 ?Dęnu g'o gude ọphu
ịi ghaduru mu iphu;
i woru mu mee onye opfu
ngu?

25 ?Bu mkpęekwo, phęrephere
apa bę ịi-nu chịipfuu?

Tọo ?bu ęswa, a phushiru
l'iphe bę ịi-wata achi ọso?

26 Noo kęle iphe, i deshiru ę
mu meru buchaa iphe,
rwuru mu l'anu-mee;
tęme ị tuko ęjo-iphe,
mu meshiru teke mu bu
okorọbya byabę
mu l'ishi.

27 I chiru mu ọkpa ye ę
mkpọro;
tęme ị nọdu anọduje
enyocha iphemiphe,
mu emekpọo ememe l'ophu;
mbu mechaa mu ọhubama
l'ichirupfu ọkpa;
k'ophu ịi-majeru ęka mu
zọru ọkpa.

28 Noo g'o gude nemadzu nọdu
erwushihuje g'iphe,
rehuru erehu;
mbu ę nemadzu alaję pyętee
g'uwe,
mkpu tapyashiru.

14

- ¹ Nemadzu, nwanyi
 nwuru-a
 be eswe ndzu iya adudu
 igwerigwe.
 Teme o buerupho iphe-ehuka
 bu iphe, jiru iya nu.
- ² Ojataje egwegwa g'okoko;
 l'o buhukwaru iya pho
 anwulwashihu.
 O buru g'ononyo,
 a taa noribejeduru-a
 bu g'o to dudu eka
 oono-bejeru.
- ³ ?Bu egube nemadzu ono
 be iije eworu enya swobe?
 ?li-jeje iya akputa bya g'i
 kpee ya ikpe l'iphu
 ngu?
- ⁴ ?Bu onye suru g'oo-ye eka
 l'iphe, adubebedu ree
 wofuta iya iphe, dubebe ree?
 O to dudu!
- ⁵ Eshinu a guwaru eswe,
 nemadzu a-n-beru ndzu
 ogu doberu iya;
 teme i bya atu-buwaru iya
 onwa ole, o-n- l'eliphe-a;
 bya egoshiwa iya
 g'oo-jebejeru l'eliphe-a;
⁶ wofunu iya enya;
 hanaa ya g'o tusaru ehu;
 jasu l'o jee oke ozi iya

jeghee g'onye e butaru
ozl.

7 Kẹle-a; oshi, bvuru l'alì
nwekwaru iphe,
oole ẹnya iya;
mbu l'e -gbutsua ya
l'oomita ozo l'upfu iya.

Ono, o mitaru k'òphúú
ono abya adzuru ozo.

8 Ogbarabvu iya erehu kwaa
l'ime alì.

Upfu iya anodu l'alì nwuhu.

9 Teke igwe dzeerupho mini
l'o kpọ-futa;
mbu l'o rwua irwu òphúú
g'iphe, a kuru akuku.

10 Obenu lẹ nemadzụ abujeru;
o -nwuhu; nkiya abvu.

O -tụwaa unme ikpazu;
o tọ tūbaedu ozo.

11 Oo g'eze-ẹnnyimu aduje me
mini tabota iya-a;
ozoo g'aguga aguga nggele
aduje nkwagbo-nkwagbo
me o tahu-a;

12 noo gẹ nemadzụ aze-zetaje;
o tọ gbeshibaedu jasụ
teke igwe ta aduhedu.

O tọ byadu agbeshibaa;
ophu e metebaedu iya lẹ
mgbenya ono, turu iya
nu ono.

13 O du mu g'a su l'ii-wotakpọe
mu pho je edomia l'alì-maa;

mbụ kpuchia mu iphe
l'ẹka ono jasụ ẹhu
eghubuhu ngu eghe.

Ọ dū mu g'a sū l'i gege
atụkpoepho sū l'Ọwa-a
g'Ọo-nỌ-beru baa;
tẹme l'i nyatabaa mu.

¹⁴ Mbụ-a; nemadzụ
-nwuhuchaa; ?Ọo-dzuru
ndzụ Ọzo?

Mbụ eswe ujiku olemole-a,
mu eje ozi mkpỌnwu
ẹhu-a bẹ mu gege
angabẹpho g'o rwua
eswe mbỌku, ee-me mu
gẹ mu dū k'ọphúú
k'ọphúú.

¹⁵ Noo teke bụ: i -kua mu oku;
mu aza ngu ẹnu.

Onye ono, bụ ngu gude ẹka
ngu mee ya dobe ono
adụaha ngu ree l'ẹnya.

¹⁶ Noo teke ịi-nọdu agụkwanu
ije mu ọgu.

I tii nyochaekwanu iphe-ẹji,
mu meru.

¹⁷ Iphe, bụkpoo emeswe,
mu mesweru ngu aburu
iphe,
ịi-chiru ye l'ẹda kechia.

L'i woru iphe kpuchia l'iphe-ẹji,
mu meshiru ngu.

¹⁸ Obenu ẹ-a; ọo g'úbvú
anọnya l'o ribashihuaha

eribashiḥu pho;
 o buri g'aanonya l'a
 phofu oke agbara-mkpuma
 l'eka o kpuru pho;
¹⁹ mbu le-a; oo ge mini emeje
 mkpuma l'o chi swacha
 swacha pho;
 teme ochioku-mini nodu
 asochataje eja, no l'ali pho;
 noo g'isotaje iphe,
 nemadzu ele enya iya
 sofukpoepho asofu.

²⁰ Oo ugbo lanu be ikapyabeje
 nemadzu enya l'o buri
 iya atugbu.

L'i mee ya g'o gbanwube
 iphu l'i chifu iya.

²¹ Teke aakwabẹ unwu iya
 ubvu; o to duedu iphe ono,
 duru ophu o makwaduru.

Teke eehu phe adagba-nchi
 l'ali;
 o to duedu ophu
 oohumakwadu.

²² O buwaru iphe, erwuje iya
 l'ehu bu iphe,
 eme iya ehuka l'ehu nkiya.

O -nodu agu aphu l'o guwaru
 iya ro onwiya.

15

Elifazu epfu le Jiobu nmawaru onwiya ikpe

¹ Tobudu iya bu; Elifazu onye

Temanu bya eyee ọnu sụ-a:

- ² Onye maru iphe; ?oopfuje
 opfu, enwedu ishi;
 ọzoo tsukoo okpomọku,
 shi lẹ pherephere
 ẹnyanwu-awawa
 tsụ-jia onwiya ẹpho?
- ³ ?Bụ mkpọkoro-opfu bẹ onye
 maru iphe egudeje
 eye ọnu l'opfu;
 mbụ epfupheẹpho opfu,
 adudu mẹ nanụ, barụ urwu?
- ⁴ Mbụ lẹ gụbedua wokpọerupho
 k'atsụ. Chileke ebvu hua
 l'alị;
 bya akpọshikwapho
 g'e te pfujehẹ nụ Chileke
 epfupfu ophu;
⁵ kẹle ọo iphe-ẹji ngu ezi ọnu
 ngu iphe, oo-pfu;
 mbụ l'ọo ire onye ẹregede
 bẹ i gude epfu opfu.
- ⁶ I gudeakwa ọnu ngu anma
 onwongu ikpe.
 Ọ tọ bụekwa mbẹdua anma
 ngu ikpe.
 Ọ bụru ogbogboromọnu ngu
 agba ngu ekebe.
- ⁷ ?Bụ ngu bụ nwa mbụ,
 e beberu nwụa?
 ?Ọ dụ g'i vu úbvú úbvú ụzo
 nọdu l'eliphe-a?
- ⁸ ?Ọ dụ g'ị nụmaru idzu,

Chileke chiru?

?Tọo ịiri l'ọo ngu maru iphe
nwẹkinyi ngu?

⁹ ?Bụ gụnu bẹ ị maru,
anyịbedua amadu?

?Bụ gụnu bu iphe,
edoje ngu ẹnya,
te edodu anyịbedua?

¹⁰ Ndu ishi buwaa ẹwó ẹwó;
mbụ ndu kahụwaru akahụ
bẹ anyi l'ẹphe nọkwa l'ẹka-a;
mbụ ndu a nwụadaru
tẹme a nwụa nna ngu.

¹¹ ?O dụ g'obu ono, Chileke adu
ngu ono parụ ngu nwanshii
l'ẹnya; mbụ opfu ono,
a tọru nwẹhu rwebe ẹhu
erwebe epfu anụ ngu ono?

¹² ?Denu g'o gude ị haa ọkpoma
ngu g'o duta ngu dufu?

Mbụ-a; ?denu g'o gude ẹnya
nọdu atụ ngu vaavaava
g'ọtụ ngu ono

¹³ kẹ g'i woru ẹhu-eghu ngu
atụ-koshi Chileke;
tẹme opfu, dụgbaa ẹgube ono
shigbaa ngu l'ọnu afushi?

¹⁴ ?Bụ gụnu bẹ nemadzụ bụ kẹ
gẹ ọ bya adubebe ree?

Mbụ-a; ?bụ gụnu bẹ
nemadzụ ono,
bụ nwanyi nwuru iya ono
bụ kẹ g'ọ pfube-ẹka-oto?

- 15 Ọ -buru lẹ Chileke te
 egudedu ire ndu nkiya ẹka;
 Ọphu imigwe adubebedu
 ree l'ẹnya iya;
 16 ʔtọ kadunu ta agube
 nemadzu iphe;
 mbu nemadzu ono,
 adudu iphe, ọ bu;
 teme urwuali ji iya ẹhu;
 teme ọ nọdu angu ẹjo-iphe
 g'onye angu mini?
- 17 Ngaberu mu nchi ree ge mu
 mee g'iphe doghee
 ngu ẹnya edoghe;
 ge mu kọoru ngu iphe,
 mu gudewaa ẹnya mu huma;
 18 mbu iphe, ndu maru iphe
 pfuru togbo iya ẹba;
 Ọphu ọ dudu iphe,
 ndiche phe pfuru phe duru
 Ọphu ẹphe domiru edomi.
- 19 Ndiche phe ono bu phe
 gẹdegede be a nuru ali-a;
 Ọphu ọ dudu onye lwaru
 alwalwa, tuswaru
 l'echilabo phe.
- 20 Su-a; onye ẹjo-iphe
 anọdujekwa atsụ pfupfupfu
 mkpurumkpuru
 jasukpoo g'oo-nọ-beru;
 ndu ewebushi akurepho
 nọdu anọduje
 aghakọtaepho gburugburu

lẹ nwime apha olemole,
e doberu phẹ l'eliphe-a.

21 Iphe, anọduje aphụ iya
gbudugbudu lẹ nchi
bụerupho iphe, eye ebvu.

Teke iphe dukpoo
rengurengu kpọ;
noo teke ndu abalidebvu
abyajẹ ibe iya.

22 Ọ to byadu ekwe lẹ ya a-lwa
ndzụ l'ime ọchii ono,
ọ bahunu ono.

Ọ bụru l'ogu-echi bẹ
oo-mecha laa.

23 Ootsojeru aghaphe achọ ẹka
ya a-kpata nri.

Ọ -nọdu l'ọoji sụ:
“?Bụ awe bẹ ọ nọ?”

Ọ maanaru-a l'eswe,
a-gba ọchii bẹ nọkwa
iya ntse.

24 Ejo iphe-ehuka yẹe iphe-aphụ
abyajẹ abyabẹ iya
ndzụ-agugu l'ẹhu.

Ẹphe anọdu echeru iya
ẹka mgba g'onye eze,
doziru onwiya abya
eje ọgu.

25 Ọ bụru iphe, tukuru iya
kpaa bụ l'ootsuru
Chileke ẹka l'ọkpoma.

Teme ọ nọdu ekoshi ọphoo
l'iphu
Ọkalibe-kangokotaru-nu.

- 26 Oogudeje olu,
 aha kpaakpaa
 agba biribiri etso iya ọgu;
 parụ phosa phosa iphe,
 shihuru ike,
 ya e-gude gboberu onwiya
 l'ọgu, yẹe ya alwụ.
- 27 “A makwarụ-a l'iphu aza
 iya tootootoo;
 Ọ tsụa anụ kẹ nyịmunyimu
 l'upfu;
 28 obenu l'ẹka oo-mecha buru
 bụ mkpụkpu,
 bụwaa ochobu;
 buru l'okorobo ụlo,
 adụdu onye bu iya nụ;
 ụlo, a hawaru; Ọ bụru ikpọzu.
- 29 O too nwehẹduru iphe;
 ọphu ẹku iya a-nọribeduru;
 ọphu iphe, o setarụ eseta
 ejedzuduru alị iya.
 30 Ọ tọo nahụdu ọchii.
- Teme ọ bụru ọku e-mechaa
 kee irwu, o rwuru.
 Chileke a-phụa ya ọnu
 phụkashia.
- 31 G'o to jekwa eme onwiya
 eswe l'akpọru obu ye l'iphe,
 abụdu iphe;
 kẹle ọ tọ dudu iphe,
 oo-rita iya.
- 32 Ọ tọo nọ-rwudu ndzụ l'ishi;
 l'a pfụwaa ya ụgwo iphe,
 oome pfụ-dzua ya ya

apfu-dzu;
 ɔphu ɛkali iya ajadu àjàjà.
 33 Ọo-dụ gẹ vayinu,
 e chikoshiru akpuru iya
 l'ẹbe ọ cha achacha;
 mbụ l'ọo-dụepho g'oshi
 olivu, tuchaaru ige;
 o rishihu;
 34 kẹle iphe, bukpo ndu ta
 atsudu Chileke ebvu
 a-gbakotaru ẹka nwa.
 Ọ bụru ọku e-tsufu ọlo ndu
 yeru obu l'eri ọphalazu.
 35 Ẹgube ndu ono atsutaje
 ime nchọ-kopfu.
 E -mechaa; ẹphe anwua
 ẹjo-ememe.
 Ẹregede dụ phẹ l'ẹpho
 evu evuvu.”

16

Jiobu epfu l'ònyà iya phẹ duru iya ẹhuka

- ¹ Tọbudu iya bụ; Jiobu bya
 eyee ọnu sụ:
² Mu anụmajehaakwa ẹgube
 opfu-a, unu epfu-a.
 Ayọ ọshi k'unu bẹ unu
 gudekwa ayọpyashi
 nemadzu ayọpyashi.
³ Opfu, phẹrephere apa ono,
 unu epfu ono;
 ?tọo bvudu abvubvu?
 ?Bụ gunu bẹ kpatsuru unu
 k'epfu g'unu epfu ono?

- 4 Mbẹdua gege epfukwa g'unu
 epfu ono;
 ọme ọ duru unu g'ọ duru
 mu-a.
 Mu gege anọdukwa epfu
 ẹrengete opfu gude eyeru
 unu ọnu;
 ekweru unu une.
- 5 Ọle mu gege akabẹkwa gude
 ọnu mu ọa unu obu;
 mbu l'oshi, mu gude obu mu
 pho yọoru unu gege
 emekwa g'ẹhu gụa unu phoo.
- 6 Ọle ọ bu; mu -pfua opfu gẹ
 mu epfuhabe;
 iphe, eme mu nu emele
 mu-a l'eka oome mu.
 Teke mu haru epfufu;
 ?bu g'ọ ka mma?
- 7 Mbụ-a; Chileke mewaru;
 ike bvụ mu;
 bya eworu ndibe mu l'opfu
 mee; ẹphe lakota l'iyi.
- 8 O mewaru mu;
 mu gbajoshihuchaa
 agbajoshi.
 Ono buru iphe, ekebe du.
 Awufu, mu wufuru buru
 okpu bukwaru pho iphe,
 agba mu ekebe.
- 9 Chileke gudewaa ẹhu-eghu
 lajashi mu alajashi;
 mu bya adu iya ashi;
 teme o nodu ataru mu

eze nyịkinyiki.

Onye ọhogu mu ono nọdu
agba mu ọnya agbagba.

¹⁰ Ndiphe anọduje ebvu mu
ọnu l'ẹhu.

Teme ẹphe nọdu anọduje
echi mu ẹka ẹ nchị
gude eme mu iphe-iphere;
mbụ tųgba nanụ g'ẹphe
kpọnyia mu ọnya.

¹¹ Chileke nwuwaru mu
yeru ndu ẹjo-iphe;
mbụ-a; o nwuwaru mu ye
ndu ẹjo-iphe l'ẹka.

¹² Ẹhu shikpọkwapho
dụ mu gubala;
ọ bya anyakashia mu tọgbo;
pyịta mu l'ẹkpiri woru mu
hua ehurugehu.

O woru mu mee iphe,
o gude anwụ agba mgbẹka.

¹³ Apfụ iya shi mu l'iphu shi
mu l'azụ ada mu l'ẹhu
pụrumu pụrumu.

Ọphu imemini mu adụkpodaa
ya g'ọosufushi mu meji.

Ọtso-ilu mu nọdu awụ l'ali
kẹ torotoro.

¹⁴ O -gude l'o yeru mu ọru l'o
yekwasẹ mu iya ọzo.

Ọ nọdu azụje mu gburumu
pfurii g'onye ọgbogu.

¹⁵ Mu chitawaru uwe-aphụ

kpube onwomu;
 bya eworu ukuu-ẹnya mu
 nwua l'imime urwuku.

16 Mu rawaru ẹkwa;
 ẹnya chakọta mu ẹ tọroro;
 mbu l'ẹnya gbahukotawaru
 mu ẹ tsukiribaa.

17 O le o to dukwanu
 iphe-kpanganga,
 mu asu le mu mejeru.

Teme epfupfu, mu anọduje
 epfu anu Chileke buru
 iphe, doru risaa.

18 Gube ali; te erikwa mee mu!
 Jiko ge mkpu,
 mu echi ba adamihukwa
 adamihu!

19 Mbu le ntaakponu be
 onye-ekebe mu nokwa
 l'imigwe.

Onye agbaru mu odzori
 anodukwapho
 l'ephekerephe.

20 O ndu mu l'ephe eshi onya
 ekweru mu une.

O le onye mu arakwanu ẹkwa
 ekpu bu Chileke.

21 E gege akabekpoo rwo
 Chileke l'iswi ẹhu nemadzu
 egube ono, nemadzu arwoje
 arworwo l'iswi ẹhu
 nemadzu ibiya ono.

22 "O kwa nwapha olemole
 phoduru;

mu ejeshia iphe-ozo ono,
 bu: mu -jee ya mu ta
 alwabaedu onoya.

17

- ¹ Okpoma ta aduekwa mu
 ree.
 Eswe ndzu mu be e meakwaru;
 o tsu-phu azu.
 Ilu echeakwa mu echeche.
- ² Mbụ le ndu noru mu
 mgburugburu
 bukotaepho
 ndu ekweru mu une.
 O buerupho eka enya mu
 atubaje bu l'aphu,
 ephe akpatsushi mu.
- ³ Natanu mu mkpalaka;
 jiko Chileke;
 kele o to dudu onye ozo,
 suru g'ona mu mkpalaka
 gbahaa gubedua.
- ⁴ I mechiwaru phe ekpa
 egomunggo;
 ophu o duedu iphe,
 edoje phe enya.
 Oo ya bunu l'i tii kwedu
 g'ephe mekpee mu.
- ⁵ Onye jikaru ndu yele iya
 eshi onya l'opfu g'e bua
 ya nggo bukwa unwu
 iya be enya e-mechaa
 nyishihu.
- ⁶ Chileke mewaru mu iphe,

onyemonye gude
atụ phukuku.

Mu bụru onye ndiphe agbụ
Ọnu-mini l'iphu.

⁷ Mu jewaru iphe-ẹhuka jasụ mu
nỌdu aphụwaa ragaraga;
mbụ l'ẹhu mu l'ophu erewa
uphere.

⁸ Ndu obu phẹ gụru ìphóró
bẹ ọ tufuru ẹhu.
Ndu iswi dụ mma swỌlihu
tsoru ndu te emedu
ele Chileke.

⁹ Ọle g'ọ dụhabe;
ndu pfụberekoto
a-bụenurupho onye
ẹphe bụ;
tẹme ndu iswi dụ mma
a-nỌdu akaẹepho ọkpehu
eje.

¹⁰ Obenu l'unubẹdua;
unu bya atụko g'unu ha
nọkobe.

Ọle ọ bụ; mu ta ahụmakwa
g'ọ ka mma l'ọo onye lanụ,
maru iphe lẹ g'unu ha.

¹¹ Eswe ndzụ mu bvụakwaru;
iphemiphe,
mu rịru k'ememe bụakwaa
kẹ mmanụ.

Nokwaphọ g'iphe gụru mu
ẹgu ememe dụkwapho.

¹² L'unubẹdua woru ẹnyashi
kua echi eswe.

Ọ bụru l'ẹka ọchii gbaru
tsukiribaa bẹ ẹphe nọ sụ:
Ha! Ìphóró adụakwanu.”

¹³ Ọ -bụru lẹ mkpakọ unuphu
mu ele ẹnya iya bụ
alì-maa;
ọ -bụru l'ẹka mu e-je agbaa
iphe-azẹe bụ l'ẹka gbaru
tsukiribaa;

¹⁴ Ọ -bụru lẹ mu sụru ilu
l'ọo ya bụ nna mu;
bya ekua ẹkà nene mu;
ọzoo kua ya nwune mu;

¹⁵ ?bụbahunaa gūnu ọzo bẹ
mu e-lebaa ẹnya iya-a?

?Bụ onye a-sụbaa mu l'ọwa-a
iphe,
mu a-nọdu ele ẹnya iya
bụ ọwa-a?

¹⁶ ?Oo-tsoru mu nwuda
l'alì-maa tọo?

Anyi l'iya a-tụko bụru
wurumu l'ilu tọo?

18

Bilidadu abarụ Jiobu mba

¹ Tọbudu iya bụ; Bilidadu,
bụ onye Shuwa bya eyeeru
iya Ọnu sụ iya:

² ?Denukpoo teke ii-pfubuhu
g'iipfu ọwa-a?

G'egomunggo dūnu ngu;
k'ọphu anyi a-maru g'anyi

e-gude eye Ọnu l'iphe-a.

³ ?Denu g'o gude anyi dụ g'anụ
l'ẹnya ngu;
mbụ l'ị tukuru anyi kua
ndu mmanụ?

⁴ Gube nwọphu ẹhu ghutaberu
eghu;
k'ọphu i woru onwongu
labushia nanụ nanụ;
?bụ g'a gbadoru ngu
mgboko l'ophu?

Tọo ?bụ g'e je aphọshiaru
ngu agbara mkpuma
g'ọ tọ dụhe l'ẹka ọ dụ?

⁵ “Sua; ìphóró, dụru ndu
ẹjo-iphe bẹ aa-phụnyikwa;
ọphu ọku iya enwuẹkwa
enwunwu.

⁶ Ìphóró, shi dụ l'ụlo iya
a-bụkwaru ọchii.
Ọku anyịhu l'orọku,
ọ sụ-kuberu onwiya.

⁷ Ọkpa ono, o shi azoje
gbụnyingu gbụnyingu ono
ta adụekwa ike, adụ iya nụ.

O bụru iphe, ọ chịru idzu
ememe e-nwuta iya
tụa kpurumu l'alị.

⁸ Ọkpa, ọ zọru azozo bụ l'ẹka ọ
zọru iya bụ l'ụgbu,
e geru doberu iya.

Teme ọ bụru l'eli igbudu
bẹ ọo-zọ ọkpa.

⁹ Agburu, e kweberu iya a-tu
iya l'ichiripfu ọkpa.

Ọ-tu-gburumu atua ya swi swia.

¹⁰ A turu obu-ali domiaru iya
l'uzo, ooshi;
bya agbabekwaru iya pho
onyà le gbororo.

¹¹ N-yemebvu emeje ge ndu
gu iya l'ekameka, ooshi.

Teme o ndu anoduje etsoe
ya pho purupuru l'iphe,
bukpoo eka o zoru okpa.

¹² Ike shi du iya;
obenu le nta-a be okpuwaa
rigorigo.

Teme eze iphe-ehuka ndu le
mgboru iya kwaberu iya
m'obvu teke oo-da.

¹³ Akpo, du iya l'ehu be
oonoduje atapyashi.

Okpara anwuhu ndu
atukoje iya okpa yee
eka tajishia.

¹⁴ Aa-kputa iya l'okpehu
kpufu l'obu iya,
bu eka o kpuru obu ye;
dube iya eka je enwuru
yeru onye eze n-yemebvu.

¹⁵ O to dudu iphe,
no l'ulo iya ophu eka
iya a-du.

O buru oku nshi-egbe be
ee-woru kpua l'ulo iya.

- 16 Ọo-kpọhu nkụ jasụ
l'ọgbarabvu;
nwụa lwaa jasụ l'ẹkali iya.
- 17 Ọ tọ dudu onye anyatabaa
ya nụ l'eliphe-a;
ọphu oonwehẹdu ẹpha
lẹ mgboko-a.
- 18 Aa-chịfuta iya l'ẹka ìphóró
dụ;
chiru iya je eye l'ẹka agba
ọchii;
mee ya l'ọ chihu lẹ mgboko
mgburugburu.
- 19 Ọ too dobedu nwa;
ọphu o nwehẹdu abubu lẹ
ndu ẹka o shi.
- Ndibe iya ta adụedu adudu
ọphu l'ẹka o bujeru.
- 20 Ndu shi l'ụzo ẹnyanwu-arịba
-bya bya ahuma
g'ọonwuru iya;
ndzụ erwuta phẹ.
- Ndu shi l'ụzo
ẹnyanwu-awawa
-huma iya;
ishi anyia phẹ ẹdzu.
- 21 Hoo haa; nokwa g'ọduje
l'ibe onye eme ẹjo-iphe,
bụ onoya.
- Ọ kwa ẹgube ono bụ g'ọduje
l'unuphu onye amadu
Chileke.”

19

Jiobu epfu g'opfu ono gude erwube iya l'ẹhu

- ¹ Tọbudu iya bụ; Jiobu bya
eyee Ọnu sụ:
- ² “?Unu a-nụkpoo mu aphụ
Ọwa-a,
unu anụ mu ọwa-a jasụ
teke ole?
?Bụ teke ole bẹ unu
e-gweberu mu uji Ọwa-a,
unu gude opfu egwe mu
g'unu egwe mu Ọwa-a?
- ³ Ọwaa kwewaa ugbo iri,
unu kọru mu Ọnu;
ọphu iphere adudu unu ẹka
unu abya mu l'iphu
ẹhuka-ẹhuka.
- ⁴ Ọme ọ bụkpooonu l'ọo eviya
lẹ mu shiswewaru ụzo;
emeswe ọbu, mu mesweru
ọbu bụkwa mu bẹ ọ nọ swiru.
- ⁵ Unu -nọdu etu onwunu
ọphushugbu eje
abyapfuta mu;
bya egude iphe-iphere,
anwuru mu nụ abarụ mu
mba;
- ⁶ unu maẹkwarupho
l'ọ kwa Chileke meru mu ẹji.
- Ọo ya woru ụgbu-egege iya
woru lọ-phae mu
mgburugburu.
- ⁷ Mu chia mkpu sụ l'eemekwa
mu ẹji;

Ọphu ọ dudu onye yeru
mu Ọnu.

Mu chia sụ g'a gbaaru
mu mkpu;
Ọphu ọ dudu onye haru
mu enge.

⁸ Ọo Chileke nọ-chiru mu
uzo gẹ mu ta aghatashi.

Ọ bya emee; uzo,
mu eshi gbakọta ọchii.

⁹ Ọ nafuru mu ùbvù,
e shi akwabẹje mu;
bya eye ẹka kputa mu
okpu-eze, mu shi kpuru.

¹⁰ Ọ tọ dukpoda ọzo,
o to shidu alajashi mu
kẹ tarara tarara jasụ mu
bvụ gẹ mu bvuru-a.

Iphe, mu ele ẹnya l'oo-me
l'ẹhu mu bẹ o phefuaru
g'onye phefuru oshi.

¹¹ Ẹhu-eghu iya bẹ o mewaru;
o nwuhu ọku l'ẹhu mu;
bya aguru mu yeru ndu
ọhogu iya.

¹² Ọjogu iya phẹ nọdu
asọ kpereree abyapfuta mu.

Ẹphe kephee mu ekephee;
bya anọ-pee ẹka mu
bu mgburugburu.

¹³ Ndu mu l'ẹphe bụ nwune
bẹ o bukafuru mu l'ẹphe;
bya emee ndu mu l'ẹphe

shi aswì ọswì;
 ẹ̀phe gbakashìhu.

¹⁴ Ndu mu l'ẹ̀phe bụ ipfu
 gbawa nanụ-nanụ.

Ẹ̀guru ònyà mu phẹ
 zọhashia mu.

¹⁵ Ẹ̀byaa, byaru mu nụ;
 mẹ ndu bụ ohu mu gụa
 mu l'onye lwarụ alwalwa.

Ẹ̀phe nọdu asụje ẹ mu
 bụ onye ọhozo.

¹⁶ Mu -kua ohu mu oku;
 ọ tọo zadu mu ẹnu;
 l'ẹka mu gudekpọkwaa
 ọnu mu rwo ya arwo.

¹⁷ Udzu ọnu mu nọdu
 eshijechaa nyee mu ishi.

Unwune mu gẹdegede
 nọdu ebuhachaa mu ebuha;

¹⁸ mbụ l'unwegirima
 nshì yìchakwa ẹ ndu
 epfutọshi mu nụ.

Ẹ̀phe -huma mu;
 ẹ̀phe achì mu ọchi.

¹⁹ Ndu mu l'ẹ̀phe shi nọdu
 phakuu
 bẹ mu dukotawaa ashì.

Ndu mu yeru obu ghaa
 ọhu meahaa iphe,
 a-tsuru mu nụ.

²⁰ Nta-a ta aduedu iphe,
 mu bụ,
 abudu phulaphula akpọ
 yẹe ojogorogo ọkpu.

Nta-a bụwaa iphe,
 phọduru mu l'Ọnu,
 gege aburu eze bụ
 ẹgbu kpoloko.

21 Unu kabenu phuru
 mu obu-imemini unubedua,
 mu l'unu eshi ọnyà.

G'imemini mu kabenu du unu;
 l'Ọ kwa Chileke chiru
 mu ẹka-a, mu l'iya eme-a.

22 ?Denu g'o gude unu je
 anodu achikwa mu pho
 ge Chileke achị mu?

?Unu teke atajikpoda anu
 mu ẹpho?

23 Ọ du mu g'a su l'iphe-a,
 mu epfu-a be eede edede
 l'ekwo;
 mbu g'a su l'e ebyiru iya
 ebyibi l'ekwo dobe;
 24 l'e gude mkpurukpu-igwe
 dee ya l'eli mkpuma;
 mbu kaa ya akaka l'agbara
 mkpuma g'ọ nwaro ojejoje.

25 Ọle ọphu mu maru bu
 l'onye a-gbafuta mu nu
 no-a ndu;
 l'e -mechakpopho l'ikpazu
 iya be ọo-pfuru-a l'eliphe-a.

26 Le teke e
 mebyishichakporunu
 akpo-ehu mu ọwa-a
 be mu e-gudele-a anu-ehu

mu hūma Chileke.

27 Ọ mbẹdua l'onwomu
e-gude ẹnya mu
hūma iya gẹdegede;
ọ tọ bụdu onye ọzo;
mbụ l'oovukpọo mu
evuvu l'ọkpoma shii.

28 Unu -jee l'asụ:
“?Anyi a-chịhunuru iya gūnu;
l'ẹka ọ bụ iya bẹ iphe-ẹhuka
ono l'ophu shi l'ẹka.”

29 Unu tsụnapho ogu-echi
Chileke ebvu;
unubẹdua l'onwunu;
kẹle oke ẹhu-eghu bụkwa
ogu-echi bẹ oowotajẹru
nemadzu.

Ọ bụru teke ono bẹ unu
a-maru l'ikpe dū.”

20

Ọnu, Zofa yeru

1 Tọbudu iya bụ; Zofa, bụ
onye Nama bya eyee ọnu sụ:

2 Ọ kwa l'egomunggo agbanụka
mu gharaghara meru g'o
gude mu nọdu eye ọnu-a,
mu abya eyeye-a;
kẹle ẹhu te ebvuduru
mu ebvuru.

3 Mbụ lẹ mba ono, mu anụ ono
bẹ iphere iya dū mu.

Ọ bụru iya l'akpali mu eye ọnu.

- 4 Ire-lanụ bu opfu bu l'i maru-a
g'iphe dukpoo e -shi le ndiche;
mbu eshi ophu e meru
nemadzu dobe l'eliphe.
- 5 I maru-a l'onye ejo-iphe be
ehu-utso nkiya abujele-a tsokere;
mbu l'onye amadu Chileke be
ta adudu g'ootebejeru eswa.
- 6 A makwaru-a l'eku-onwonye
nkiya erwuje akpaminigwe.
- O nodu apangobeje ishi
ehuka-ehuka;
k'ophu ishi iya ejeje
asu-pfuru l'urwukpu.
- 7 O le oo ge nshi, o nyiru
anyinyi erekashihuje-a
bu g'oo-rekashihu jasu
l'ojejeje.
- Ndu shi ahumaje iya nu
e-mechaa ajije su:
?O jehunuru awe?
- 8 Oo ge nrw o ephukashihuje-a
bu g'oo-phukahu;
ophu a humabaedu iya
ohumalenya;
mbu l'oo-me phosamu
g'ophulenyaa, a phuru l'enyashi.
- 9 Onye shi humaa iya nu -nonyaa
be o too humahedu iya ozo.
- Okpoku ibe iya ta
ahumabaedu iya enya
ozobaa.
- 10 O buru unwu iya e-mechaa

pfua ndu akpa nri
 ugwo iphe, o meru phe.

Mbu l'ephe e-mechaa gude
 eka phe nu-phuchaa phe
 eku phe ono azu.

11 Okpehu okpehu ono,
 o shi eme k'okorobyia ono
 etsoru iya buru wurumu
 l'ilu.

12 A makwaru-a l'ejo-iphe
 atsoje iya utso l'onu.
 O nodu akpujeru ejo-iphe l'onu;
 gude ire su-mia ya.

13 A makwaru-a l'o to dujedu
 ike haa ejo-iphe g'o je;
 l'o wojeru iya kpuru
 akpuru l'onu.

14 Ole nri, o riru eriri
 e-mechakwanaa nodu
 iya l'epho shiahaa ishi.

Nri obu e-mechaa du iya
 l'ehu g'onye oghu tsoru onu.

15 Noo teke o-gboshi eku ono,
 o shi elwee kawomu
 kawomu onoya;
 mbu le Chileke e-me
 g'epho iya tuko iya nwashia
 g'o ha.

16 L'o wata ericha onu-mini
 oghu.

O buru ire, oghu meru
 nmeremu e-mechaa
 kp-nyia ya enya.

- 17 Ọ-sọ-gborogboro ono taa
 adụedu iya k'ele ẹnya;
 mbụ nggele ono, bụ iphe,
 agba iya dẹredere bụ
 manụ-ẹnwu yẹe mini
 ẹra-eswi ono.
- 18 Iphe ono, o seru akanya
 iya ono bẹ oo-mecha
 nụ-phu azụ;
 o too ridu iya l'ọnu.
 Urwu, dabarụ iya lẹ nghọ,
 ọ gbaru ta atsọhedu iya uto.
- 19 Iphemiphe ono bụru opfu l'o
 mewaru ndu akpa nri
 mkpawere woru phẹ
 tọgbo mgbegere.
 O yeru ẹka nata ndiphe ọlo,
 ọ tọ kpuduru.
- 20 Hoo haa; eshinu ọ tọo
 nmapfujeduru anmapfuru
 l'eme ụghoro bẹ ọ tọ
 dụkwa iphemiphe ono,
 agụ iya nụ ono duru ọphu
 oo-nweru;
 ọphu ẹku iya adzọkwanu iya.
- 21 Ọ tọ duedu iphe, duru iya nụ,
 bụ iphe,
 oo-gude ria gwọo-gwọo.
 Eku iya ta adụkwa ẹka
 ọo-nọ-beru.
- 22 Ọo teke ọ nọ eri g'ọ dụ iya
 bẹ ọla-l'iswi atụje iya l'ụpfu;
 mbụ aphụ asọru kpulakpula
 bya asọ-kputa iya ishi.

23 Ēpho -bya eji iya;
 Chileke at̄ukoepho oke
 ēhu-eghu iya byab̄e iya l'ishi;
 chīe ya ph̄o gbaa-gbaa.

24 Teke o ketarū ōso nah̄u
 mgb̄o-ígwè;
 ap̄f̄u, e kweru l'onirubvu
 eguru iya l'okpurukpu.

25 L'ò bya ephefu iya
 l'okpurukpu iya;
 mb̄u ph̄efu iya mpȳipyi
 iphe-ígwè ono,
 charū ōku gbarara ono
 l̄e meji.

Ndz̄u-aḡugu emee ya omeliwe.

26 Ēku iya l'ophu ab̄uru iphe,
 k̄uru l'òchii.

Ōku, e nweziduru enwezi
 enwulihu woru iya
 kepyash̄ia tsupyash̄ichaa
 m̄e nwa ndu ph̄oduru l'ulo
 iya.

27 Akpaminigwe l'ophu at̄uko
 ējo-iphe,
 o mek̄otarū kpuhaa ghebe
 ōnu.

Al̄i agbalihu gbaa ya ekebe.

28 Mini abyaa utso bya ekpota
 ̄ulo iya;
 mb̄u ō-gba-gborogboro
 mini a-bya mb̄oku,
 Chileke a-t̄u-koshi iya
 ēhu-eghu iya.

²⁹ Noo egube obunggo,
Chileke ebuje ndu ejo-iphe;
teme o buru okiphe,
Chileke gude eka iya
keru nu phe.

21

Jobu epfu ge ndu ejo-iphe ababeje uba

- ¹ Jiobu bya eyee onu su:
² Unu ngabekwa nchi
ree l'opfu-a, mu epfu-a.
G'ono bukpoorunu obu unu
du mu iya.
³ Unu takpopho nshi haa ge
mu pfughee.
Mu -pfuchaa; unu emeahawa
mu ro sukuuku obu.
⁴ Aphu, mu agu; ?bu nemadzu
be mu aguru iya?
?Denu eka mu e-gude taa nshi?
⁵ Unu lee mu enya ree;
huma l'unu a-kpo beru.
Unu woru eka hua l'onu.
⁶ Qobujeru; mu -rinyaa iphe-a;
ndzu aguaha mu;
ehu aphukota mu
kpaakpaakpaa.
⁷ ?Denu g'o gude ndu ejo-iphe
nodu anoduje ndzu;
kaa nka; ephe aburu ndu
ike du?
⁸ Ephe anodu huma;
unwu phe ekofutachaa

bya ebuchaaru shihu ike
 nọ-pee phe mgburugburu.
 Epe anodu gude enya phe
 humachaa nwanwanwaranwa
 phe nno kwapho.

⁹ Unuphu ibe phe adakota jii;
 o to dudu ndzu-agugu,
 adu iya nu; ophu Chileke
 echidu phe echachi.

¹⁰ Oke-eswi ibe phe eyeepho
 eswi ime l'o rwuberu iya.
 Eswi phe ono atsuepho ime eje;
 o to dudu ophu ekwo nwa.

¹¹ Epe anodu azushi unwu
 g'ikpoto aturu.
 Unwegirima ono -teru ebvu
 shia ekiya-a;
 epe eteru iya shia ekiya-a.

¹² Epe egude ogumogu gude
 une agu ntumatu.
 Epe eme emereme egbu opu
 eye iya.

¹³ Epe eria gwogwoo;
 tusaru ehu jasu g'ephe
 a-nọ-beru.

Mboku, epe a-nwuhu;
 epe anwuhuepho le
 nchi-odoo.

¹⁴ Epe asuje Chileke g'o paru
 phe haa;
 l'o to gudu phe egu amaru
 uzo iya.

¹⁵ Epe asu: ?Bu onye be

Ọkalibe-kangokotaru-nụ bụ
kẹ g'ẹphe jeeru iya ozi?

?Bụ ụnu bẹ ẹphe erita l'epfu
anụ iya?

16 Ọphu ẹphe amadụ l'ajàjà,
ẹphe jàru ta abudu phẹ
bẹ o shi l'ẹka.

Noo ẹka mu gude ọphu mu
ayidu l'idzù, ndu ẹjo-iphe
achi.

17 Ọle ọ bụ; ?ọ dụkpooru teke
aaphunyije ọku ndu ẹjo-iphe?

?Ọ dụkpooru teke eze
iphe-ẹhuka abyapfutajẹ phẹ;
bụ iya bụ obunggo ono,
Chileke egudeje ẹhu-eghu
bua ono?

18 ?Ọ dụkpooru teke aanonyaje;
ẹphe adụ g'ẹswa ọkponku,
a kuberu l'ẹka pherephere ezi;
mbụ ẹphe adụ g'ẹswa ereshi,
oke pherephere ezikashi?

19 A sụkwaru lẹ Chileke
ewojeru iphe, o gogo me
nemadzụ doberu unwu iya.

Ọle ọ bụ; g'o wojeru iphe ọbu
mee onye meru iya nụ;
k'ọphu onye ono a-maru
l'ọola ụla iphe, o meru.

20 G'o gude ẹnya iya hụma
ọla-l'iswi, a-byapfuta iya nụ.

G'oke ẹhu-eghu
Ọkalibe-kangokotaru-nụ

tukokwaru iya l'ishi.

²¹ Kẹle nwa ọnwa olemole,
a nuru iya l'eliphe-a -bvụwa.

?Ọ kpakwadụ ishi ndu
ọ haru l'eliphe mẹ ọ tọwaa azu?

²² Sụ-a; ?Ọ duru onye suru
g'oo-zi Chileke mmamiphe;
eshinu ọ bụ iya ekpeje ndu
kakọta shii ikpe?

²³ A -nonyaa; nwoke
agbakwohu nwụhu;
onye ẹhu dū guu;
ọphu ọ dudu iphe,
atsụ iya l'ẹhu;
²⁴ onye ẹhu dubebe nwa
pukalapukala;
umi tsuru iya l'okpu.

²⁵ Onye ọzo ejekpọepho
iphe-ẹhuka tẹme l'ọonwuhuje;
mbụ l'ẹhu teke atsọ-swee
ya ụtso.

²⁶ E -mechaa l'a tuko phẹ libe
l'alị;
ẹkà atuko phẹ ripyabẹ.

²⁷ Iphe, unu arị dokwaru mu
ẹnya ree;
mbụ iphemiphe ono,
unu gude ọriri kpakọo bo
mu onoya.

²⁸ Unu pfuru sụ: ?Bụ awe bẹ ọlo
oke amadụ nọhunu;
mbụ ọlo ono, ndu ẹjo-iphe
shi bugbaaru onoya?

29 ?Unu teke aji-swekpoo ndu
ije aji?

?Unu teke atoo-swee nwehu
gbua igo l'iphe, ephe gude
onu phe akoo?

30 Su l'oke iphe-ehuka byaru oha;
ophu o dudu iphe,
o meru onye ejo-iphe.

Chileke bya atoo-koshi ndiphe
oke ehue-eghu iya;
ophu o dudu iphe,
o meru onye ejo-iphe.

31 ?Bu onye apfujeru iya l'iphu
gbaa ya iphe, oome?

?Bu onye apfuje iya ugwo iphe,
o meru?

32 Eelije iya l'ilu lirwee elirwe.

A gbenu eche ilu iya echeche
g'oo too du iphe, e-me iya nu.

33 Eja, shi lee nsuda a-du iya ree
l'ehue.

Ndiphe l'ophu awu etso iya l'azu;
teme ndu ophu bu aguta
aguta vuwaru iya uzo
wuru jeshia.

34 "Su-a; ?bu mkpokoro opfu
ono, unu epfu ono bu obu,
unu nodu adu mu iya nta-a
too?

Kele iphe, bu onu, unu eye ta
adukwa iphe, du iya nu,
abudu uka be unu adzushi."

22

Elifazu ebo iya Jiobu ọzo

¹ Tọbudu iya bụ; Elifazu onye
 Temanu bya eyee Ọnu sụ-a:

² ?Bụ Chileke bẹ nemadzụ
 abarụ urwu?

Mbụ-a; onye maru iphe;
 ?ọo-bakpọru iya nụ urwu?

³ ?Bụ ụdu ẹhu-utso gụnu bẹ
 oo-meru nụ
 Ọkalibe-kangokotaru-nụ
 m'ọ bụru l'ị bụ onye
 pfulberekoto?

?Bụ gụnu bẹ oo-rita iya;
 ọme ọo kẹ g'a sụ l'ọ tọ
 dudu uta, dū ngu l'ẹhu?

⁴ ?Bụ l'ị bụ onye atsụje iya
 ebvu bẹ ọobaru ngu
 mba iya?

?Bụ iya bẹ o gude kua ngu
 ikpe tọo?

⁵ Ọo ẹjo-iphe ngu pakpọoru
 ẹka apaa.

Iphe-ẹji, iimeshi bụ aguta aguta.

⁶ Mkpaleka, iipfu g'unwune
 ngu naa ngu te nwekwa ishi.
 Gube onye atọtaje ndiphe ẹkwa,
 ẹphe nma l'upfu gbabẹ
 phe ọto.

⁷ Onye ike bvuru bẹ i ti
 chebeduru mini.

I parụ nri domiaru onye ẹgu
 agụ g'o to ri iya.

- 8 Ọle ì bụkwa oke amadu,
 nweru alì ẹka ngu;
 bya aburu onye aakwabẹ
 ùbvù buru l'alì ọbu.
- 9 Ụnwanyi, ji phẹ anọedu
 -gbapfuta ngu l'i chiphu
 phẹ azu; gbabẹ phẹ ẹka ọto;
 tẹme ì nọdu emeje g'ike
 bvụ ndu enwedu nna.
- 10 Ọo iphe ono meru g'o gude
 a gbaa ọnyà gbaphee
 ngu mgburugburu.
- Ọtulupfu, eye ngu ebvu nọdu
 atsu ngu l'ẹhu.
- 11 Ọo iphe ono meru g'o gude
 ẹkameka gbahụkota ngu
 ọchii; k'ọphu ọ tọ duedu
 iphe, ìihumaje.
- Ọ bụru iphe ono meru g'o gude
 utso gbawa gbamia ngu.
- 12 Ẹka Chileke nọ bụkwa ẹka
 kachaa ephekerephe l'imigwe.
 Hụmawaro gẹ kpokpode
 nọ-be ephekerephe!
- 13 Ị gbẹ sụ: “Chileke ?ọ maru
 ole?
 ?Ọogbeje l'ẹka agba ọchii
 ẹgube ono ekpe ikpe?
- 14 ?Mbụ l'oke urwukpu
 sọpyaberu iya;
 k'ọphu ọ tọo hụmajedu
 anyi ẹnya m'ọ nọdu
 aghaphe lẹ mgbaka igwe

yẹe aji.”

15 ?Bu ọzo, ịi-nọdu eshi bu
akahụ ọzo ono,
bu ọzo, ndu ẹjo-iphe tọru?

16 Ndu ono bẹ a
kpọ-kwofukwaru
akpọ-kwofu;
ẹphe laa teke o teke
agbadu phẹ k'alala.

Ukporo-mini bya avua phẹ
l'ogbarabvu.

17 Ẹphe sụ Chileke: “Paru anyi
haa!

?Bu gụnu bẹ
Ọkalibe-kangokotaru-nu
e-me anyi?”

18 Ọle ọ kwa iya vukoru iphe,
du ree vujia ọlo phẹ evuji.

Noo ẹka mu gude ọphu mu
ayidu l'idzù, ndu
ẹjo-iphe achi.

19 Ndu pfuberu-ẹka-oto
ahumaje iyi, yiru phẹ
nu tee ẹswa.

Ndu iswi du mma achia phẹ
ochi sụ:

20 Tororo; ndu ohogu anyi
bẹ a kabekwa mebyishia.

Ọku tsuakwaru ẹku phẹ.

21 Sụ-a; woduruphọ onwongu
sẹe asẹe l'ẹka Chileke;
k'ọphu gụ l'iya a-du lẹ ree.

Ọo ya bu g'oojehuru ngu.

²² Natadupho anma okwa,
shi iya l'onu.

Woru opfu iya doo giriri
l'okpoma ngu.

²³ L'i -lwaphuta azu
lwaphuta
Okalibe-kangokotaru-nu
be oo-dophu ngu azu
l'onodu ngu.

I -tuko ejo-iphē, du l'ibe ngu
woshikota;

²⁴ bya eworu mkpola-ododo
ngu l'ophu rwua le nu;
mbu tuko mkpola-ododo
Ofi ngu je achiru ye l'ogba
g'o buru mkpuma
no le mini;

²⁵ noo teke
Okalibe-kangokotaru-nu
a-buru mkpola-ododo ngu;
buru mkpola-ochaa,
kakota ree, i nweru;

²⁶ noo teke
Okalibe-kangokotaru-nu
atsaha ngu utso;
l'i paliaha iphu lee Chileke.

²⁷ Teke ono be ii-pfuru nu
Chileke; l'o numa olu ngu;
teme l'i mekwaaru iya pho
iphe, i kweru ukwe iya.

²⁸ Ii-toje okpa iphe; l'e mee ya
g'i toru iya.

l'phoro abya aduru ngu l'uzo,

iishi.

- ²⁹ Teke e wozeru nemadzū alī;
 ī -sū g'e wolia onye ono eli;
 Chileke adzōo onye ono,
 e wozeru alī ono;
³⁰ mbū l'ōo-dzō ndu iswi
 adūdu mma.

Ọ bŭru iphe, oo-gude dzōo
 phẹ bŭ lẹ gŭbedua
 l'onwongu dŭ chīriri.

23

¹ Jiobu bya eyee Ọnu sŭ:

- ² Ntanŭ Ọwa-a bẹ aphŭ,
 mu agŭ erwukwa mu lẹ
 meji.

Ẹka Chileke anyīlekwa
 tŭdúú l'ẹhu mu l'ẹka mu
 atsŭkpokwaa ude-a,
 mu atsŭ-a.

- ³ Ọme mu makpōoru ẹka mu
 a-chō-vu Chileke.

Ọ dŭ mu g'a sŭ lẹ mu a-dŭ
 ike jerwua ẹka o bu;
⁴ mẹ mu apfŭru iya l'iphu
 pfua g'ooghu mu;
 mẹ mu l'iya atŭe ya phō
 jasŭ mu epfugbua g'o
 jiru mu Ọnu.

- ⁵ Noo teke mu gege
 amawarŭro iphe,
 o gogo yeru mu Ọnu;
 mẹ iphe,
 oopfū edokwanaa mu

ẹnya.

⁶ ?Oo-gude ike-ọkpu gẹ mu
l'iya kpegba ikpe ọtọ?

Waawakwa; o togọ dukwa iphe,
o g'aguru nū mu l'onoo iphe,
mu meru.

⁷ Ọo l'iphu ẹka ono bẹ onye
pfuberekoto gege apfuru
kọoru iya iphe,
atsū iya l'ẹhu;
mẹ ọ dzọo mu l'ẹka
onye-ikpe mu;
mu enweru onwomu jasū
l'ojejoje.

⁸ Obenu lẹ g'ọ dū nta;
mu -chọo ya shia ọzo
ẹnyanwu-awawa;
mu ta ahumadu iya;
teke mu chọru iya shia ọzo
ẹnyanwu-ariba;
mu ta ahumakwa iya phọ.

⁹ Ọ -nọdu lẹ ndẹgu eje ozi iya;
mu ta ahumadu iya.

Teke ọ shiru ọzo ndohali;
mu ta ahumakpoda ya
rọ ahuma ophu.

¹⁰ Ọle mbẹdua ta adukpoda
ọzo, mu shiru, ọ madu.

Ọ buri iya bu ọ -huchaa mu
ama;
mu amaaha mma gẹ
mkpọla-ododo.

¹¹ Ọkpa mu etsoekwapho ẹka ọ
zọru ọkpa purupuru.

Ọ bụekwapho ụzo,
 ọ tọru bẹ mu tsoru;
 ọphu mu ahajekwaru iya
 shiahaa ụzo ọzo.

12 Iphe, ọ sụru g'e meje bẹ mu
 teke ahaswekwaa ememe.

Opfu, shi iya l'ọnu bẹ mu
 kakwa agube iphe
 eme le nri, mu erije
 mboku-mboku.

13 Obenu l'ọ pfuru akatakpa
 ẹka iya;
 tẹme ʔbụkwanu onye sụru
 iya akwachị ụzo?

Ọo iphe, dū iya ree ememe
 bẹ oomeje.

14 Ọ chīru idzu mee iphe,
 dū iya ree l'ẹhu mu.

Ọ chībakwaaro ẹgube idzu
 ọno igwerigwe
 woru kwachiaru onwiya.

15 Ọo iphe ọno meru g'o gude
 ọ nọdu abụjeru;
 mu -nọdu l'ẹka ọ nọ;
 ndzụ agushi mu ike.

Teke mu ritaru iya;
 ndzụ aguhaha mu.

16 Chileke mewaru mu;
 meji nọdu emewaa mu
 pheripheri;
 mbụ le
 Ọkalibe-kangokotaru-nụ
 yewaru mu ebvu.

¹⁷ Ọ tọ bụdu ọchii, l'agba nụ
 meru gẹ mu dobe Ọnu doo;
 mbụ ọchii ono,
 tųkoru mu iphu
 rachia ono.

24

Umere ndu ẹjo-iphe

¹ ?Bụ gūnu kparū iphe,
 Ọkalibe-kangokotaru-nū
 te edobejedu mbọku,
 oo-kpe ikpe?

Denu g'o gude ndu maru
 Chileke nọdu anọduje
 ele ẹnya
 ẹgube eswe mbọku ono;
 ọ tọ dudu ọphu ẹphe
 ahuma?

² Mkpuma a kpọberu gude
 kpaa oke alị bẹ amadū
 aphọribejeru.

Ẹphe nọdu echecha eche
 aturu, ẹphe rwutaru l'iphuru.

³ Ẹphe nọdu achifuje
 nkapfu-igara nwogbee;
 bya anatajẹ nwanyi,
 ji iya anọedu oke-eswi
 iya l'itumo.

⁴ Ndu ukpa bẹ ẹphe
 achiribejeru l'uzo;
 tẹme ẹphe nọdu akpatajẹ
 gẹ ndu akpa nri domishia
 onwophẹ.

⁵ Ọo gẹ nkapfụ-ìgara-ọswa
etsojeru echiẹgu aghaphe-a
bụ gẹ ndu ụkpa etsojeru
aghaphe achọ ẹka ẹphe
a-kpata nri.

Ọ bụru l'okorobo-ẹgu bẹ
ẹphe akpatajẹru ụnwu
phẹ nri.

⁶ Iphe, bụ mkpakọ nri,
ẹphe erije bụ iphe,
ẹphe tsoru ọma ẹgu kpata
l'akpa.

Tẹme ẹphe nọdu ejejechaa
akpa ọbu eje iya l'ẹgu
ndu ẹjo-iphe.

⁷ Eshinu ẹphe enwedu uwe
bẹ ẹphe agbajẹru ọto zẹe
futa utsu.

Oyi -tsua g'ọ tsuhabe;
ẹphe te nweduru iphe,
ẹphe e-gude kpuchia
onwophẹ.

⁸ Igwe -wata edze eze mini;
mini, shi l'úbvú ono
anmaa phẹ; ẹphe adụ shẹgele.

Ọ bụru l'agbara mkpuma bẹ ẹphe
ejeje anmakoru;
kẹle ọ tọ duedu ẹka ọzo,
ẹphe a-gbaba je ekpuru.

⁹ Nwa, enwedu nna bẹ a nataru
ne iya teke ọngukwadu ẹra.

Ndu akpa nri bẹ a naru ụnwu
phẹ opfu l'ẹphe ji ụgwọ.

- 10 Eshinu ẹphe enwedu uwe
 bẹ ẹphe agbajẹru ọto tsoru
 aghaphe.
 Ẹgu anọduje eme phẹ;
 ẹphe evukwaru iphe,
 e meberu l'opfu evulata.
- 11 Ẹphe anọduje lẹ mgbabu
 olivu mee manu olivu.
 Ẹphe abya akua mẹe-vayinu
 kuta; l'ogogu phẹ;
 ẹphe te ededu iya ire.
- 12 Ude, ndu anwuhu anwuhu
 atsu bẹ adashi ike lẹ mkpukpu;
 teme maa ndu e mekaru
 iphe nọdu echi mkpu
 achọ onye e-yeru phẹ ẹka;
 ọphu ọ dudu onye Chileke
 angajẹru nchi l'iphe, oopfu.
- 13 O nweru ndu ọphu kpọru
 ìphóró ono ashị.
 Ẹphe ta amadu ọzo iya amama
 ophu;
 ọphu ẹphe eshidu gbororo
 iya ililekpọo.
- 14 Ọobujeru;
 ẹkameka -gbahuepho ọchii;
 mgbugbumadzu agbalihu
 je egbua onye ukpa yee
 onye adudu g'ọ du iya.
 Ọ buru l'enyashi bẹ
 ọonoduje apya g'onye-oshi.
- 15 Ọzo bu l'onye eri ogori
 bu iphe, ọonoduje ele ẹnya

iya bụ nchi-ejihu.

Ọriri iya aburu:

“Nta-a bẹ mu maru l'ọ tọ
dudu onye hụmaru mu nụ!”

L'ọ woru iphu mee g'a ta hụbe
iya ama.

¹⁶ Ọo l'ọchii bẹ ndiphe ejeje
etsufua ụlo nwibe phẹ bahụ.

Teke o beru l'eswe;
ẹphe agụ-chia onwophẹ
uzo nọdu;
noo kẹle ìphóró aduje
phẹ ashi.

¹⁷ L'ẹhu nkephẹ g'ẹphe hakọta
bụ ọchii,
agbashi ike bụ nchi-abọhu
nkephẹ.

Ọ bụru n-yemebvu,
nọ l'ọchii bẹ ẹphe l'ẹphe
eshi ònyà.

¹⁸ “Obenu l'ẹphe bụ ụphu-mini,
tukoru l'eli mini.

Oke-alị phẹ bẹ a turu ọnu;
k'ọphu ọ tọ dudu onye
agba ọkpa l'ẹka ẹphe
kọru opfu.

¹⁹ Ọo ẹgube ono, okpomọku
yẹe anwụ erwubashije
aka-mini-sunoo-a;
bụ g'ilu anọduje alwuko
ndu emeje iphe-ẹji.

²⁰ Ẹpho ne phẹ eworu phẹ
zọhaa.

Èkà akpaa phẹ nri l'ẹhu.

Ndu ẹjo-ememe ta adùkwa
onye anyatajẹ phẹ nù.

Ọ kwa g'aagbakwoshije oshi-a
bù gẹ aagbakwotajẹ phẹ.

²¹ Ụnwanyi, ta aṭṣudu ime ỵẹe
ndu ọ̣phu enwedu nwa
bẹ ẹ̣phe egudeje azu
onwophẹ;
ọ̣phu ẹ̣phe apḥujeduru
ụnwanyi, ji phẹ aṇọ̣edu
obu-imemini.

²² Obenu lẹ Chileke egudeje
ike iya ḷọo ndu nweru
ike phèlèphèlè.

A makwaṛu-a l'ẹ̣phe ang̣ujeru
anguru l'eliphe-a;
obenu l'ẹ̣phe ta amaj̣edu
?ẹ̣phe a-ṇodu ndẓu ṭọo
ẹ̣phe ta adẓudu.

²³ Ọpajekpokwaaru phẹ ṛo
haa g'ẹ̣phe ṭuta unme;
ẹ̣phe ṇodu ṭuzowaruro ẹ̣hu;
ọ̣le ẹ̣nya iya ḍuẹpho l'iphe,
ẹ̣phe eme.

²⁴ E -mee g'e kuliru phẹ eli;
a -ṇọ̣ep̣ho nwansḥi;
ẹ̣phe ephukaḥu.

L'a bya ekuzetaḳp̣o phẹ aḷi;
onwu eworu phẹ gbua
g'oogbuje ndu ọ̣zo.

L'e gbua phẹ g'onye egbu
ishi akpe.

²⁵ Teke ọ̣ bù l'ọ̣ ṭọ ḍudu gẹ

mu pfuru ono;
 g'onye a-gba mu iya nū
 gbawa mu iya rọ.
 G'onye ono byawarọ apfuru
 sū l'iphe-a,
 mu epfu-a ta adudu iphe,
 ọ bụ!”

25

Bilidadu epfu l'ọ tọ dudu
 onye pfuberekoto l'iphu Chipfu

- ¹ Tọbudu iya bụ; Bilidadu,
 bụ onye Shuwa bya
 eyeeru iya ọnu sū iya:
- ² “Ọo Chileke bẹ aburu
 ishi dū l'ẹka;
 tẹme ọ buri iya bẹ ọha
 l'ophu gbaru g'ẹphe
 tsuje ebvu.
 Oomeje gẹ nchị dū doo
 l'ephekerephe.
- ³ ?Bụ onye adu ike aguta
 ojogu iya l'ogu?
 ?Tọ bụ onye bẹ ìphóró,
 shi iya l'ẹka te erwudu
 l'ẹhu?
- ⁴ ?Denu g'eeshi gẹ nemadzu
 buri onye pfuberekoto
 l'iphu Chileke?
 ?Denu g'eeshi gẹ nemadzu,
 nwanyi nwuru buri
 onye dube ree?
- ⁵ Ọ -bukpoorunu l'onwa te

echizidu echichi;
 Ọphu kpokpode egbudu
 nw̄inwii ree l'iphu iya;
 6 ʔbũchia nemadzũ, bũ
 ẹkà-alì bẹ ọ gũberu iphe;
 mbũ nwa, nemadzũ nw̄uru,
 bũ mgbashiride bẹ ọ bũ?”

26

Jiobu epfu gẹ Chileke habe shii

¹ TỌbudu iya bũ;

Jiobu bya eyee Ọnu sũ:

² Lewarọ ẹgube mkpu,
 ìgbaru onye adũdu ike,
 dũ iya nũ!

Lewarọ ẹgube g'i gude dzọo
 onye ẹka tsuhuru mẹ!

³ Lewarọ ẹgube ẹguru idzu,
 ì ch̄iru nũ onye amadũ iphe;
 mẹkpoo iphe, dũ omilomi,
 ì ch̄ifutachaaaru ghebe ọnu.

⁴ ʔBũ onye pfubuderu ngu
 iphemiphe ono,
 i pfukọtaru ono?

ʔBũ unme onye gbẹ ngu l'Ọnu
 pfua ya?

⁵ Ndu nw̄uhuru anw̄uhu bẹ
 ndzũ-agũgu mekwarũ;
 ẹphe nọdu aphũ kparìkpari;
 mbũ ndu maa,
 bu lẹ mkpula mini;
 mẹ ndu ọphu bu iya l'ime.

⁶ Alì-maa gbakwa ọto l'iphu

Chileke.

Ọla-l'iswi ghekwaruṣpho ọnu
l'iphu iya.

⁷ Akpaminigwe, nọ l'isheli bu
iya gbaru iya ogodo dobe;
ọphu ọ dudu l'eli iphe,
ọ tukoberu iya.

Mgboko-a l'ophu be o meru
dobe;
ọphu ọ dudu l'eli iphe,
ọ tu-koberu iya.

⁸ Oke mini bu iya kpukoru
iya dobe l'urwukpu;
ọphu urwukpu
agbawashihujedu.

⁹ Ọo ya phu-chiru atatiphu
aba-eze iya;
mbu woru urwukpu nkiya
phushi iya l'eli.

¹⁰ Okoke, bu enya-erwu be
ọ togbowaru l'eli eze-mini.

Ono buru okoke, ọ kparu
doberu iphoro ye ọchii.

¹¹ Ọobujeru ọ -baa mba; itso,
gude igwe anmaa jijijii
tsuhu ebvu.

¹² Ọo ike nkiya be o gude mee
g'oke-enyimu deru yekete.

Ọ buru mmamiphe iya be o
gude gbu Réhabu.

¹³ Ọo unme be ọ turu atutu;
akpaminigwe nọdu ama
ntumatu ono.

Teme ejo-agwo ono,

akpụ wuruwuru ono bụ
iya nmafuru iya ẹpho.

¹⁴ Sụ-a; iphemiphe ono hachaaru
bụru iphe, oomeje;
ọle ụdu iya ta adudu ẹka o
jeberu.

Ọle ọ bụ; ike iya ono,
adajẹ g'egbigwe ono;
?bụ ono sụru g'oo-do
iya ẹnya?

27

¹ Jiobu nọdu epfukwarọ
iphe, oopfụ eje. Ọ sụ:

² Eshinu Chileke nọ ndzụ g'ọ
nọ iya-a;
mbụ onye ono,
te ekwedu haarụ mu enge;
bya abụru yẹbe
Ọkalibe-kangokotaru-nụ ono,
meru g'obu mu gbua ire l'iphe,
atsọ ilu.

³ Eshinu ọphu ndzụ nọkwadu
mu l'ime ililekpọo.

Unme, Chileke kuru nụ mu
nọdu eshijekwadu mu
l'imi akpụshi;

⁴ bẹ mu ta abyakwa egude
ogbogboromonu mu
pfua ẹjo-opfu;
ọphu ire mu ọwa-a abyadụ
epfu iphe, bụ ẹregede opfu.

⁵ Tụswekwa! Mu ta abyakwa

ekwe l'iphe,
 unu epfu bụ ọkpobe-opfu;
 ọphu mu abyakwa l'ekweta
 l'iswi ta adudu mu mma
 jasụ mu anwuhu.

⁶ Apfubekoto mu ono be mu
 e-gudeshiepho gẹ mu gudeshi
 iya; ọphu mu abyadu aha iya
 ahaha ophu;
 ọphu ẹkpa-egomunggo mu
 abyadu abaru mu mba
 jasụ gẹ mu a-no-beru.

⁷ Sụ-a; gẹ ndu ọhogu mu
 dukwa gẹ ndu ẹjo-iphe du.
 Gẹ ndu mu du ashị dukwa gẹ
 ndu apfubeduru ẹka ọto.

⁸ Lẹ-a; ?bụ gunu bẹ onye
 amadu Chileke elekwadu
 ẹnya iya mẹ ọ chihuwa;
 mbụ mẹ Chileke wofuwa
 ndzụ iya?

⁹ Egube onye ono bẹ Chileke
 ta angajekwaaru nchị l'olu mẹ
 oke iphe-ehuka byapfuta iya;

¹⁰ ọphu
 Okalibe-kangokotaru-nu
 adujeekwa iya ree;
 ọphu ọ bukwa tekenteke
 bẹ ọora-kuje Chileke.

¹¹ Gebe gẹ mu bya egoshi
 unu g'ike du-be Chileke;
 mbụ l'uzo ke
 Okalibe-kangokotaru-nu

ono be mu te
edomikpodaanu edomi.

12 Eshinu unu humakotawaru
iphe ono l'onwunu;
?denuhunu g'o gude unu ndu
epfuhunu opfu, enwedu ishi
owa-a?

13 Nokwa egube obunggo,
Chileke ebuje ndu ojo-iphe;
teme o buru okiphe,
ndu iwashi eketaje l'eka
Okalibe-kangokotaru-nu
bu onoya.

14 O to dukpoda g'unwu
iya a-habe l'otu;
iphe, no swiru phe nu
bu l'aa-phu phe teterii.

Awa iya ta abyakpoda
ahumaje nri, suru phe
eriri.

15 O buru ojo iphe-ememe be
e-gbushi awa iya ndu ophu
wafuru nu; ophu unwanyi,
ephe haru l'ulo-maa aradu
ekwa phe.

16 A makwaru-a l'o kparu
okpoga kube l'ikpo
l'ikpo g'onye kuberu aja;
bya anmaa uwe kube g'onye
kuberu aja-ulo;
17 obenu l'uwe ono, o kuberu
ono bu ndu pfuberekoto
e-mechaa yee ya.

Ọ bụru ndu iswi dị mma
e-mechaa kee okpoga
phẹ ono.

18 Ụlo, ọ kpuru dobe dule-a
phuge phuge g'ẹka
udude kweru;
mbụ l'ọ dị gẹ nwobu,
onye-nche kpuru nọdu.

19 Ọ zẹ azẹe onye nweru iphe;
ọle ọ tọo zẹbaekwanu iya.

Ọ -bya asa ẹnya ta adụedu
iphe ono ọphu
ọohumakwadu.

20 Ndzụ-agụgu asọpyabeje
iya g'onye mini sọpyaberu.

Oke pherephere nọdu abyajẹ
ezikọta iya l'enyashi.

21 Pherephere, shi l'uzo
ẹnyanwu-awawa apatajẹ
iya pamihu;
a taa humabaedu iya;
mbụ l'oozikọtajẹ iya
pafukpoe ya phọ l'ibe
iya apafu ophu.

22 Ọotuje iya gbaagbaa;
imemini iya ta adudu l'ẹka
ọogbalaru ike iya.

23 L'oochi iya ẹka gbaagbaa;
l'ọophuru iya
swooswooswo gude
zikọta iya zifu l'ibe iya.

28

- ¹ Sụ-a; ẹka eebvutajẹ
mkpọla-ọchaa dụ.
- Úzú, aakpùje mkpọla-ododo
dụkwapho.
- ² Ígwè bụkwa l'alì bẹ eebvutajẹ
iya.
- Ọ bụru akpaga bẹ eegudeje
meta onyirubvu.
- ³ Mbụ lẹ nemadzụ bvuwaru
ọchii omilomi omilomi;
bvurwukpọepho ẹka alì
kachaa omilomi;
ẹka ẹphe achọ iphemiphe
ono l'ime alì.
- ⁴ E shi l'ẹka nemadzụ bu ebubu
l'eli alì
bvua ọgba omilomi
omilomi;
bvurwua ẹka ọkpa teke
azọbeswee ililekpọo;
nọdu l'omilomi ẹka ono,
adụdu onye nọ iya nụ ono
akụ eregede akụ akụkunvu.
- ⁵ Ọ bụru alì ono, bụ iya bẹ
eemefutajẹ nri ono bẹ
e jerwuru je ekwongaa
ya;
ọ nọdu enwu phuruphuru
g'ọku.
- ⁶ Ọ bụru agbara-mkpuma,
nọ l'ime ẹka ono bẹ mkpuma,
bụ sáfayà shi.
- Nshì mkpọla-ododo dụ

I'urwuku shi iya etsushihu.

- 7 O tọ dudu ẹnụ, eri anụ,
 pheswetajewaru ụzo
 ibiya ono;
 ọphu ivu amadụ iya ụzo.
- 8 Anụ-ẹgbudu -kua onwiya
 g'ookuhabe;
 ọkpa iya ta atudu l'ẹka ono;
 ọphu oduma ejedu iya
 akpa nri.
- 9 O bụru nemadzụ gude ẹka
 iya egbukposhi igbangu
 igbangu mkpuma ono;
 ebvulitajero úbvú ebvulita
 gha igharaphu.
- 10 O okukposhi mkpuma
 atọ owere eje;
 shi nno gude ẹnya
 tükokpoo ẹku ẹku,
 dukota iya nụ humachaa.
- 11 Oogudeje ẹja nwuchia ẹnya
 mini ẹka nggele eshije
 asọ asoso; l'o jee je
 ewofuta iphe,
 e shi domia edomi bya
 atọgbo l'ebederebadara.
- 12 Obenu ẹ-a; ?bụ awe bẹ
 aa-humakwanu
 mmamiphe?
 ?Bụ awe bẹ nkwařenya
 bukpoo?
- 13 Nemadzụ ta adujedu
 ike makotaru gẹ

mmamiphe erebe ire;
mbụ l'ọ tọ dudu onye
maru iya nụ l'eliphe-a,
e bu ebubu-a l'ophu l'ophu.

¹⁴ A jiru ogbu-mini; ọ sụ l'ọ
tọ dukwa l'ime iya.

Oke-enyimu sụ: Ophu ọ
dukwa ophu dụ l'ime
nkemu.

¹⁵ Mkpọla-ododo, kakọta ama
mma be e tee gudekọtakwa
azu iya; ọphu aatukwanu
aswa iya eyeru
mkpọla-ọchaa.

¹⁶ A taa zụ-butadu iya le
mkpọla-ododo Ofi;
ophu e gudedu mkpuma
ónìkùsù ọzoo sáfàya
azu-butu iya;

¹⁷ ọphu a tudu iya eyeru
mkpọla-ododo ọzoo
mkpuma, aphụ ngerengere;
ophu e gudedu iya
agbanweta

unwu-erengete-iphe,
e gude ọkpobe
mkpọla-ododo meshia;

¹⁸ ọphu e jedurọ epfu ke
l'eewota mmamiphe
atu eyeru mkpuma koralu;
yee mkpuma jiásupà;
mbụ l'aswa mmamiphe
kakwa aswa mkpuma

rubi shii;
¹⁹ Ọphu e wokwaru֫pho
 mmamiphe atu֫beru
 mkpuma to֫pa֫zu֫,
 shi l'al֫i Kushi;
 ọphu e gudedu mkpola֫-ododo,
 du֫ebe ree azu֫ iya.

²⁰ ʔBukwanu awe be
 mmamiphe shi?
 Nkwamena ʔbu aweya be
 o bukpoo ebubu?

²¹ Ono be e domiru g'ọ to
 du iphe, dzu ndzu
 a-huma iya nu;
 mbu l'e kpuchiru iya
 ekpuchi g'ena ta
 ahuma iya je akpachaa l'enu,
 ephe l'eli.

²² Ola-l'iswi ye ọnwu
 l'onwiya tukoru su-a
 l'ephebedua bukw
 tafutafu iya rwuru
 phe nchi.

²³ Ọo Chileke maru uto iya.
 Ọ bu ru iya kpoloko maru aka
 o bu ebubu;
²⁴ kele ọo ya be enya erwuje
 l'aka eliphe jeberu;
 teme ọ no du atukoje
 iphemiphe,
 no igwe le mkpula
 humakota.

²⁵ Teke o meru ike nu

pherephere;
 bya atua mini atutu dobe;
²⁶ teke o turu ekemu dobe
 l'owa-a g'igwe e-gudeje
 edze mini;
 bya atoo gbororo togboru
 ire egbigwe;
²⁷ noo teke o leru mmamiphe
 enya tua onu iya.

O bya apfubeshia ya ike bya
 aha ya ama;
²⁸ bya asu unwu-eliphe-a:
 Atsu Nnajiuphu ebvu bukwa
 iya bu mmamiphe.
 Ajika eme ejo-iphe,
 buru nkwaanya.

29

¹ Jiobu nodu epfukwapho
 iphe, oopfu eje. O su:
² O du mu g'a su l'onwa l'onwa
 ono, chiwaru nyihu ono
 a-lwaphutagbaa azu;
 mbu mboku le mboku ono,
 bu teke Chileke shi anoduje
 eche mu nche ono;
³ teke oroku iya shi asujeru
 mu l'uzo ishi eke paapaapa.
 Mu shi egudeje iphoro iya
 ghaa eka ochii agba.
⁴ Su-a; teke ono,
 iphe shi ejehuru mu;
 noo teke eshi onya mu le
 Chileke shi abujeru iphe,

jiru ụlo mu bushihu.

⁵ Teke ono bẹ
 Okalibe-kangokotaru-nụ
 shikwadu swiru mu eswiru.
 Ụnwu mu nọ-pee mu
 mgburugburu.

⁶ Teke ono bẹ ụzo, mu eshi shi
 akwoje teretere g'a wuru
 iya mini era-eswi.

Agbara-mkpuma nọdu
 anwuru mu shokoshoko
 anwushi manụ olivu.

⁷ Teke mu jeru l'onu-abata
 mkpukpu;
 bya eje gẹ mu nọdu l'eka
 ibe mu nọ l'oma edupfu;
⁸ bẹ unwokorobyia
 humaru mu bya etochiru
 mu.

Ndu bu ogerenya wu-lihu
 pfuru apfuru.

⁹ Ndu-ishi daa ikpigbi;
 bya eworu eka dee l'onu.

¹⁰ Onu kporu ndu a maru epha
 phe opfu.

Ire nyakuru phe l'akpo.

¹¹ Iphe, bukpoo onye numaru
 eka mu epfu opfu goru mu
 onu-oma; teme ndu humaru
 mu nu jaa mu ajaja.

¹² Iphe, kparu iya nu buru le
 ndu ukpa, raru g'a gbaaru
 phe mkpu bẹ mu shi
 agbajeru mkpu.

Nokwapho gẹ mu shi adzoje
 unwu-ogbee, enwedu nna;
 ophu ephe enwedu
 onye gbaaru phe mkpu.

13 Onye ala l'iswi shi agojeru
 onu-oma nu mu;
 teme mu shi emeje g'obu
 nwanyi, ji iya anodedu
 gu ebvu ehu-utso.

14 Apfubekoto nkemu be mu shi
 yee g'onye yeru uwe.

Ikpe, pfuru oto buru mu
 awurukpata uwe mgbalanu;
 yee okpu, mu kpu l'ishi.

15 Mu shi buru enya,
 ndu atsu ishi gude aphu uzo;
 bya aburu okpa,
 ndu eniyeni gude eje ije.

16 Ndu no le mkpa be mu shi
 buru nna phe.

Mu shi agbajeru onye mu
 amadu odzori.

17 Ndu ejo-iphe be mu shi
 anyakwashije agba;
 nata phe ndu ephe
 tabewaru eru eme
 g'ephe tagbua.

18 Mu shi dobesukpopho le mu
 a-zekpopho l'ulo mu nwuhu.

L'apha, mu a-no l'eliphe-a
 a-du igwerigwe g'aja,
 no l'ali.

19 Mu shi dobesu l'ogbarabvu

- mu a-jakpɔepho bahu
l'ime mini.
L'iji a-nɔdu akwa putuputu
l'eli ekali,
mu jakashiru
mkpurumkpuru;
20 L'akpabiri mu a-duɛpho
ɔphúú ɔphúú l'ime mu.
Apfu mu adukwapho
ɔphúú ɔphúú nɔdu mu l'eka
jasu l'ojeje.
21 Ndiphe shi anɔduje anga
mu nchi l'olu g'ephe
nwuta iphe.
Ephe shi adaje gbɛɛ ngabɛ
nchi l'idzù, mu achiru phe.
22 O shi abujeru; mu -yewaa
onu; ɔ tɔ dudu iphe,
ephe epfubaa ɔzo.
Opfu mu ejeɛpho gurumaa
gurumaa abahu phe
le nchi.
23 Ephe shi anɔduje kwaberu
mu g'onye kwaberu
yɛgeyege mini;
tɛme ephe shi anguje opfu
mu g'onye angu mini
ishi-apha.
24 Mu -nwujaaru phe onu-ochi
obu ejizeta phe.
Ephe lee mu enya l'iphu;
ephe ajakerehu.
25 Oo mu shi anɔduje egoshi

phẹ ụzo;
 tẹme mu shi bụru eze phẹ.
 Mu shi asụgajeru g'ẹka eze
 sụgaru l'echilabọ ndu
 ojọgu iya phẹ.
 Mbụ lẹ ndu aphụ tsọru bụ
 mbẹdua shi aduje phẹ obu.

30

- ¹ Obenu lẹ nta-a bẹ ẹphe
 achiwaa mu ọchi;
 mbụ ndu mu bụ ọgerenya;
 ndu bụ ẹgube ndu mu gege
 enwujeru nna phẹ ye
 g'ẹphe lẹ nkuta,
 echeru mu ẹku tuko zẹe.
- ² ?Bụ urwu gụnu bẹ ọkpu ẹka
 phẹ barụ mu;
 eshinu ike adụedu phẹ?
- ³ Ẹphe anọduje eje
 phururugbada eje eje
 l'enyashi lẹ mgbegu
 alị ọkponku;
 ẹka ejeka dụ phẹ;
 tẹme ẹgu nọdu eme phẹ.
- ⁴ Ẹphe etsojeru ime ẹgbudu
 akpakọ ẹkwo,
 atsọ únú-únú ata.
 O bụru ọgbarabvu oshi,
 amishije ẹkali g'ẹza bẹ
 ẹphe avutaje ata.
- ⁵ Ndu-a bụ ndu a chiru achichi
 g'ẹphe ta anoshi

l'ẹka nemadzu ibe phe nọ.
A nọdu atụ phe ụzu g'ẹphe bụ
iphuru.

⁶ E kebutaru phe;
ẹphe je eburu l'oma nggele,
mini tahuru; buru ẹ
mgbaka agbara mkpuma;
mbụ ụtubuku ime ali.

⁷ Ẹphe anọduje l'ime ẹgbudu
l'ẹka ono ara mimimi
eme kwopfukwopfu ẹ
mkpula irwu l'ẹka ono.

⁸ Ndu bụ ndu mmanụ;
bya aburu ndibe ndu
enwedu ẹpha;
ndu e chiru ẹchachi gude
chifu ẹ mkpukpu.

⁹ O bụru ẹgube ndu ono bẹ
unwu phe gbẹ nta-a
wata mu aguru ebvu
phuahaa mu iphu.

Mu bya bya aburu iphe,
ẹphe gude atụ phukuku.

¹⁰ Mu dụ phe ashị;
ẹphe nọdu anọduje
akpa mu ụzenya;
ọphu ẹphe ezeje ẹdu ezeze
agbụ tųphakwa l'iphu mu.

¹¹ O bụru iphe, kparụ iya nụ bụ
ẹ Chileke tųshiwaru
udo mu;
bya eyewaa mu ọru;
ọphu ọ dųedu iphe,

ẹphe asọje nsọ k'anọdu mu
l'iphu mee.

12 O bụru l'ẹkutara mu bẹ
ụnwu-ogbolanu ono
eshije abya mu ọgu.

Ẹphe agbakashia ọnyà
dobegbaa
l'ẹka mu a-zọ ọkpa;
bya ekephee mu
mgburugburu.

13 Ẹphe tochishia ụzo mu;
bya emekpọepho jasụ
ẹphe mebyishia mu;
ọphu ọ dudu g'ọ ka mma
l'ọo onye lanụ,
gbaru mu mkpu.

14 Ẹphe nọdu asọ kpereree
eje abya;
awụ gbütugbutu;
eshi ụzo, dụ l'igbulọ
mkpükpu ono,
ẹphe tsukpọshiru ono
eje abya.

15 Ndzụ rwuta mu; nwubvu,
e shi akwabẹje mu
bẹ a chiru ọso.

O phekashihu g'iphe,
pherephere pataru.

Ẹku mu phukashihu
g'ẹka urwukpu
phukashihuru l'igwe.

16 Nta-a bẹ ndzụ mu eribufuwa.
Iphe, zuru mu gburumu

pfurii buwaa eswe
iphe-ehuka.

17 Enyashi anoduje anyapyashi
mu okpu.

Eka-iphe-nu-mu ono,
anoduje ata mu kwaramu
kwaramu ono l'anodujeepho
ata mu nno mkpurumkpuru.

18 Chileke gude okpehu iya
lokota uwe mu nmaa
erupfureru;
bya eworu mbedua l'opfu
tsupfua ge mu atsupfuje
olu uwe mu-a.

19 O paru mu chie l'ime epuchi.
Mu nodu l'eka ono;
o woru mu gwee arakabya.

20 Mu chiku ngu le mkpu gube
Chileke;
ofhu i yeduru mu onu.

Mu gbalihu pfuru apfuru;
o bukeru-a enya be i
leru mu kpoloko.

21 I bya aghaaru mu iphu
bya eworu mu mee
omeliwe.

I gude ogboro eka ngu,
ha ntumatu eme mu
omeliwe.

22 I palia mu ephekerephe
woru mu tularu
pherephere.

I nodu apanga mu g'onye
oke pherephere apanga.

23 Mu makwaru-a le i kpwa
mu ala maa.

I kpwa mu ala eka ono,
e doberu iphe,
bu onye no ndzu.

24 Su-a; o to dukwa onye
ahumajechaa onye ike
bvwaru bya ejeshia
ya echi iphe.

L'eka oochi ojileka togbo l'iphe,
eme iya nu.

25 ?O kwa le mbedua shi
abujeru; mu -huma
onye eje iphe-ehuka;
mu araaharu iya ekwa?

?Mu te eshidu abujeru;
mu -huma onye ukpa;
meji awashihu mu
awashihu?

26 Obenu le mu leru enya iphe,
du ree;
o buru ejo iya be mu
humaru.

Mu lee enya l'iphoro a-duru
mu;
o buru ochii tukoru
ekameka gbachia.

27 Iphe, asworishi mu ime ehu ta
adudu teke ononyaje
haa mu asworishi.

O buepho l'oo eswe
iphe-ehuka turu mu swiswia.

28 Mu tsoru aghaphe;
gbachihuchaa agbachihu;

Ọp̄hu ọ b̄udu l'ọo
 anw̄u chiru mu;
 mu gbachihu ọbu.

Mu pf̄uru l'echi edzudzu-ọha
 chia ojilẹka-tọgbo.

²⁹ Mu bya bya ab̄uru nwune
 nk̄uta-ọswa.

Ọ b̄uru mu lẹ mgbashi-ujiku
 asw̄i ọswi.

³⁰ Akp̄o ẹhu mu jihuwaru
 nchi aswash̄ihuwaa
 aswash̄ihu.

Ẹhu n̄odu enwu mu
 phuruphuru erekuta an̄u.

³¹ Ogumogu, mu shi akp̄oje
 b̄uwaa mu aph̄u.

Ototo, mu shi aph̄uje
 b̄uwaru erwubvu.

31

¹ Mu l'ẹnya mu pfuru iya
 gbaa ya ndz̄u lẹ mu ta abyadu
 ele nwamgboko ẹnya k'ejepfu;
² kẹle-a; ?b̄u ḡunu bẹ
 nemadz̄u e-keta l'ẹka Chileke,
 bu l'igwe?

?B̄u ḡunu b̄u iphe,
 Ọkalibe-kangokotaru-n̄u,
 n̄o l'ephekerephe nweru,
 a-dasweru nemadz̄u?

³ ?T̄obudu ndu ẹjo-iphe bẹ
 ọla-l'iswi d̄uru.

Eze iphe-ẹhuka d̄uru ndu te
 emedu ree?

⁴ ?Tọ hụmaduru ụzo, mu eshi?
Tọo ?tọo gụdu ntụ ọkpa mu
ọgu?

⁵ Ọ -bụru ọ mu tsoru iphe,
abụdu iphe;
ọzoo ọ mu gude ọkpa
mu-a chipyabe iphe,
abụdu ire-lanụ;
⁶ mbụ-a; gẹ Chileke tịwa
mu rọo l'iphe,
ọotùje ndu ire-lanụ;
g'ọ hụma l'ụta ta adụdu
mu l'ẹhu.

⁷ Sụ-a; ọ -bụru ọ mu
shiswejeru ụzo;
ọzoo ẹnya mu duphujeru
ọkpoma mu ụzo;
ọzoo ọ mu yejeru ẹka l'iphe,
dụ ẹji;

⁸ Ọo ya bụ gẹ ndu ọzo
rikwa iphe,
mu kọberu l'alị;
tẹme g'iphe, mu kuru
akuku bukwaru iphe,
ee-pheshi epheshi.

⁹ Mbụ-a; teke ọ bụ l'o nweru
onye nwanyị,
mebyijeru mu ọkpoma;
ọzoo ọ mu jejeru ngge
l'ibe obutobu mu;
¹⁰ Ọo ya bụ gẹ nyee mu
bukwaru onye e-mechaa
ejeru onye ọzo ozi;

teme gẹ yẹe nwoke ọzo
 watakwa akwakwa;
¹¹ kele ọo egube iphe ono
 gege aburu iphe-ẹji,
 iphere iya gege adu.

Ọ buru iya bu iphe,
 gbaru g'e kpee mu ikpe iya.

¹² Ono bukwa oku, etsujewarọ
 tsurwua ali-maa.

Ọ buru iya gege ekegbushi
 iphe, mu gege akpata l'egu.

¹³ Su-a; ọ -buru l'ohu mu lanu
 byaru echia mu le mu meru
 phe iphe, eghu phe eghu;
 ophu mu eyeduru phe onu;
¹⁴ ?mu e-mebaa gunu me
 Chileke tsoahaa mu opfu?

?Bu gunu be mu e-pfufe me a
 su ge mu bya epfua g'ọ
 nwuru mu l'iya?

¹⁵ ?Tobudu Chileke meru mu
 ye l'epho ne mu;
 meru yebedua?

?Tobudu onye lanu ono
 tukoru mu l'iya mee
 g'anyi a-du l'epho ne anyi?

¹⁶ Su-a; ọ -buru l'onye ukpa
 rwojeru mu iphe;
 mu jika iya ya anunu;
 ozoo le mu hajeru nwanyi,
 ji iya anodedu; ọ kwata ishi;
¹⁷ ọ -buru le mu wojeru
 nri mu dobe k'eri nwekinyi

mu; ọphu mu ekeduru iya
 ụnwu ogbee, enwedu nna;
 18 obenu l'eshinu mu bụ
 nwata bẹ mu shiẹpho
 heta iya g'onye nna iya ehe;
 tẹme mu shiẹpho eshi ọphu
 a nwuru mu eleta nwanyi,
 ji phẹ anọedu ẹnya.

- 19 Mbụ-a; mu -hụmajekwa onye
 emebyihu emebyihu opfu
 l'o to nwedu iphe,
 anma l'upfu;
 ọzoo onye adudu g'ọ dū iya,
 enwedu uwe eye l'ẹhu;
 20 ọphu ọ gọduru ọnu-ọma nū
 mu;
 opfu lẹ mu gude ẹji aturu
 ibe mu meta ukpo gude
 gbobuta iya oyi.
- 21 Ọ -buru l'o nweru iphe,
 mu halijeru ẹka mee
 ndu enwedu nna;
 opfu lẹ mu bụ onye ọnu
 erwu l'opfu l'ulo-ikpe;
- 22 G'ẹka kwahụkwa mu l'ukuvu;
 g'o shikwaa inwo rifu erifu.
- 23 Sụ-a; eshinu mu atsu Chileke
 ebvu l'ọo-nū mu aphụ;
 tẹme mu nọdu atsu
 akpabiri iya ebvu bẹ mu te
 emejekwaru ẹgube iphe ono.
- 24 Ọme mu chiru ụpfu ye
 l'okpoga mkpọla-ododo;

Ọzoo lẹ mu sūru ọkpobe
mkpọla-ododo l'ọ kwa
iya gude ndzū mu;

²⁵ Ọme mu tejeru ẹswa
kpua iphe, mu nweru;
mbū ẹku, mu gude ẹka
mu kpata;

²⁶ Ọme mu wojeru ẹnya
dabẹ l'ẹnyanwu,
egbu nwīnwii;
Ọzoo lẹ mu wojeru ẹnya
dabẹ l'ọnwa,
echi phuuphuu;

²⁷ k'ọphu bū l'iphe ono byaru
bya esweta mu ọkpoma;
mu gude ẹka mu ọwa-a
baaharū phẹ ẹja lẹ mpya;

²⁸ noo iphe, gege abūru iphe-ẹji,
gbaru g'e kpee mu
ikpe iya bū onoya;
kẹle mu -nọdu eme nno
bū iphe ọbu bū lẹ mu ta
akpọduru obu yeru Chileke,
bu l'igwe.

²⁹ Ọme ẹhu tsojeru mu
utso l'onye ọhogu mu
larū l'iyi;
Ọzoo lẹ mu tejeru ẹswa kpua
iphe-ẹhuka, byapfutaru iya nū;
³⁰ mbū-a; mu teke
egudeswekwaa ọnu mu-a
mee iphe-ẹji;
k'atū ndzū onye ọhogu

mu Ọnu.

³¹ Ọ tọ dukwa onye nọ l'ibe
mu sọjeru lẹ ya te erijiduru
ẹpho l'ibe Jiobu.

³² Mbụ l'o toko duswee onye
shi eshishi, kwajẹru lẹ gbororo;
kẹle mu shi eghebejeẹpho
ibe mu Ọnu;
gẹ ndu eje iphe bata
bya akwaa.

³³ Mu teke emeswe iphe-ẹji,
woru domia ẹgube
ndiphe emeje domia-a;
mbụ woru ikpe,
nmaru mu nu domia
l'ime ọkpoma mu;
³⁴ kẹle mu atsụ ikpoto
ọha ebvu;
gude ndzụ-agugu k'iphe,
ee-pfuru mu kwaa l'ulo;
ọphu mu afutajedu afuta.

³⁵ Gege ọ dukpooru onye
e-ye Ọnu l'iphe-a,
mu epfu-a!

Mu doakwaru edo mu
ye ẹka l'ẹkwo.

Gẹ

Ọkalibe-kangokotaru-nu
gbawa mu iya ro!

Gege iphe-a, ndu epfuru mu
nu suru lẹ mu meru-a be
ẹphe deru l'ẹkwo dobe;

³⁶ me mu ewojeeru iya

phọ jikoru l'ukuvu;
 mbụ ị mu gege ewoeru
 iya phọ kpuru g'onye
 kpu okpu-eze;
³⁷ mę mu eshikwanu
 ishi lanu dooru iya edo
 ẹhu mu nanu nanu;
 mę mu abyakpọepho
 bya apfuru iya l'iphu
 g'onye pfuru l'iphu
 ndu-ishi.

³⁸ “Ọ -buru l'alị mu e-chi mkpu
 kpua mu;
 mbụ ị mgbawara,
 nọ iya nụ bụ ẹnya-mini anwu
 iya shokoshoko;
³⁹ Ọ -buru ị mu riru iphe,
 mu kọru iya ị mu ba pfu
 ụgwọ ozi iya;
 ọzoo ị mu mebyiru ndzu
 ndu eje iya ozi;
⁴⁰ g'ọ bukwaru ẹwu-óbvú
 e-fushi iya.

Gẹ witi, mu kọru iya te
 emekwa ememe;
 ẹswa mmanu efushia
 ya l'ọzo balị, a kuru iya.”

Nta-a bę Jiobu
 yeghewaru ọnu.

¹ Tɔ̀budu iya bụ; ụmadzu ẹto ono haa eye ọnu yeru Jiobu; kẹle ọ pfụberekoto l'ẹnya nkiya. ² Noo ya; Elihu tangirihi. Opfu ẹhu Jiobu mee; ẹhu ghuhaa ya egbu; kẹle Jiobu haru eme Chileke onye pfụberekoto bya emechia onwiya onye pfụberekoto. Elihu bukwanu nwa Barakẹlu, bu onye Buzu; oshilokpa Ramu. ³ Ọnyà iya pho ẹphe n'eto mekwapho; ẹhu nodu egbu iya egbu; kẹle ẹphe ta adudu ike pfukpee Jiobu; ole ẹphe nmakwaru iya nu ikpe. ⁴ Iphe, kparu iphe, Elihu nokpoepho doo ge ndu ophuu pfugbukpoda g'o du phe teme o yejeru Jiobu onu bu l'ẹphe buchaa ya ọgerenya. ⁵ O be g'o nonyaaru; o huma l'ụmadzu ẹto ono ta maedu iphe, ẹphe e-pfu; o ghuaaha ya egbu.

⁶ Tɔ̀budu iya bụ; Elihu, bu nwa Barakẹlu, bu onye Buzu bya eyee ọnu su:

Mbɛdua bukwa nwata;
unubɛdua buwaru ndu
bu ọgerenya.

Ọ bu ru iphe ono meru g'o
gude mu shi aso unu ẹnya;
ọphu mu ejeduru atu ama
k'epfuru unu ge mu
mataberu.

⁷ Mu shi rĩa su: G'ọgerenya
pfunaa opfu.

G'onye nowaru apha olemole
zinaa mmamiphe.

⁸ Obenu l'ọo maa, no nemadzu
l'ime;
mbu unme
Okalibe-kangokotaru-nu be
emeje ge nemadzu maru iphe.

⁹ Ọ to bukwapho ọgerenya

amajeru iphe;
 ọphu ọ bukwapho onye
 akahuwanu be iphe edoje
 enya ree.

¹⁰ Noo g'o gude mu su: Unu
 gebekpodapho.

Mbedua e-pfufukwarupho
 unu iphe, mu maru.

¹¹ Mu shikpwekwapho daa gbeye;
 unu ndu epfu k'unu.

Mu shi ngabekpoepho nchi aka
 unu tsoru achokashi iphe,
 unu e-pfu.

¹² Mu ngabekpooru unu nchi
 rengurengu;
 ole o to dudu g'o ka mma
 l'oo onye lanu l'ime unu,
 duru ike goshi Jiobu
 l'o meru eji.

Ọphu ọ dudu g'unu ha onye
 duru ike zaa ya aji,
 ọ jiru unu.

¹³ Unu ta asukwa l'unu
 ahumawaa mmamiphe.

Ge Chileke mawaruro onu,
 oo-yeru Jiobu;
 l'o to budu nemadzu maru
 onu, oo-yeru iya.

¹⁴ Su-a; eshinu Jiobu abudu
 mu be oopfuru be mu te
 epfukwaru iya;
 ọphu mu eyekwaru iya
 onu egube unu yeru iya.

- 15 Ee! Ọ tųwaru phẹ eberebete;
 ọphu ẹphe amaẹdu iphe,
 ẹphe e-pfu.
- 16 ?Bụ gẹ mu ngabẹhunuru
 gūnu nta-a,
 g'ẹphe nọwaa
 nggujungguji-a;
 g'ẹphe nmamoru l'ẹka phọ;
 ọphu ẹphe amaẹdu iphe,
 ẹphe e-pfua?
- 17 Mbẹdua kwaphọ nwekwarųpho
 ọnu, mu e-ye.
 Mbẹdua l'e-pfukwaphọ gẹ
 mu maberu.
- 18 Noo kele opfu jiru mu ọnu
 ebushihu ebushihu;
 tẹme ọphu obu mu ekwedu
 gẹ mu dobe ọnu doo.
- 19 L'ime onwomu bẹ mu
 dųepho gẹ mẹe,
 a gbaru ye l'ime ekpemu
 kpuchia.
- Mu dųepho g'ite ọphúú,
 e yeru mẹe;
 ọ nọdu abya agbawahų.
- 20 Mu e-pfu opfu g'ẹhu agųa mu
 phoo.
- Mu a-sa ọnu yee ọnu.
- 21 Ọ tọ dųkpodaa onye mu agba
 eyeru;
 ọphu ọ dųkwa onye mu aja
 ajaja mkpẹ;
²² kele ọme ọ kwọru mu ẹhu;
 mbų aja nemadzų ajaja mkpẹ;

mẹ onye ono,
meru mu dobe ono ewofu
ndzụ mu ẹgwegwa.

33

- ¹ Noo g'o gude mu sụ-a: Jiobu;
jiko ngabẹkpoekwapho
nchị rengurengu
l'iphemiphe-a, mu epfu-a!
- ² Mu abyakwa asa Ọnu wata
epfu opfu;
mbụ l'iphe, mu abya epfupfu
degekwaru mu edegeru l'Ọnu.
- ³ Opfu, mu epfu bẹ mu gudekwa
obu, gụru ìphóró epfu.
Ogbogboromọnu mu bụru
iphe, ọ maru bẹ oopfu.
- ⁴ Ọ kwa Unme Chileke meru
mu dobe.
Ọ bụru Unme
Ọkalibe-kangokotaru-nụ
bẹ mu gude nọdu ndzụ.
- ⁵ Zanaa mu iphe-a,
mu abya epfupfu-a
m'i -je l'adụ ike.
Dozia onwongu gẹ mu lẹ ngu
pfuta iya.
- ⁶ Ọo g'ị dụ bụ gẹ mu dụ l'iphu
Chileke.
Ọo g'e gude ẹja mee ngu bụ
g'e gude ẹja mee mbẹdua.
- ⁷ Gẹ ndzụ mu te ejekwa ngu
agụgu;
ọzo bụ l'ẹka mu bya ngu

ebyibi-a ta anyịbedu ngu
rọ ẹrwa kẹ nno.

⁸ I gudekpọo ọnu ngu pfua ya;
mu nụma;
mbụ ẹ mu nụmakpooru
iphe, i pfuru gẹdegede
teke i pfuru iya.

⁹ “L’i duebe ree;
ọphu iphe-ẹji adudu ngu l’ẹhu.
L’i dụ iche; ọphu ọ dudu uta,
dụ ngu l’ẹhu;
¹⁰ tẹme Chileke nọdu
etsokwa ngu phọ opfu.

O woru ngu gụa l’onye
opfu iya;
¹¹ bya akpọru ngu ọkpa ye
ẹ mkpọro;
tẹme ọ nọdu anọduje enyocha
iphemiphe, iimekpọo
ememe ophu.”

¹² Ọle iphe, mu emekwanụ
g’i maru l’ẹka ono Jiobu
bụ l’iswi ta adudu ngu mma;
kẹle Chileke kakwa nemadzu shii.

¹³ ?Denu g’o gude i nọdu ayọru
iya ọshi asuje l’o too yejedu ọnu
l’opfu ẹhu unwu-eliphe?

¹⁴ Kẹle Chileke epfuje opfu;
o -pfua ya l’uzo iya ọwa-a;
l’o pfua ya l’uzo iya ọzo.

O too dokwaphọ nemadzu
ẹnya.

¹⁵ Oopfu iya ẹ nrwọ;

mẹ l'ophulenyà ẹnyashi;
teke oke mgbẹnya
tushigbawaru nemadzu;
ẹphe nọdu eku mgbẹnya
l'eli iphe-azẹe phẹ.

¹⁶ Noo teke oopfufe opfu ye phẹ
lẹ nchi;
mee; ndzụ agụhu phẹ l'okwa,
ọonmaru phẹ;

¹⁷ g'eeshi gẹ nemadzu haa
emeswe iphe;
mekwaphọ g'o to kuhẹ
onwiya;

¹⁸ g'eeshi g'a dzọta iya g'ọ tọ
dalahụ l'iduma;
dzọtakwapho ndzụ iya g'e te
gude ogu-echi sụpyashia ya.

¹⁹ Ọ dұru ọphu Chileke egudeje
iphe-ememe hụa nemadzu
ahùhù ọbu;
gburu iya tọgbo l'iphe-azẹe
ya anyapyashi iya ọkpu;
²⁰ k'ọphu bụ l'onye ọbu
bẹ nri adujeashi.

Nri, kachakpọo uto aburu iphe,
anọdu atsọ iya ilu.

²¹ L'ọ jọo ẹhu buru ọkpu.

Ọkpu iya ono, e te shidu
ahumaje l'ẹnya ono awushiru
kẹ jashi.

²² L'ọokpo gẹgege akpọ
ala l'ilu.

Ndzụ iya eje alapfu

ụnwu-ozì alì-maa.

- ²³ Obenu lẹ-a; ọ -bụru l'ọ nweru
 ojozi-imigwe, nọ iya
 l'agụga bụru onye nọ l'echilabọ;
 onye lanụ l'ime ụnu ụnwu
 ojozi labọ l'ụnu iri;
 g'ọ pfiaru nemadzụ iphe,
 gbaru iya l'ememe;
²⁴ g'ọ meeru iya eze-iphe-oma
 sụ:

“Jiko g'a dzọo ya rọ g'ọ tọ
 daba l'iduma;
 lẹ ya hụmawaru onye a-nọduru
 iya l'itumo.”

- ²⁵ Noo teke akpọ ẹhu iya a-bya
 enwee dụ gẹ kẹ nwata nshii.

L'ọ bya alaphu azụ je
 adukpooro g'ọ dụ teke
 ọ bụ nwokoro.

- ²⁶ O -pfuru nụ Chileke;
 l'ọ meeru iya iphe, o pfuru;
 l'ọ hụma iphu Chileke
 tee ọkpobe ẹswa,
 Chileke abyakwa emee ya
 l'ọ bụru onye pfiuberekoto
 ọzo.

- ²⁷ Noo teke ọo-pfuru
 l'edzudzu-ọha pfua ya
 hoo haa sụ:

“Mu meakwaru iphe-ẹji;
 tẹme mu mebyiwaa iphe,
 pfuru nhamunha;
 ọphu a gwataduru mu
 ụgwo iphe, mu meru.

28 Ọ gbafutaru ndzụ mu;
 Ọphu mu adabaduru l'iduma.
 Nta-a bẹ mu a-dzuru ndzụ;
 hụma ẹka ìphóró dụ.”

29 Lewarọ; Chileke emejekwaru
 nemadzụ iphemiphe ono
 ugbo labọ;
 mee ya ugbo ẹto;
 30 g'eeshi g'ọ nafuta ndzụ iya
 g'ọ tọ dalahụ l'iduma;
 k'ọphu ìphóró kẹ ndzụ-a
 l'a-nọdu echikwaduru iya.

31 Sụ-a; nọdukpoekwapho doo
 Jiobu; ngabẹru mu nchị.
 Nọdukpoekwapho doo gẹ
 mu pfu iphe, mu epfu.

32 Teke i nweru ọnu, ii-ye;
 yeeru mu iya.
 Pfua iphe, dụ ngu k'epfupfu;
 kẹle ọ dụ mu g'a sụ l'e
 kpefuru ngu.

33 Teke ọ tọ dudu;
 ngabẹkpoeru mu phọ nchị.
 Nọdukpoephọ doo gẹ mu zia
 ngu mmamiphe!

34

1 Elihu byakwa eyee ọnu
 bya asụ-a:

2 Unu ngabẹkwa nchị l'opfu,
 mu epfu; unubẹ ndu
 maru iphe.

Unu ngabẹkwaru mu nchị;

unubẹ ndu nwuru
 iphe anwunwu;
³ kele ọo g'eedeje ọnu lẹ nri
 g'a maru uto iya-a;
 bu g'aangaje nchi l'opfu.

⁴ G'anyi hotanu iphe,
 pfuru nhamunha l'onwanyi.
 G'anyi tukonu nwua iphe,
 du ree.

⁵ Mbu lẹ Jiobu suru l'iswi du
 iya mma;
 ọphu Chileke ekwedu iya
 aharu enge.

⁶ L'ọ kalẹru iya; a sukwapfo lẹ
 ya adzu uka.

L'ọ to dudu iphe, ikpe iya
 nmaru iya; ọle ọnyá,
 o gburu iya bu agwota
 agwota.

⁷ ?Unu humajeru onye ọphu
 du ge Jiobu;
 onye ọphu angu ekwe une
 g'onye angu mini?

⁸ Ndu ephe l'iya achi idzu lanu bu
 ndu eme ejo-ememe.

Ọ buru ndu ejo-iphe be ephe
 l'iya aswi ọswi;
⁹ kele ọ suru l'ọ to dudu iphe,
 nemadzu erita l'eme iphe,
 du Chileke ree.

¹⁰ Su-a; unu ngabekwaru mu
 nchi; unubẹ ndu iphe
 edoje enya.

Tuswekwa! Chileke ta
abyakwa eme ẹjo-ememe!

Okalibe-kangokotaru-nu ta
abyakwa eme iphe,
adu du ree!

¹¹ O kwa ugwo be opofuje
nemadzu l'iphe, o meru.

O nodu ewotajeru iya iphe,
gbaru umere, oome.

¹² Mbua; okpobe opfu kpọ
bu le Chileke te emejekwa iphe,
adu du ree.

Okalibe-kangokotaru-nu ta
anmaswejekwa ikpe
anmaswe.

¹³ ?Bu onye meru Chileke g'o
buru onye eliphe-a
l'ophu du l'eka?

?Bu onye bu onye suru iya g'o
lekota mgboko-a gbaa
mgburugburu?

¹⁴ O -buru l'o bu uche iya;
o seta ndzu sephu azu;
bya erwuta unme,
aatuje atutu doberu onwiya;
¹⁵ nemadzu l'ophu atukoepho
buru mkpurupyata
mgbo lanu.

Nemadzu anwuhu je aburu ẹja,
no l'ali.

¹⁶ O -buru l'iphe edoje ngu ẹnya;
ngabekwa nchi;
numakwa iphe-a,

mu abya epfupfu-a.

17 ?Bụ onye ono, ikpe pfuru ọto
dụ ashị a-bya aburu onye
bụ ishi?

?I sụru g'ii-nma iya ikpe;
mbụ onye ono, pfuru ọto bya
aburu onye parụ ẹka ono?

18 Tọbudu iya bụ onye ono,
asuje ndu eze: Ọ tọ dudu iphe,
unu bụ!

L'ọ sụ ndu nweru ẹnya:
Ejo-iphe parụ unu ẹka l'ẹhu!

19 Ọo ya bụ onye ono,
ta agbajeduru nemadzu ọdzori
opfu l'ọ bụ onye-ishi;
ọphu oo-wotadu iphe,
o gogo meru onye ukpa
meeru onye eze opfu l'ọ bụ eze;
kẹle ẹphenebo tukururu bụru
iya gude ẹka iya mee phẹ.

20 Ẹphe anwuhuje
buregedegengu l'echi abali.

Ọonmaghukota igwe ọha anmaghu;
ẹphe anwushihukota.

Ndu oke amadu bẹ oowofujekwa;
ọle ọ tọ bukwa nemadzu
egudeje ẹka wofu phẹ.

21 “Sụ-a; ẹnya Chileke
tụkokwaru iphe, ndiphe eme
humakota;
tẹme ọ nọdu ahumakotaje
ẹka ẹphe zọru ọkpa.

22 Ọ tọ dudu ẹka agba ọchii,

dụ nụ; ọphu ọ dudu egube
dadishi, dụ nụ,
bụ ẹka ndu eme ẹjo-ememe
e-je edomia onwophẹ.

- 23 Ọ tọ dudu Chileke mkpa
kẹ gẹ ya bya awata enyocha
nemadzu ọzobaa;
mbụ kẹ g'ẹphe bya anọdu iya
l'iphu k'ikpe ọzobaa.
- 24 Ọ too jejedu akpata ishi tẹme
l'ọ chikaa ndu oke amadu;
bya ahọo ndu ọzo dochia
ẹnya phẹ.
- 25 Eshinu ọ makotaru iphe,
ẹphe eme
bẹ oomekpeje phẹ l'ẹnyashi
gwee phẹ arakabya.
- 26 L'ọ hụa phẹ ahùhù ẹjo-iphe,
ẹphe eme l'edzudzu-ọha;
ẹka onyemonye a-hụma phẹ;
²⁷ opfu l'ẹphe haru
etso Chileke;
ọphu ọ dudu iphe,
ọ sụru g'e mee, duru ọphu
ẹphe akpajẹ ishi ememe.
- 28 Ẹphe emeje; ndu akpa nri
echi mkpu, erwuje Chileke
lẹ nchi;
k'ọphu Chileke anụmaje
ẹkwa ndu adudu g'ọ dụ phẹ.
- 29 Ọle ọ bụ; ọ -sụkwanu lẹ ya te
eyekpọdaa ọnu; ?bụ onye sụru
iya anma ikpe?

- O -domia iphu iya;
 ?bụ onye bya adụ ike hụma iya?
- Ọle ọ kwa iya nwe nemadzu
 bya enweru ọha l'ophu.
- ³⁰ Oomeje g'onye te emedu ele
 Chileke ta aburu onye-ishi;
 k'ophu ọ tọo watadu agbaru
 ndiphe ọnyà.
- ³¹ Ọ -buru kẹ gẹ nemadzu
 sụ Chileke:
 'Ọ dekwaru mu; ọphu mu
 alaphubaekwa azụ l'iphe-ẹji
 ono ọzo;
- ³² Zinaa mu iphe,
 mu taa dudu ike ahuma.
 Mu -mewaa ẹji;
 mu tee emehedu iya ọzobaa.'
- ³³ Sụ-a; ?bụ g'ọ dụ ngu ree
 bụ g'i dobesu lẹ Chileke
 a-pfụ ngu ụgwo l'ẹka
 i ti kwedu g'izimanu lwa
 ngu azu?
- Ọ kwa ngu e-pfukpọepho
 l'onwongu; ọ tọ bukwa
 mbẹdua. Pfukwaa iphe,
 ị maru.
- ³⁴ Gẹ ndu iphe edoje ẹnya
 yena ọnu.
 Gẹ ndu mmamiphe,
 l'anụ iphe-a, mu epfu-a
 pfunaa sụ:
- ³⁵ 'Jiobu epfukwa opfu onye
 enwedu egomunggo;

mbụ l'opfu iya ta adụkwa
omilomi.'

³⁶ O dū g'a sū lẹ Jiobu bẹ
aa-hụkpoepfo ama hụ-rwua
ya l'ishi;

kẹle oopfu g'onye ẹjo-iphe.

³⁷ O meru iphe-ẹji; tẹme o nọdu
eko Chileke ọkpa l'ishi.

Ọonoduje l'echilabọ anyi akụ
ẹka aja anyi ewenu;
tẹme o nọdu epfu ẹjo opfu
mpfukwase ekpu Chileke.”

35

¹ Elihu nọdu eyekwaro ọnu,
ooye.

² Sū-a; ?i dobesū l'iphe ono
bū apfubekoto;
g'i sūru l'apfubekoto nkengu
ka kẹ Chileke?

³ Olee i jikwaru iya nū sū:
?Bū urwu gūnu bẹ iirita iya?
Sū: ?Bū gūnu bū obunggo,
dū iya nū l'i harū eme iphe-ẹji?

⁴ Gebe gẹ mu bya eyeeru
ngu ọnu;
gū lẹ ndu unu l'iya eshi ọnyà.

⁵ Palikpodapho ẹnya lee
l'akpaminigwe.

Tabekpodapho ẹnya tatata
l'urwukpu ono,
nọ ephekerephe
ephekerephe l'uzo ishi
ngu ono.

- ⁶ I -mee iphe-ẹji;
 ?i mekataru Chileke l'awe?
 Iphe-ẹji ngu -dụkpoo igwerigwe
 g'ọ dụhabe; ?oo-mebata
 iya gụnu?
- ⁷ Teke ọ bụ l'ị pfuberekoto;
 ?ị nuru iya gụnu?
 Tọo ?bụ gụnu bẹ ọonata
 l'ẹka ngu?
- ⁸ Ẹjo-iphe, iime buẹpho
 onye dụ gẹ ngu bẹ
 oomekata.
 Apfubekoto ngu bukwarupho
 unwu-eliphe bẹ ọ duru.
- ⁹ “Ọobujeru; e -menuka
 ndiphe ewere;
 ẹphe eye mkpu l'ọnu.
 Ẹphe echiaha: ‘Ojileka tọgbo’;
 kele ndu ike dụ l'ebyi
 phe ẹka l'ẹhu.
- ¹⁰ Ọle ọ tọ dudu onye asuje:
 ?Bụ awe bẹ Chileke,
 bụ onye meru mu nụ nọ;
 onye ewojeru ebvu-oma
 nụ nemadzụ l'enyashi;
¹¹ onye ka anyi ezi iphe
 eme lẹ g'oozi anụ, bu l'eliphe;
 bya emee; anyi ka ẹnu,
 ephe l'eli amaru iphe.
- ¹² O to yejeduru nemadzụ
 ọnu mẹ ọ -nọdu echi mkpu.
 Ọ bụru iphe, kparụ iya nụ
 bụ lẹ ndu ẹjo-iphe

kunukaru onwophẹ.

¹³ Tororo iya bụ ịe Chileke te
eyejedu ọnu l'arwọrwo iphoro,
ẹphe anọduje arwọ;
mbụ ịe
Ọkalibe-kangokotaru-nụ te
eyejedu ọnu l'ẹgube
iphe ono.

¹⁴ ?Denu g'ọ bụchia gube onye
suru l'ị tị hụmaduru iya
ahụma ophu bẹ ọo-nọdu
angaru nchi;
mbụ gube onye suru l'ikpe
ngu dabyiru l'ataphu iya;
i je l'anọdu echeru iya?

¹⁵ Teme ị sukwapfo l'ẹhu-eghu
Chileke ta adudu iphe, oomeje;
ophu ọokpajedu onye
eme ẹjo-iphe ishi.

¹⁶ Ọo ya bụ ịe gube Jiobu
epfu mkpọkoro opfu.
lipfu mpfukwase opfu,
enwedu ishi.”

36

¹ Ophu Elihu ahakwaru
iphe, oopfu.

² Tabakpọekwapfo nshi
nwanshi;
ge mu goshi ngu l'ọ
nwebakwaru-a iphe, ee-pfu
l'opfu ẹhu ke Chileke.

³ Eka mmamiphe mu shi

dụkwa ẹnya.

Mu jekwa egoshi l'ikpe
kalẹru onye ono,
meru mu nụ ono.

⁴ G'o dokwaa ngu ẹnya ree
l'opfu, mu epfu ta
adụkwa ọpflu bụ ụka.

L'onye iphe doru ẹnya doẹbe
bẹ unu l'iya tükokwaru
nọdu l'ẹka-a.

⁵ Chileke pakwaru ẹka;
ọle o to lephuduru
nemadzu ẹnya.

Ọ paru ẹka bya ekeru
jịmujimu l'iphe edo ẹnya.

⁶ Ndu ẹjo-iphe bẹ o too
dobejedu ndzu.

Ọ nọdu anụjekwanu ndu
aakpa ẹhu iphe,
rwuberu phẹ nụ.

⁷ Ẹnya ta alufujedu iya
alufu l'ẹka ndu pfuberekoto
nọ.

Oomeje; ẹphe lẹ ndu eze
atuko bụru eze;
tẹme ọ nọdu ekutseje phẹ
ephekerephe jasụ l'ojejoje.

⁸ Obenu teke ọ bụ l'a turu
nemadzu mkpọro;
l'ụdo iphe-ẹhuka turu
iya swiswia;

⁹ bụ iphe, Chileke eme bụ
l'oogoshi phẹ iphe, ẹphe meru;

l'ẹphe meru iphe-ẹji l'ẹka
 ẹphe eku onwophẹ.

¹⁰ Iphe, oome bu g'ẹphe ngabẹ
 nchi l'uzo, aakpọ-ziru phẹ;
 bya asukwa phẹ phọ
 g'izimanu ẹjo-ememe,
 ẹphe eme lwa phẹ azu.

¹¹ Ẹphe -mee iphe, o pfuru
 bya ejeahaaru iya ozi;
 nweswe ndzu phẹ ọphu
 phọduru nu aburu phẹ
 eswe ẹhu-ọdu-guu.

Nwapha olemole ono,
 phọduru lẹ ndzu phẹ ono aburu
 apha, a-buru phẹ k'oma k'oma.

¹² Obenu teke ẹphe jikaru
 l'ẹphe te eyeduru iya ọnu;
 ọoburu ogu-echi bẹ
 ee-gude saa phẹ ọsampfu.

Ẹphe anwuhu l'ẹbe ẹphe
 enwe egomunggo.

¹³ Obenu lẹ ndu Chileke adudu
 l'obu phẹ ewojeru
 ẹhu-eghu gude suchia
 obu phẹ ọbu;
 mbu o -kekpo phẹ ẹgbu
 g'ookehabẹ;
 ẹphe ta aradu g'e yeru
 phẹ ẹka.

¹⁴ Ẹphe agbakwohuje nwuhu
 teke ẹphe bukwaду okorọbya;
 tsoru unwoke, a goru lẹ nshi,
 agba ukpara laa l'ite lanu.

15 Obenu lẹ ndu eje iphe-ẹhuka
 bẹ ọonafutaje l'iphe-ẹhuka ono.

Ọ nọdu epfuje opfu gude ọda
 phẹ obu m'ẹphe nọdu
 eje iphe-ẹhuka ọbu.

16 Ọ kwa mkpu bẹ ọogbaru
 ngu.

Oome g'ọ phafuta ngu l'asha
 iphe-ẹhuka dobe ngu lẹ
 phorokotoko ẹka
 adukpoedu iphe,
 akpakube ngu nu;
 tẹme nri, e doberu ngu g'i
 ria buri nri, kachaa ree.

17 Obenu lẹ nta-a bẹ ikpe,
 e kperu ngu bu ikpe,
 gbaru onye ẹjo-iphe.

Ikpe, pfuru ọto yẹ
 iswi-ọdumma tuwaru
 ngu swiswia.

18 Tọkwa ẹhu g'ọ tọ du onye
 e-gude ẹku deru ngu ye.

B'ekwekwa g'oke uphalazu
 chechi ngu iphu.

19 Ẹku ono; ọo-me g'i ti
 nọduhe l'iphe-ẹhuka-a?

Tọo ọii-gude ọkpehu ngu l'ophu
 gude nahu iya?

20 Be lekwa ẹnya udu ẹnyashi
 ono,
 emeje gẹ ndiphe shi
 l'ibe phẹ chihu ono.

21 Tọnupho ẹhu g'i ti je aghaaru

- ẹjo-ememe iphu,
 bu iphe, mu ele ẹnya
 l'ì ka ahata eme l'eje iphe-ẹhuka.
- 22 Chileke be e kutseru kele
 ike du iya shii.
- ?Bu onye bu O-zì-iphe,
 aatụ eyeru iya?
- 23 ?Bu onye sụru asụ Chileke:
 Waa iphe, ii-me baa.
- Tọo ?bu onye sụru iya asụ l'iphe,
 o meru be o mekwaru ẹji?
- 24 Nyatajekwa kwolita
 ozi Chileke,
 bu iphe, ndiphe agụ ebvu
 gude etu iya ẹpha.
- 25 Nemadzụ l'ophu
 hụma-dzuwaru iya.
- A nọdu agbeje ụzenya ele
 iya phoriphori.
- 26 Chileke pakwaru ẹka
 mebyi apapa;
 daghata ge mmamiphe anyi ha.
- O to dukwa onye adu ike aguta
 apha ole o nwaru ndzu.
- 27 Omeje mini; l'oda paapaa.
 O buru mini ono l'edzeje
 wowoowo awu ala
 l'oma nggele l'oma nggele.
- 28 Igwe avuje tsutsutsu;
 l'o dzekwapho mini,
 paru ẹka wushiru unwu-eliphe.
- 29 G'oogudeje erwu erwurwu
 ta adukwa onye o doru ẹnya;

Ọp̄hu ọ ɔ̀kwa onye maru
g'ooomeje shi l'Ọkpoku iya
atụ egbigwe tarara tarara.

- 30 Hụmanu g'o woru
ebemu-igwe iya doo
onwiya mgburugburu;
bya egude iya ekpuhajẹ
ẹka kachaa omilomi
l'eze-ẹnyimu.
- 31 Ọo ẹgube ono bụ g'o gude
elekọta eliphe l'ophu.
Ọ nọdu emefuta nri eme
k'etsutsu iya.
- 32 Iphe, jiru iya mkpoji-ẹka
bụ egbigwe.
Ọ bụru ẹka dū iya ree bẹ
ọotuje iya.
- 33 Ọo ririri bẹ oodeje l'a
maru l'Ọobyawaa
edze oke mini;
mbụ je akpaa l'eswi,
eeche echeche
egoshijechakwaa l'igwe
emewaa ome mini.

37

- 1 Nta bẹ meji etekwa mu
ophe;
mbụ lẹ meji akufukwa mu
akufu.
- 2 Unu ngabẹkpodapho!
Unu ngabẹ nchi
nụmakpodapho olu Chileke!
Unu nụmakpodapho ekiri,

o gude Ọnu iya asụ!

³ Oomeje; ebemu-igwe alọ
waawaa l'igwe;
l'o rwuchaa ẹka igwe beru
alì beru.

⁴ Teke e mechaerupho;
Ọ raahaa ọrà;
l'o gude oke olu iya atụ
egbigwe.

Ọphu ọ dudu ọphu oodophuje
azụ mẹ ọrà iya gbụfuwa.

⁵ G'olu Chileke egudeje edebe
ririri bẹ dū oke ebvu.

Ọ nọdu emeje iphe, parụ ẹka;
meghata g'oodobe
nemadzụ ẹnya.

⁶ Ọo ya asụje aka-mini-sunoo
g'ọ daa l'eliphe.

L'ọ bya asụkwapho igwe: Ngwa;
dzee mini dzeshia ya ike!

⁷ Oomeje gẹ nemadzụ
jebuhu ozi;
shi nno goshi onyemonye g'ozì,
ya eje habe shii.

⁸ Ụnwu anụ anọduje ekpu
ekpukpu ndzụ.

Ẹphe ejeje edomichaa onwophẹ
l'ime ọgba phẹ.

⁹ Oke phẹrephere eshije l'ọgba
iya;
tẹme oyi-atsutsu nọdu
eshije lẹ taphutaphu phẹrephere.

¹⁰ Mkpukorophu akamini bụ unme,

- Chileke tūru atūtu bẹ ooshije.
 O -tūa ya; phosa phosa mini,
 dōru nyimunyimu akpūkoo
 ophu.
- 11 Urwukpu bẹ oogudeje
 tsutsutsu mini wū-jia awū-ji.
 O būru urwukpu ono
 anōduje atū egbigwe
 gbaagbaa.
- 12 O nōdu abūjeru; o -zia phẹ;
 ẹphe alōjashia onwophe
 waawaa l'eliphe l'ophu;
 wata eje ozi, o ziru phẹ.
- 13 Erwurwu bẹ o gude bya
 g'o gude iya hūa
 ūnwu-eliphe ahūhū;
 ọzoo gude iya gbaa mini
 l'eliphe gude goshi
 n-yemobu iya.
- 14 Ngabẹkpodapho nchị l'iphe-a
 Jiobu!
 Hakpōepho iphe, iime;
 gbukpōdapho igo l'ōdu-biribiri
 Chileke!
- 15 ?I makpōoru gẹ Chileke
 egudeje esede urwukpu
 l'akpaminigwe?
 ?I maru g'oogudeje alō ebemu
 phaaphaa?
- 16 ?I maru g'urwukpu adōjeru
 l'eli iya awūnga l'akpaminigwe?
 Ono būkwa ẹguru ozi, o jeru;
 mbū onye tūkoru

iphemiphe makotaru onoya;
¹⁷ mbu gube onye uwe ngu
 ekpo okpomoku l'eka
 mgboko deru yekete.

Ọ buru iphe, kparu iya nu bu
 pherephere, shi l'uzo ndohali.

¹⁸ ?Ii-du-a ike mee iphe, o meru;
 mbu mee; akpaminigwe phushi;
 g'o meru nkiya phushi
 le mgboko-a;
 Ọ kpoo gbengu g'onyo,
 a wuru awuwu?

¹⁹ “Kanuru anyi iphe,
 anyi e-pfuru iya.

Anyi ta adukwa ike rikobe iphe,
 anyi e-pfu.

Ọ buru iphe, kparu iya nu
 bu l'uzo anyi gbanukaru
 ochii.

²⁰ ?Ee-je epfuaru iya le mu
 achọ epfu opfu tọo?

?O nweru onye a nonyaa
 rwahaa arworwo g'e
 lwee ya tọo?”

²¹ “A bya le nta-a; nemadzu
 te elejekwa enya l'enyanwu,
 echi echichi;
 mbu me igwe bo gbarara.

²² Chileke abyaakwa. Ọ
 dukwa ebvu l'enya bya adu
 akpabiri. O shikwa l'isheli abya;
 kwaa onwiya akwa le
 mkpola-ododo.

- 23 Ọ kwa iya bụ
 Ọkalibe-kangokotaru-nụ;
 bụru onye ẹka anyi ta
 abyadu erwu erwurwu ophu.
- Ọ parụ ẹka l'ike-okpu;
 mę l'ekpe ikpe, pfuru oto.
 Apfubekoto nkiya parụ ẹka;
 ophu oomedu
 nemadzu ewere.
- 24 Noo g'o gude ndiphe
 nodu atsụ iya ebvu.
 Ndu arị l'ephe maru iphe
 be to gubeduru iphe.”

38

Chipfu wataru eye onu

¹ Tọbodu iya bụ; a nọnyaepfo; oke pherephere wata ezizi. Chipfu gbę l'oke pherephere ono wata eyeru Jiobu onu. Ọ sụ Jiobu:

² ?Bụ onye epfu iphe pho?

?Bụ onye woru enweru
 egomunggo mu rwutoshia;
 l'ebe abụ l'onye obu maru iphe,
 oopfu?

³ Rikota onwongu gę nwoke;
 gę mu bya aja ngu aja!

Ọ kwa g'i zaje mu iya!

⁴ Sụ-a; ?bụ awe be i nọ teke
 mu turu okpa mgboko-a
 l'ophu?

Karụ mu iya; m'ọ bụru l'o
 doru ngu enya!

⁵ ?Bụ onye turu iya onyeka sụ

l'Ọwa-a g'Ọo-habe baa?

?Ị maru iya?

?Bụ onye gude eri tụa l'uswekete
iya?

⁶ ?Bụ Ị gụnu bẹ a kpọbechaaru
ọkpa iya?

Tọo ?bụ onye gbuberu ishi
mkpuma, gude mgboko;
⁷ mbụ teke ono, e mechaaru;
kpokpode nchi-abọhu tụ
uzu wata agụ ebvu;
unwu-ojozi-imigwe g'ẹphe
hakọta gbọaha kwakokoo.

⁸ ?Bụ onye guru ụzo gburumu
gụ-buru eze-ẹnyimu ye
l'azu teke ono, o meru
kpukungu kpofuta l'ẹpho
ne iya ono?

⁹ Noo teke mu woru
urwukpu mee uwe yee ya;
bya eworu tsụkiribaa
ọchii phua ya g'ẹkwa;
¹⁰ bya akpaaru iya oke
ẹka oo-jeberu;
bya asụ-chia ya woru iya
gua kpukpurukpu.

¹¹ Noo teke mu sụru: “Lekwa
ẹka ii-jeberu; ba ghatakwa
ẹka ono!

Lekwa ẹka akparamini
ngu e-ku onwiya
jeberu gburu.”

¹² ?Ị sụjewaru nchi-abọhu

l'owa-a iphe, oo-me baa?
 ?Ozoo karu geregere utsu
 l'owa-a eka rwuberu iya nu
 baa?

13 ?I sujewaru iya g'o je
 egudegbaa eka l'igburonu
 igburonu mgboko
 jia ya phulaphula jishia ya
 ndu ejo-iphe?

14 Mgboko l'ophu kpuru
 oronmono g'urwa, e gude
 eme ohubama;
 teme o nodu aduje rwarri
 g'uwe.

15 Ndu ejo-iphe be e te
 ekwedu g'iphoro duru;
 teme a nyakwoshichaa phe
 eka ephe shi palichawa
 ephekerephe.

16 ?I jejewaru ije jerwua
 eka oke-enyimu agba
 deredere?

?I jejewaru ije l'eka enyimu
 bu utubuku?

17 ?E goshijewaru ngu
 onu-abata ali-maa?

?I humajewaru eka eeshije
 abahu l'ononyo onwu?

18 ?I rijekpowaru iya;
 o doo ngu enya su ge
 mgboko-a l'ophu habe
 phorokotoko?

Karu mu iya me o -buru li

tùkoru iphemiphe-a
makotaru!

19 ?Bù awe bẹ eeshije eje
ẹka ìphóró bu?

?Bù awe bẹ ọchii chiru
upfu yee?

20 ?Ì dù-a ike dua ndu ono
g'ẹphe lagbaa ẹka ẹphe
shigbaa?

?Ì maru ọzo, eeshije eje ẹka
ẹphe akwaje?

21 Mu maru-a l'ì makotaru
iphemiphe ono;
eshinu a nwuadaru ngu
tẹme e mee iphemiphe ono.

Ì nọwaru ndzù nọgbawaa
apha, dù igwerigwe!

22 ?Ì bahujewaru l'ulo ẹka
aakubeje aka-mini-sunoo?

Tọo ?ì hujewaru ọlo
ọphu aakubeje ire egbigwe,
23 bọro iphe, mu doberu
kwabẹru teke iphe-ẹhuka a-bya;
mbù kwabẹru mbọku ọgu
a-da.

24 ?Denu gbororo, eeshije eje
ẹka ìphóró futaru;
ọzoo ẹka pherephere ọzo
ẹnyanwu-awawa
eshije dzuru mgboko?

25 ?Bù onye gbuwaru ọswawara
tọgbo;
ọ bọru ọzo, mini eshije edze;

bya atỌgboru egbigwe ụzo,
 Ọo-nỌdu eshi.

- 26 Ọ nọdu egudeje iya agba
 mini l'ẹka nemadzu te
 ebudu ebubu;
 mbu echiegu, adudu onye
 bu iya nu;
 27 gude iya mee ge ncharacha
 ali, adudu iphe, du iya nu
 ngu-jia epho wata
 efushi eswa ophuu.

- 28 Mini ono, igwe edzeje ono;
 ?o nweru nna to?

Mbu-a ?bu onye nwuru iji,
 akwa akwakwa?

- 29 ?Bu nwanyi ole nwuru
 mkpukorophu mini oyi?

?Bu onye tsuru ime
 mkpukorophu iji mini ono,
 eshije l'imigwe adashihu ono,

- 30 bu iya emeje mini l'o
 kpukoo ophu du
 ge mkpuma;
 mbarabata ogbumini ahukoo
 ahuko?

- 31 ?Ii-du-a ike swikobe
 kpokpode, Puleyadesu?

Too ?i du ike atoshi
 kpokpode, Orayonu
 g'o nodu nanu nanu?

- 32 ?I du ike eme kpokpode,
 dugbaa nu g'ephe
 futaje teke gbaru phe nu?

T_oo ?_i d_u ike edu kpokpode,
Beya; y_ee ụnwu iya?

³³ ?_I maru ekemu, a t_uru doberu
iphe, bu l'imigwe?

?_I-d_u ike mee g'_o b_uru g'_o
d_u l'imigwe b_u g'_o-d_u l'eliphe?

³⁴ ?_I d_u ike ara ọrà g'_o rwua
ẹka urwukpu n_o;
ọzoo g'_i ratsua mini
l'a-gba utso, e-ri ngu n_u?

³⁵ ?_Bu ngu at_uf_uje ire egbigwe
g'_o tsoru ụzo iya?

Ẹp_he -jeshia; ?_ẹp_he abya as_u
ngu l'ẹp_he ejeakwa ozi,
i ziru p_hẹ?

³⁶ ?_Bu onye n_uru ọkpoma
egomunggo;
bya emee g'_ip_he doje
uche ẹnya?

³⁷ ?_Bu onye b_e mmamip_he
iya rwuru k'_ag_uje
urwukpu ọgu?

?_Bu onye aw_ushije itemini,
s_uru l'imigwe;
³⁸ m_e urwuku huk_oep_ho
ah_uko; bya anmaa agbadagba.

³⁹ “?_Bu ngu ejeje akparu
nyee oduma nri;
bya an_u-jije ụnwu iya
ẹp_ho g'_egu ta ag_uhe p_hẹ;

⁴⁰ m'_ẹp_he t_uko n_odu
l'ime ọgba p_hẹ;
ọzoo l'ẹp_he t_ukoru geparu

l'ote ẹka ẹphe e-gbu anụ?
⁴¹ ?Bụ onye anụje okpoko-ọhà
 nri, ẹphe erije;
 teke ono, unwu iya
 anọduje echiru Chileke
 mkpu nri tsoru
 ẹkameka aghaphe achọ
 nri, ẹphe e-ri?"

39

¹ ?Iimajeru teke egbu-ọswa,
 bu l'úbvú nwuru nwa?
 ?Iihubeje ama l'ọwa-a teke ne
 ele anwu nwa baa?
² ?Iiguje ọnwa ole,
 ẹphe anọje tẹme ẹphe
 atsua ime?
 ?I maru teke ẹphe ezedaje
 gẹdegede?
³ Ọobujeru; ẹphe -bya ezeda;
 ẹphe egbushi ikpere l'alị
 woru nwa phẹ nwua.
 Ime, shi eme phẹ nụ
 aburu sarimu.
⁴ Unwu iya ọbu agbashia ike
 nọdu l'ime ẹgbudu
 l'ẹka ono vua vughee.
 Ẹphe aparu ne phẹ ono haa
 gbakashihu;
 ẹphe ta lwapfutabaedu iya.
⁵ ?Bụ onye haru
 nkapfu-igara-ọswa;
 ọ nọdu akpaphe;

Ọphu ọ dudu iphe,
eme iya nu?

?Bu onye toshiru phe haa;
ephē nodu ejeje eka du
phe ree?

⁶ Echiegu ali Okponku be mu
nukpoeru iya pho su
g'o buru;
bya emee ali ono,
buepho unu unu ono g'o
buru eka oo-buru eburu.

⁷ Wowoowoo, anoduje atu le
mkpukpu be onoduje
achi ochi;
ophu onudu gbagbagba,
ndu udumali anoduje ara.

⁸ Ubvu ubvu be otukoje gbaa
ophorokpo achọ iphe,
oo-ri;
achokpoepho nwa
rwushirwushi eswa
ge ya taa.

⁹ ?Atsu e-kwe-a bya anodu
meahaa iphe,
i suru g'o mee?

Mbu-a; ?ii-dobe iya-a g'o
nodu l'eka eeyejeru anu nri;
l'o nodu iya l'enyashi?

¹⁰ ?O duru ophu ii-du ike
tua eri kputa kpuru g'o
jeeru ngu ozi egu;
?ozoo ii-gude iya-a koo
okoro le nsuda?

¹¹ ?Ii-chiru upfu kwee ya

- sù l'o shihuru ike?
 ?Ìi-parù-a ozi ngu ẹka o
 shihuru ike parù
 haarù iya?
 12 ?Ìi-kweta haa ya g'o je
 evulataru ngu ereshi ngu;
 vuru iya je akùbe l'ùlo,
 eechishije balì?
 13 Oke-ẹnu ọsaturichi egudeje
 ẹhu-ùtso chia òkù pyaa.
 Ọle ì tìi tùduru ẹbà iya eyeru
 ẹbà korokoro.
 14 Oke-ẹnu ọsaturichi ono atùje
 ẹkwa l'alì.
 Ọ bùru l'alì bẹ ọonoduje kpua
 ya.
 15 Ọ tọo kpadù ishi k'a nọnyaa
 a zọo ya ọkpa zọpyaa;
 ọzoo l'ùnwu anù
 l'a-zọpyashi iya.
 16 Ùnwu iya bẹ ọonoduje ehe
 anùka anùka g'ẹphe ta
 abùdu ùnwu iya;
 ọphu ọ kpadù ishi kẹ
 l'akanya, o seru bù
 ọla-l'iswi;
 17 noo kẹle Chileke ta anùduru
 iya mmamiphe.
 Ọphu o keduru oke
 k'egomunggo nù yẹbedua.
 18 Ọle o -wokwanùru òkù iya
 phùshia kẹ gẹ ya wata
 agba ọso

l'ọ nyịghaaro ịnya yẹe onye
nọ iya l'eli chĩa phẹ ẹbyi.

19 Sụ-a; ?bụ ngu nuru ịnya ike,
dụ iya nụ?

Tọo ?bụ ngu gbarụ nza-ịnya
phushi iya l'olu;
ọ dụ kẹ nwa
buyabuya ono?

20 ?Bụ ngu meru iya;
ọ nọdu anọduje apfụ
shọshoo g'igube ono;
o -zia unme fuu;
ndzụ agụhu ụnwu-eliphe?

21 Ọzoje garamu garamu;
ẹhu atsọ iya ntumatu
l'ike dụ iya.

Looje ẹnari ẹnari ejepfu ọgu,
duru iya nụ.

22 Ọchi bẹ ọochije ndzụ-agugu;
kẹle ọ tọ dudu iphe,
ọotsu ebvu;
ọphu ọola-phujedu azu
mẹ a haliaru iya ogu-echi.

23 Ikpoto apfụ, kuru l'ekpa apfụ,
nọ iya lẹ mgbureku
anọduje azu iya
yọgoro yọgoro;
yẹle o-gbungeregere arwa.

24 G'o gude awu kẹ wugelengu
wugelengu bẹ
ooghudujechaa mẹ o
lwee alị elwelwe;
ọphu ọ byadu apfuru doo

mẹ e gbua opu.

25 E -gbua opu ono l'o woru
okwe rwua.

Ọgu -nọdukwaduro ụzenya;
l'ọ kpọtawa ẹgburu iya.

L'ọ nụwaro olu ndu-ishi
ojọgu ono;
waa mkpu-ọgu, ada nụ.

26 “Sụ-a; ?bụ mmamiphe ngu
bẹ ọkpo-ngwere gude
ephe l'eli?

?Bụ ngu meru iya;
ọ nọdu ewojeru ñkù jasanya
l'ụzo ndọhali ono?

27 ?Bụ ngu ezije ugo g'o phee
phaa phemihu imeli imeli
je anọdu kpaafune iya
l'ẹka dụ ephekerephe
ephekerephe?

28 Ẹka ọonoduje bụ l'újì,
nọ ephekerephe
ephekerephe;
nọwaro l'ẹka ono
jasụ nchi abọhu.

Ọ bụru l'ẹka ono bẹ oodomije
onwiya.

29 Ọ bụru ẹka ono bẹ ọonoduje
levu iphe, oo-ri.

Ọ -nọdukwaduro ụzenya;
ẹnya iya arwutawa iya.

30 Ụnwu iya amije mee.

Ọ bụru ẹka odzu dabyiru bẹ
yẹbedua anọduje.”

40

- ¹ Chipfu nọdu epfukwarọ
eyeru Jiobu sụ iya:
- ² “Gụbe nwọphu abarụ
Ọkalibe-kangokotaru-nụ
mba;
?ị sụru g'ịikajeru iya iphe,
oo-me?
Gẹ gụbe onye ono,
ebo Chileke ibo ono
yena Ọnu l'opfu-a,
oopfu-a!”
- ³ Tọbudu iya bụ; Jiobu bya eyeeru
Chipfu Ọnu sụ iya:
- ⁴ “Mu bụkwa onye ta abadu ẹ
mkpa.
?Denu gẹ mu e-shi jeye Ọnu
l'iphe, iipfu?
Mu woakwaru ẹka dẹe l'Ọnu.
- ⁵ Mu pfuakwaru akpọ opfu
lanụ; ọphu mu
adụkwanu ike eye Ọnu
l'ọphu iipfu.
Mu bya epfuwa akpọ labọ;
nta-a bẹ mu tee
pfubaekwa ọzo.”
- ⁶ Noo ya bụ; Chipfu bya agbẹkwa
l'oke phẹrephere ono pfuru
yeru Jiobu sụ iya:
- ⁷ Rịkota onwongu gẹ nwoke;
gẹ mu bya ajịa ngu ajị.
Ọo ẹpho g'i yejekwa Ọnu
l'iphe, mu ajị ngu.
- ⁸ ?Ii-dụ ike mebyia ikpe,

- mu kperu?
 ?Ii-dụ ike nma mu ikpe;
 k'ọphu ikpe a-kalẹru gụbedua?
 9 Ọdzu-ẹka ngu; ?ọ ha gẹ kẹ
 Chileke?
 Tọo ?i dụ ike egude olu ngu
 atụ egbigwe g'ọtuje ono?
 10 Ngwanụ; gudenụ
 o-gbu-nwịnwii yẹe akpabiri
 kwaa onwongu akwa!
 Yena akwabẹ ùbvù yẹe
 enweru ẹnya g'onye
 yeru uwe!
 11 Gbanwụbenu iphu ẹhuka
 ẹhuka gude goshi l'ẹhu
 eghu ngu eghu!
 Lenaa ẹnya hụma iphe,
 bụkpoo ndu eku
 onwophẹ kuzeta phẹ alị;
 12 mbụ lee ẹnya hụma iphe,
 bụkpoo ndu eku
 onwophẹ mee phẹ
 g'ẹphe darwua alị!
 Tụkonu iphe, bụkpoo ndu
 ẹjo-iphe mebyishikọta
 l'ẹka ẹphe pfulu!
 13 Tụko phẹ g'ẹphe ha lia elili l'alị!
 Woru phẹ iphu kpupuyabẹ
 ekpupuyabẹ l'ime ilu!
 14 Noo teke mu e-kweta ngu
 l'ẹkutara ngu a-dụ-a ike
 dzọo ngu.
 15 Lenaa oke anụ ono,

bụ behemotu,
 bụ anụ, mu tukuru gu l'iya
 mee dobe;
 tẹme ọ bụru anụ,
 ata ẹswa l'alì g'eswi.

16 Sụ-a; lenaa ẹgube ike,
 dū iya l'ọkpa!

Hụmawaro ẹgube ike,
 dū iya l'akwara akwara,
 gbashiru iya l'ẹpho!

17 Ọdzu iya anọduje enwunga
 g'oshi sida.

Anụ anụ, dū iya l'utapfu
 ligbachaaru eligba.

18 Ọkpu iya bụ mkpuruoku
 onyirubvu bẹ ọ bụ.

Oshi-ọkpa iya bụru mgborígwè.

19 Ọo ya kachaa shii l'iphe,
 bukpuo iphe,
 Chileke meshiru dobe ẹ
 mgboko;
 ọle onye ono, meru iya nū
 ono egudejele-a
 ogu-echi iya zaa ya ntse.

20 Úbvú úbvú anọduje ewotaru
 iya iphe, ẹphe metaru;
 tẹme anụ, bu l'ẹgbudu
 g'ẹphe ha nọdu
 anọduje iya ntse ebvu
 ebvu.

21 Ọozeje ẹ mkpula oshi lotusu;
 woru onwiya domia ẹ
 mkpula ẹswa, nọ l'ụda.

²² Oshi lotusu ono egudeje
 ẹpfukala, dṽ iya nṽ
 gude domia ya.

Ẹkali oshi wilo nṽ-ṽhee ya
 mgburugburu.

²³ Mini -nṽdu atṽ kpereree;
 o too yedu iya ebvu.

Ọṽhu ọ dṽdu iphe,
 eme iya nṽ
 m'obetakpṽo ẹnyimu
 Jiṽdanu gbaa utso
 sṽbe iya l'ṽnu.

²⁴ ?Bṽ onye sṽru iya egude
 m'ṽ nṽdu ele iya ẹnya?

Too ?bṽ onye sṽru
 g'ṽo-nmata iya swṽo
 ya imi?

41

¹ ?Ii-dṽ-a ike gude
 ịkokoro nmata
 ẹjo-oke-agiyi,
 bṽ Leviyatanu;
 ọzoo tṽa ya eri l'ire woru
 libe elibe?

² ?Ii-dṽ ike ye iya eri l'imi
 lipyia;
 ọzoo woru ịkokoro dzṽbe
 iya l'agba?

³ ?Ii-dṽ-a ike mee ya g'ṽ wata
 ngu arwṽ sṽ g'ị
 phṽaru iya obu-imemini?
 ?ṽo-gṽzeta olu pfuru opfu nṽ
 ngu?

- 4 ?Ii-dụ-a ike mee g'unu l'iya
 gbaa ndzụ
 g'ọ bụru ohu ngu jasụ
 g'ii-nọ-beru?
- 5 ?Ii-dụ-a ike mekoshi iya
 g'eemekoshije
 nwenu-a?
 Ii-woru iya haarụ
 unwumboko ibe ngu
 g'ephe gude bvụ ebvụ?
- 6 Ndu agba nghọ; ?ephe e-kwe
 ngu iya-a onu?
 Tọo ?ephe e-ke iya l'ẹhu l'ẹhu
 g'ephe ha agba nghọ ọbu?
- 7 ?Ii-dụ-a ike gude mkpirikpu
 mkpirikpu igwe
 gbajashia ya akpọ?
 Tọo ?ii-dụ ike gude ikekee
 sụwaa ya ishi?
- 8 I -byikpọo ya ẹka ebyibyi
 ophu bẹ ii-nyata-a iphe,
 gụ l'iya jeru.
 I tii laphubaedu iya azụ
 ememe.
- 9 I -dobekpọo ẹnya l'ii-mekpe
 iya; maru l'ọo ụka bẹ
 i dzuru.
 I -hụmakpoo ya nụ ahuma bẹ
 ike bvụwaru ngu.
- 10 Eshinu ọ dudu onye agirigo,
 nọ iya l'ẹhu sụru
 kẹ g'o je akpatsu
 ẹjo-oke-agiyi;

?bũchia mũbe Chileke be
nemadzũ sũru k'etso opfu?

- 11 ?Bũ onye abya asũ l'owa-a
iphe iya, eka mu dũ
baa gẽ mu pũa ya
ũgwo iya?

Noo kẹle iphemiphe,
nọ lẹ mgboko bũ nkemu.

- 12 “Mu taa hakwa gẽ mu ta tũ
ọnu ọkpa ejo-oke-agiyi ono;
tũa ọnu g'ọ dũ-be ọkpehu
yẹe g'ọ bũ-be anũ,
dũ ùbvù l'ẹnya.

- 13 ?Bũ onye sũru iya aswa
akpọ?

?Bũ onye a-dũ ike parũ
odogoro eje iya l'iphu
lẹ ya eje iya ya eyeye?

- 14 ?Bũ onye a-tũkponu ama
k'eje iya ajaha ọnu,
o gude phengara phengara
eze kpọo ọkpokuu
gbaa mgburugburu?

- 15 Okpurukpu iya bẹ iphe,
kpọru iya giriri bũ
iphe-mgbobuta-ọgu,
nọchaa hũru ahũru;
bya anọduchaa nwibe iya
ntsentsẽ;

16 mbũ l'ẹphe nọchaa
onwophẹ ntsentsẽ
shingushingu;
k'ọphu phẹrephere te

eshidu mgbaka iya
 abahụ iya l'ẹhu.

17 Ẹphe rakụbecharu nwibe phẹ
 arakụbe.

Ẹphe tųgbaru nanụ k'ọphu
 a taa tųwadu iya ẹbo.

18 O -zee uze; icheku-ọku
 aghashihu.

Ẹnya iya dụ g'ẹka ẹnyanwu
 keru paa lẹ nchi-abọhu.

19 Ọku-ọwa anọduje enwu iya
 phoophoophoo l'ọnu.

Ẹkoro-ọku eshi iya agba
 kpitikimu kpitikimu
 kpitikimu.

20 Ẹnwuru-ọku eshi iya l'imi
 akpụ tųutuutuu
 g'ite, e shiberu chiru ẹswa
 kụbe iya.

21 O -kushi unme l'icheku,
 ọku adudu l'ọ gbanwuhu ọku;
 tẹme ọku, enwu
 phoophoophoo nọdu
 eshije iya l'ọnu agushihu.

22 Ọkpehu dụ iya l'olu;
 k'ọphu oomeje gẹ meji tọfu iphe,
 bukpo onye hụmaru iya nụ.

23 Igbigirigbi akpọ ẹhu iya
 rakụgbaerupho l'ẹhu
 nwibe iya;
 k'ọphu ọ dudu onye sụru
 iya arakụfu.

24 Ọkpoma iya kpọru

gbengugbengu gẹ mkpuma;
mbụ l'o shihuru ike gẹ mkpuma,
eegweje iphe.

25 Ọ -gbalihu agbalihu;
ndzụ erwuta ndu ike dụ.

Ẹphe egude ẹhu-anmanma
gbaphu azụ.

26 E -gbua ya ogu-echi;
ọ tọ dudu iphe, oo-me iya;
ọphu ọ dudu iphe, arwa;
ọzoo ịkekee;
ọzoo agụgu emeje iya.

27 Ígwè bẹ ọnyajishije g'onye
anyapyashi ọwa.

Ọ nọdu emeje onyirubvu
g'onye eme oshi,
rehuru erehu.

28 Apfụ te emejedu iya g'ọ gbaa
ọso gbala.

Mkpuma rọbo nọdu adujele
iya-a g'ọ bụ udzu,
etsushi ekpu iya.

29 E -chia ya mgboro l'ọ gbẹ dụ
iya g'e chiru iya oshi ọwa.

A -nọdu atụ iya arwa
swịswiiswii l'ọ chile
iya-a ọchi.

30 Mkputẹpho iya atsụ nkọ
g'igburonu ibiribe mbeji.

Ọ -wụa awụwu l'ẹpuchi l'ọ dụ
g'ẹka e swiru igwe,
e gude echi ereshi.

31 Ọ -rwuba l'ogbumini l'ọ

phuhu uphu g'ite,
e shiberu l'oku.

Teke o rwubaru l'eze-onyimu l'ọ
tsu gbudugbudu g'eka e
shiberu manu urwazi.

³² Eka o gbaru be mini asoje
raa bukahu ebo acha
ke phuuphuu.

Onye leri enya le mini teke
ono l'o dobesu l'ogbu-mini
furu ewo.

³³ O to dudu iphe,
du le mgboko-a,
aatu eyeru iya.

O bu iphe, e meru dobe
le mgboko; ophu ndzu
agujeedu iya.

³⁴ G'iphe ahahabe l'eli;
o to dudu iphe, oo-gube iya.

Oo ya bu eze l'iphe,
bukpoo iphemiphe,
eku onwiya ekuku.”

42

¹ Tobudu iya bu; Jiobu bya
eyeeru Chipfu Onu
bya asu iya:

² Mu maru-a l'i suru eme
iphemiphe;
l'o to dudu iphe, i tuberu
k'ememe, a byaru
agbanwe agbanwe.

³ I jiru su: “?Bu onye woru
enweru egomunggo

kẹ gube Chileke rwutoshia;
l'ẹbe abu l'onye obu maru
iphe, oopfu?"

Mu kwetakwaru ẹ mu shi
epfu iphe, mu amadu
ishi iya;
iphe, du biribiri k'ofhu mu
ta asudu iya amaru.

⁴ I pfukwarupho su:
“Ngabekwa nchi;
ge mu bya aja ngu aji.

O kwa gi zaje mu iya.”

⁵ O kwa ẹ nchi be mu
shi anumaje eka a tu onu ngu.

Obenu ẹ nta-a be mu
humawaru ngu l'enya.

⁶ Noo g'o gude mu lawarọ
onwomu ashi.
Izimanu lwawaru mu azu.

Wakwa mu l'ofhu l'ime
urwuku yele ime nu.

Akpochi opfu obu ishi

⁷ Tobudu iya bu; Chipfu pfuchaa iphemiphe ono yeru
Jiobu bya epfukwarupho yeru Elifazu onye Temanu su
iya: “Ehu eghukwa mu eghe; o buru gu l'onya ngu phe
ephenebo kpatsuru mu iya; kele unu te epfuduru mu
iphe, pfuru nhamunha g'onye-ozu mu, bu Jiobu pfuru.

⁸ Nta-a bu iphe, unu e-mekwa bu g'unu kpata oke-eswi
esaa; yee ebili esaa jepfu onye-ozu mu, bu Jiobu g'o gude
iya gwee ngweja-akpo-oku nu mu l'opfu ehu unu. Onye-
ozu mu, bu Jiobu epfuru nu Chileke l'iswi ehu unu; mu
anata epfufu, o pfuru nu mu. Mu te emeedu unu iphe,
mu gege eme unu l'esweswe ono, unu meru ono. Noo kele

unu te epfuduru mu iphe, pfuru nhamunha g'onye-ozimu, bu Jiobu pfuru.”⁹ Noo ya bu; Elifazu onye Temanu; yee Bilidadu onye Shuwa; waa Zofa, bu onye Nama gbeshi bya emee iphe, Chipfu suru g'ephe mee. Jiobu bya epfuru nu Chipfu; o nata iphe, o pfuru nu iya.

¹⁰ Tobudu iya bu; Jiobu bya epfuchaepho nuchaa Chileke l'iswi ehunonyà iya phe onoya; Chipfu bya emee ya; o byakwa enweru eku ozo. O bya emee ya iphe, bukpo iphemiphe, o shi nweru hakota g'o shi ha ugbo labo. ¹¹ Unwune iya unwoke me unwany; mekpoo onyemonye, shi mahawaru iya nu byaahaa ibe iya ozo; ephe l'ephe riaha nri ozo. Ephe kpoharu iya iphu; duha ya obu k'iphe-ehuka ono g'o ha, bu iphe, Chipfu shi woru tukobe iya ono. O nodu abujeru onye byatasharu nu l'ooguderu iya kobo bya egudekwaru iya pho iphe-nchi, e gude mkpola-ododo mee.

¹² Chipfu bya agoru onu-oma nu Jiobu le ndzu ophu o mechaaru nofua eme le ndzu ophu o vuru uzo noo. Aturu, o mechaaru nweru du ukporo unu aturu l'unu iri l'ise. Inya-kamelu du unu iri l'ise. Eswi iya, e jigbaru ebo ebo du unu ise. Nkapfu-igara du unu labo l'ukporo iri. ¹³ O nwuta unwoke esaa bya anwuta unwany eto. ¹⁴ Okpara iya ke nwanyi be o guru Jiemima bya agua otsota iya Kezaya bya agua k'eto Kerenu-Hapuku. ¹⁵ E - jegbabe ekameka l'ali ono ta adudu eka aahuma onye nwanyi, mapfuru unwu ada Jiobu le mma. Nna phe, bu Jiobu keru iphe, o nweru gbaa phe teke o keru iya unwu iya ke nwoke.

¹⁶ Ge Jiobu jechaaru iphe-ehuka ono be o dzufuaru ndzu noo ukporo apha esaa. O nodu ndzu gude enya huma unwu iya; yee unwu nwanwa iya phe; mekpoo unwu nwanwanwanwa; mekpoo nwanwanwanwa nwanwa iya. ¹⁷ Tobudu iya bu; o mechaa nwuhu kakpo

Jiobu 42:17

170

Jiobu 42:17

nka karwee akarwe; nɔkpoo ikpoto apha, dɔ igwerigwe
igwerigwe.

Bayıburu Izii
Izii: Bayıburu Izii Bible

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 30 Dec 2021 from source files dated 30 Dec 2021

c6885c7c-c550-5b8b-a4fe-4bd714af4f6d